

WANTOK

Niuspepa bilong yumi ol PNG stret!

Wan Wik, Jun 9 - 15, 2005 NAMBA 1612 K1.00 long Mosbi tasol - Ausait Mosbi K1.30




"PNG no sapotim
famili bilong
mi!" - PES 3



Nupela
namba tu
bilong PM -
PES 2

Great Quality

Affordable Price



INSAIT: CATHOLIC REPORTER
bilong mun Jun.

Sinato singaut long yuniti

Veronica Hatutasi i raitim

NAU Bogenvil i amamas long Joseph Kabui i kamap Presiden bilong namba wan Otonomes Gavman long ailan, Deputi na

Ekting Gavana Gerard Sinato i singaut long olgeta grup na lida long ailan long wok bung wantaim wanbel.

Mista Sinato i tok em i sanap namel long wok bilong painim gut-

pela sindaun long Bogenvil anirit long Bogenvil Interim Provinsel Gavman we bai i go aut tude taim ol rit pepa long Iektorel Komisnin na nupela Bogenvil Otonomes Gavman i kirap, em i laikim bai ol i



• Bogenvil Presiden Joseph Kabui - 'Nogat as bilong ol sut toktok'.



• Momis: 'I gat as long go long kot.'



PNG Ais i gat kik...

EM NAU...ol liklik lain manmeri husat i save autim save na tingting bilong ol long kain kain rot nau i gat hap bilong soim ol samting olsem ol piksa ol i penim, ol liklik samting olsem bilum ol yet. I mekim na ol arapela samting ol i mekim long sin na diwai long Ais na Krafe Eksibisen. Dispela bai kamap long olgeta yia na bai givim cans long ol atis bilong yumi long soim wok bilong ol.

Eric Tai bilong Simbu i soim wanpela piksa bilong ais John Stune. Stune em i wanpela hap man bilong penim piksa tu na planti wok bilong en, em i callim i go ausait long kanti pinis. Foto: ANDREW MOLEN

strongim na noken lusim dispela spirit bilong yuniti we i bin stiaim Bogenvil i kam inap nau. Long wankain taim em i tok wok jastis na stretpela pasin i mas stap.

"Mi apil long ol Bogenvil Pipels Kongres (BPC) na Bogenvil Interim Provinsel Gavman na ol arapela grup long lusim tingting long ol birua pasin namel long ol na kam bung na wok wantaim long strongim yuniti.

"Mi sori tru long harim ol toktok i pairap i go kam long ol lida bilong yumi, moa yet, taim yumi kam long dispela mak we yumi wok hat na bung wantaim long wankain sanap na ol wok i karim kaikai wantaim nupela Otonomes Gavman yumi laik kirapim. I luk olsem dispela yumiti we yumi wok hat long kisim na holim strong i laik pundaun.

"Long wankain taim, jastis i mas kamap na sapos husat kendidet i no amamas long sampela samting long ileksen, em i gat rait anirit long Mama Lo bilong PNG na

Bogenvil long kisim wari bilong em i go long kot. Kot em i wanpela independen bodi we nogat man bai stiaim em long kisim sapot o nogat na disissen em i wokim em i stretpela na yumi mas givim luksave," Mista Sinato i tok.

Em i tok em i amamas long ileksen i bin go gut, maski i bin gat ol liklik samting i kamap tasol ol i no bin bagarapim ol wok.

Em i tok em i bikpela samting long luksave long ileksen we i soim laik bilong ol pipel long demokretik o gutpela rot long skelim, glasim na makim ol lida husat bai go pas long ol long 5-pela yia i kam.

Mista Sinato i salensim ol wina husat bai go pas long Otonomes Gavman long wok bung na sanapim ol bikpela wok we bai i kamapim ol samting Bogenvil na pipel i bin pait, dai na kraal long em longpela taim.

I go moa long pes 2

PowerMate 950L Generator


BAIM POWERMATE 950L GENERATOR NA KISIM TUPELA FLUORO LAMP WANTAIM CORDS NA POWERBOARD FREE!

SPECIFICATIONS:

- 650w Generator
- 2 Stroke Engine
- Runs on Zoom fuel
- 4 & 1/2 Hours on full load
- With Australian/PNG Standard Socket



Model: 950L



BACK BY POPULAR DEMAND!

FREE GIVEAWAY

2 x Fluorescent 18W 600mm with plug-in cord and 1 x 5m extension lead

1 x 4 Outlet Powerboard

K 559

Price inclusive of GST

BACKED BY BRIAN BELL'S WARRANTY, SPARE PARTS & SERVICE

Brian Bell Shop with a friend



Port Moresby 325 5411 Powercentre 325 8066

Lae 472 3200 Tuptown 479 1948 Madang 852 1899 Goroka 732 1622 Mt Hagen 542 1999 Kokopo 982 9027

... i kam long pes 1

Sinato singaut long yuniti

Ilektorel Menesa Mathias Pihei na ol woklain bilong em long Buka i bin tokaut long win bilong Mista Kabui olsem namba wan presiden bilong Bogenvil Otonomes Gavman long las wik Sarere bihain long ol i pinis kaunim ol vot long Buka. Mista Kabui i bin win long 37, 928 vot na dispela em i 13, 928 moa long olpela Bogenvil gavana na longpela taim politisen John Momis husat i bin kisim 22,970 vot.

Mista Kabui husat i bin primia bilong Bogenvil taim hevi i kamap 16-pela yia i go pinis i wanpela strongpela lida. Grup bilong em Bogenvil Pipels Kongres we em bin lida long em i bin wok wantaim Bogenvil Interim Provisnel Gavman we Mista Momis i bin go pas long en inap em i risain long resis long Otonomes Gavman long mun Epril bilong dispela yia. Tupela lida i bin wok gut wantaim long kisim Bogenvil long mak em i stap long em nau.

Taim Mista Kabui i tok tenkyu long pipel bilong Bogenvil long makim em olsem lidaman long nupela Otonomes Gavman, em i tok pati bilong em, Pipel's Kongres Pati, i tingting long kirapim wanpela supa kolisen bilong go pas long namba wan Otonomes Gavman.

Mista Kabui i bin givim tingting bilong em long Redio Australia Tok Pisin Sevis.

Em i tok pati bilong em i gat sapot long ol independent memba na nau grup bilong em i gat 34 memba sapot.

Em i tok sapos ol i kirapim bikpela kolisen, dispela bai helpim Pati bilong em long gi hetim ol wok bilong kirapim bel isi namel long olgeta pipel long Bogenvil we hevi i bin kamapim

bel nogut na birua pasin namel long ol.

Long wankain taim, Mista Momis i no wanbel long sampela samting we em i tok i no kamap gut long ileksen na em i laik kisim i go long kot.

Em i tok korap pasin na pasin bilong pretim na fosim ol pipel long vot i bi kamap long sampela hap bilong saut na sentrel Bogenvil na olsem man husat i egensim tru korapsen na i no laik bai kamap long Bogenvil na tu fridom na jastis, kot i mas stretim ol samting i no stret i bin kamap long dispela ileksen.

Tupela paul wok we Mista Momis i lukim i no stret na i laik kisim win bilong Kabui i go long kot em: Tok kros na yusim gan long pretim ol vota long Konnou konstituensi long Buin, saut Bogenvil, mak bilong ol pipel i vot i moa yet winim dispela mak i stap long Komon Rol long Kokoda konstituensi long saut sentrel Bogenvil na sampela narapela kain asua moa.

"Olsem man husat i save egensim korapsen, mi no nap sanap isi na lukluk na olsem kot bai stretim dispela. Mi alik bai Bogenvil i kirapim nupela gavman long gutpela rot we i mas klia long korapsen na i apim jastis, fridom na demokrasi." Mista Momis i tok.

Em i tok wanem disisen kot i mekim, em bai glasim na skefim ol samting na lukluk long rot we em i ken helpim nupela Bogenvil gavman long em.

"Tasol pastaim, mi mas pait long lukautim tresperensi o i no wokim hait pasin, luksave long lo olsem em i bosim pipel na demokretik rait," Mista Momis i tok.



• Sir Moi i toktok wantaim Gavana Jenerel Sir Paulias Matane bihain long em i mekim tok promis na sainim pepa bilong Deputi Praim

Nupela namba 2 bilong PM

Neville Choi i raitim

MASKI dispela wok i bin sindaun nating longpela taim tru, Deputi Praim Minista nau i stap wantaim Minista bilong Petroleum na Eneji, Sir Moi Avei.

Sir Moi i bin kisim luksave bilong olgeta lida bilong ol pati i stap insait long gavman kolisin.

Praim Minista Sir Michael Somare yet i bin tokaut olsem bikpela luksave i bin go long wok na save bilong Sir Moi long holim dispela wok olsem namba tu bilong em.

Sir Michael i tok wok bilong deputi praime minista em bilong wok bihainim laik bilong gavman na kamap angka bilong gavman insait long politiks.

Sir Moi i tok olsem em i no bin ting olsem em bai kisim luksave long dispela wok, tasol em bai wok strong long karimaut na sapotim wok bilong gavman.

Amukele laikim ambulens bilong Okapa

MEMBA bilong mani sapos gavman i Okapa Tom Amukele i gat mani long helpim askim minista bilong em long baim nupela

ambulens bilong Okapa distrik.

Mista Amukele i tok olgeta taim em i askim gavana bilong em long provins gavana i save tok long sekim Fainens dipatmen.

Em i bikmaus olsem olgeta gavana i mas save olsem ol i gat wok bilong sapotim ol distrik na i noken pasim mani bilong provins i stap long mekim wok bilong ol.

Tasol Spika Jeffery Nape i tok dispela askim i mas go stret long minista bilong mani na noken tromoi toktok nabaut. Em i askim memba bilong Okapa long raitim pepa na salim askim bilong em i go stret long opis bilong Minista bilong Fainens.

Gavana bilong Galp provins Chris Haiveta i tok memba i mas kolim stret nem bilong ol gavana bilong long sait bilong em, em i save helpim ol memba bilong em long hevi bilong ol long distrik.

Marat laik rausim poka masin

MEMBA bilong Rabaul Dokta Allan Marat i askim gavman long rausim olgeta laki masin gem insait long kantri.

Em i sut long poka masin na kasino masin we i wankain olsem hos masin we gavman i karimaut bikpela kempen na rausim olgeta pinis.

Dokta Marat i tok poka masin em wanpela laki masin tu wankain olsem hos masin we ol sios na komyniti i bin toktok strong long rausim tasol gavman i no rausim yet.

Dokta Marat i tok dispela masin i mekim na planti famili i save kros pait, marit i bruk, ol pikinini i hangre bikos papa i tromoi mani long poka masin na planti wokman tu i lusim wok na go pilai masin. Taim ol i lus ol i mekim stil pasin long opis o mekim hait wok long kisim mani long go bek pilai masin na planti hevi moa we poka masin i save kamapim.

Dokta Marat i tok em i kisim save tu olsem i gat wanpela kasino masin i bin stap long wanpela hotel long Rabaul taun we em i askim sapos Nesanel Geming Kontrol Bod i save long dispela kasino masin.

Em i tok dispela hotel tu i gat toktok bikos em i ting em bilong sampela bikman olsem na em i laikim Geming Kontrol Bod long sekim na mekim eksen long dispela samting.

Em i tok em i nogat save long dispela kasino masin i stap long Rabaul na em i save olsem Is Nu Briten provinsal gavman tu i no save long dispela samting.

Dokta Marat i askim minista bilong Treseri na Fainens Bart Philemon sapos em i gat save long dispela samting na em bai mekim wanem long dispela masin.

A COLLEGE TO CHANGE YOUR WORLD IN 2005 YOUR accredited international awards

Invest in accredited qualifications and skills to gain a successful career. Everything you need for study success is provided; Training Materials, Guide, Exams, Revision Tests, Exam, Award.

Diplomas (£150/US\$300/AUS\$360)

- *Accounts, Hotels, Tourism, Computers
- *Business, Management, English, Stores
- *Personnel, Office, Purchasing, Advertising
- *Marketing, Insurance, Secretary, Office

Advanced Diplomas, BBA, BCom, MBA

- *Business, Marketing, Finance, Organization

For a FREE Prospectus/brochure contact:
CAMBRIDGE INTERNATIONAL COLLEGE
 P.O. Box 1378, Southampton, SO17 3WX, Britain
 Web: www.cambridgecollege.co.uk
 email: info@cambridgetraining.com
 Fax: +44 2380 337200

Accredited British Training & Education registered with the National Training Council & Ministry of Labour of Papua New Guinea

TORO

TORO WANTAIM OL GRUP BILONG EM SAPOTIM OL MENDI MURUKS... MENDI MURUKS GO!! KILIM!!

QOMLEM HOT TRU.. SKOA EM 12-12 NA KLOSTU LONG FULTAIM OL ARAPELA TIM IKISIM BAL NA WINGA I MEKIM ZOMITA DESH NA GO PUTIM TRAI!!! PASIM GET!! KILIM EM!!

REFRI I SAVE BAI BIKPELA PAIT BAI KIRAP LONG SAPOTAS BILONG MENDI MURUKS NA EM MEKIM SAIN BILONG VIDIO REF!!!

MAN OLGETA SAPOTAS I LUKIM OLSEM NA OL! KILIM LONG LAP... REFEM KON YAH! NOGAT VIDIO REF YAH! HA! HA! HA!

HO! HA! HA! HA! HE! HE! HE! HE! HA! HA! HA! HA!

OLGETA LAP I STAP NA REF GIVIM TRAI..

'PNG no sapatim famili bilong mi' - Somare

OL pikinini na famili bilong Praim Minista Sir Michael Somare i no save kisim wanpela sapat o helpim bilong gavman long bipo yet i kam nau. Praim Minista Sir Michael Somare i tokim palamen aste.

Sir Michael Somare i tok ol pikinini na famili bilong em i kisim skul na ol arapela samting long hatwok na na potnait pei bilong em yet. Olsem na sapos ol i kisim wok bihainim skul na save bilong ol, ol i ken go het. Na tu ol em pipel bilong Papua Niugini na i mas helpim long mekim wok long kirapim dispela kantri.

Praim Minista Sir Michael Somare i mekim dispela toktok taim memba bilong Obura Woninara John Koigiri i askim olsem wanem na wanpela pikinini bilong Praim Minista i sindaun long bod bilong PNG Power.

Mista Koigiri i askim tu olsem i luk olsem dispela gavman i rausim planti Hailans save man long ol bikpela wok na opis na givim i go long lain bilong wanpela hap rijen tasol.

Em i askim wanem as na gavman i rausim Menesing Dairekta bilong Independen Pablik Bisnis Koporesen (IPBC) Masket langalio long bod bilong sampela gavman bisnis na tu bai em i lusim wok bilong em wantaim IPBC. Sir Michael i tok gavman bilong em i statim

wok bilong stretim gut wok na posisen bilong planti bod siaman na eksekutiv dairekta bilong ol gavman bisnis opis bikos sampela i save sindaun long tupela o moa bod miting na kisim pe we i abrusim mak bilong Safaris and Rinumeresen Komisnin - ol lain husat i save makim pe bilong olgeta pablik seven.

Na tu em i laik rausim ol kainkain konsalten o saveman bilong ausait wok nabaut we gavman i save peim bikpela mani tru i go long ol bikos dispela em ol wokman yet i ken mekim.

Em i tok ol senis em i mekim i no sut long mekim nogut long ol hailans saveman. Dispela em i no tingting bilong em bikos em i no save mekim wansait pasin long wanpela man o meri bilong Papua Niugini long bipo yet i kam inap nau. Olgeta wok bilong kirapim kantri em ol savemanmeri we skul na save bilong ol stret long dispela wok em gavman i mas makim ol.

Em i tok ol manmeri we save na eksperiens bilong ol i sut stret long wok em kantri i mas kisim ol long wok bilong kirapim kantri na i no nabaut nabaut.


Tasol Gavana bilong Morobe Luther Wenge i katim tok olsem pasin wanpela pikinini bilong Somare i sindaun long bod bi-

long PNG Power i soim olsem i gat asua long ai bilong ol pipel bilong dispela kantri. Tasol Somare i tok hat olsem sapos dispela pikinini bilong em i gat save long dispela wok, em i ken go het wankain olsem olgeta Papua Niugini i gat save long wok bilong ol.

Praim Minista i tok em i no makim ol nem. Narapela opis i lukautim dispela i save makim ol nem pinis na bihain i kam long em long oraitim tasol.

Sir Michael Somare i tok em i no save askim dispela kantri long givim em sapat na helpim long famili bilong em long bipo yet i kam. Nogat wanpela helpim nabaut. Olgeta samting i kam long hatwok na potnait pe bilong em yet. Nau ol pikinini kam aut long strong bilong ol yet na i laik painim wok na kisim wok em orait tasol olsem olgeta Papua Niugini pipel i save bihainim.

Gavana Luther Wenge i laik strongim tok yet olsem i gat konflik ov interes tasol Spika Jeffery Nape i tokim Mista Wenge long noken tanim tok nabaut long mak bilong salensim Praim Minista long ol toktok we bekim em Praim Minista i givim klia pinis long bekim askim bilong memba bilong Obura Woninara John Koigiri.



Meri wantok i bin go sindaun long bikpela kaikai bilong gavman na ol lain bilong ol arapela kantri i kam glasim Bogenvil ileksen. Taim praim minista i wokabaut i kam insait, em i lukim olsem olgeta lida na bikman bilong yumi i sindaun long wanpela sait na ol lain bilong Fiji i sindaun long arapela sait. Iki tasol PM i go na tok, olsem wanem, yupela i no inap go sindaun wantaim ol wantok bilong yumi long hap sait?

Sampela taim ol lida tu i save lus tingting long pasin bilong yumi long PNG. Gut wan, Chief.

NA mipela i mas autim tingting long sait bilong ol dispela kain bikpela bung we ol i save salim askim i go long ol memba bilong palamen na ol bikman bilong ol dipatmen. Tupela taim long dispela wik, ol planti long ol bikman i no kamap long ol kibung i kamap long Mosbi. Namba wan taim em PM yet i luksave olsem i nogat wanpela bosman bilong wanpela dipatmen i sindaun long lonsing bilong painim wanpela rot bilong bungim olgeta gavman dipatmen aninit long wanpela kompyuta sistem tasol.

NAU tasol mipela i stat long lukim sampela wok long traim painimaut as tru long marasin i wok long sot insait long ol haus sik bilong gavman. Pipel i krai long gavman, gavman i singaut long bosman bilong helt dipatmen na em i tok i gat mani i stap. Tasol asua i stap wantaim ol wok manmeri insait long dipatmen yet. Olsem wanem? I nogat man i tingim laip bilong ol pipel o? Sapos samting i no wok stret, rausim ol les lain na stretim hevi.

INSAIT long bikpela haus sik bilong gavman long Mosbi siti, ol sik manmeri i save go long kisim marasin na ol nes na dokta i save tok i nogat marasin. Bihain ol i save salim ol i go long wanpela arapela marasin stua we i no wok aninit long gavman, tasol em i gat wanpela stua i stap insait long dispela haus sik. Yupela ting em i stret o nogat?

NA olsem wanem na ol praivet haus sik i no save sot long marasin na ol bikpela haus sik bilong gavman we bikpela hap mani bilong ol i stap yet i no save gat marasin?

I GAT ol lain husat i save kandim namba bilong ol manmeri husat i gat sik we i gat marasin long en, tasol i nogat marasin na ol i save dai? Hamas manmeri tru i lusim laip bilong ol long dispela as long marasin i sot? Sapos mani i stap na i nogat marasin, husat i wok long kaikaim dispela mani?

Planti ol pilai long kantri i wok long traim hat long kamapim ol gutpela pilai. Moa yet long taim ol i go long narapela kantri long ol bikpela pilai. Tasol soka we em i olpela pilai long kantri we nau yet i gat planti mani long em i wok long go daun. Olsem wanem sampela samting i rong yet?

Forestri lo bai kamap yet

NUPELA Lo bilong Fores bai kirapim gen bikpela stil na bagarap pasin i bin kamap bipo long 1980 i kam we ripot bilong Barnett Enquiry o wok painimaut i kamautim.

Memba bilong Huon Galp Sasa Zibe i tromoi dispela askim i go long Minista bilong Fores Patrick Pruaitch long Tunde dispela wik taim Palamen i bin sindaun.

Mista Zibe i tok em i no wanbel long palamen long kamapim dispela forestri lo bikos em i no gutpela tru long helpim ol papagraun na ol provins.

Mista Zibe i tok dispela senis long lo bai rausim pawa bilong ol papagraun, ol lida na provinsal

gavman long toktok long ol diwai bisnis long ples na provins bilong ol. Na tu ol bai nogat maus long tokaut long wari na bel hevi bilong ol long ol timba projek long hap bilong ol.

Mista Zibe i tok tu olsem dispela senis bai bagarapim tu ol gutpela toktok bilong stretim hailans haiwe bikos wanbel i bin stap pinis wantaim ol benk long givim mani long dispela projek. Tasol dispela senis inap stopim ol ovasis benk long givim mani.

Mista Zibe i tok tu olsem dispela senis bai kisim bek ol mausman bilong timba kampani long sindaun long bot we ol bai mekim planti disisen long bilong banisim interes bilong ol yet na dispela bai

kirapim bek ol bikpela hevi bilong fores olsem bipo long 1980.

Tasol Minista bilong Fores Patrick Pruaitch i tok wanbel bilong Hailans rot mentenens i no inap bagarap bikos ol ovasis benk wantaim Wol Benk i bin sindaun wantaim gavman na ol i skeim olgeta eria bilong mekim i wok gut taim gavman i ken go het long dispela lo bilong Fores. Olsem na wanbel i stap pinis na helpim mani bai kam yet long stretim Hailans Haiwe rot.

Long bod, Mista Pruaitch i tok Nesenel Eksekutiv Kaunsil (NEC) tasol i gat pawa long makim husat bai sindaun long bod bilong Fores Atoriti na i no long arapela rot nabaut. Minista i

gat liklik pawa tu long dispela. Tasol ol bai mekim gut na abrusim ol kain hevi olsem bipo we dispela lo i kamap long stretim gut olgeta rot na ol hevi bilong bipo.

Mista Pruaitch i tok tu olsem i no gutpela long Ombudsmen Komisnin bai lukluk long dispela lo we gavman i redim pinis long pasim bikos em wok bilong gavman long mekim lo na husat i no wanbel i ken go long kot long kisim tok stret long kot.

Em i tok gavman bai i go het long dispela lo bikos ol i mas strongim polisi bilong gavman long Ekonomik Driven Polisi we Fores Industri i mas sapatim na kamapim.



Kisim skul... Dispela tupela yangpela meri bilong Kila Kila Sekenderi Skul i sindaun na kisim skul long save long mekim ol liklik samting bilong bilasim skin. Ol sumatin bilong Kila Kila i bin raun go long namba wan Ats na Kraf Eksibisen bilong Nesenel Kalsarel Komisnin long lukim wok bilong ol lokol atis bilong PNG. Dispela eksibisen o so bai i stap inap Sarere. Foto: ANDREW MOLEN.

Gavman bai sekim dai bilong Porgera asples

DAI bilong ol asples lain long Porgera main long Enga provins bai i gat wok painimaut i go insait long painim as bilong dai na husat i asua long dispela.

Praim Minista Sir Michael Somare i tokim palamen long Tunde olsem em i kisim liklik toksave olsem ol pipel tu i bin asua long go insait long hap we kampani i wok long en long painim gol long wanpela bikpela hul we masin i digim. Long dispela hul em graun i bruk na karamapim ol pipel.

Sir Michael Somare i tok dispela em hap bilong ol masin i wok long en na i no bilong ol pipel long go insait. Na em i ting dispela em asua bi-

long ol pipel bilong mipela tu. Taim yumi givim graun long kampani long mekim wok, yumi mas stap longwe, em i tok.

Tasol em bai larim wok painimaut bilong gavman i go het long kamapim ful ripot long dispela dai bilong ol ples lain.

Sir Michael Somare i mekim dispela toktok long bekim askim bilong memba bilong Tari Pori Tom Tomiape we em i askim sapos bai i gat wok painimaut bai kamap long stretim gut ripot na rekot bilong dispela bikpela dai namel long ol pipel bilong em long ples.

Mista Tomiape i tok tu

olsem em i no amamas long harim olsem Porgera main-ing kampani i bin wokim ripot bilong ol long dispela birua na gavman i kisim na bihainim tasol we dispela i no stret. Tasol Sir Michael i tok wok painimaut bilong ol gavman opisa husat i save wok insait long wok bilong maining i no kamap yet. Bihain long dispela i kamap bai ol i ken kamapim Komisnin ov Enkwari.

Ripot i bin kamap dispela yia olsem moa long 20 pipel long Porgera eria i bin dai long bikpela hul taim ol i laik go kisim gol tasol graun i bruk kam daun na karamapim ol.

Ol Intenesenel Obseva grup i amamas

Ol ripot wantaim Veronica Hatutasi

INTENESENEL Obseva grup i autim bikpela amamas long namba wan Otonomes Bogenvil ileksen we i pinis long las wik na ol i tokaut long ol kendidet i bin win.

Kaunim i bin pinis long las Sarere apinun na ol i bin tokaut long Joseph Kabui i winim top sia olsem presiden bilong namba wan gavman bilong Bogenvil.

Lida bilong Intenesenel Obseva grup em Ratu Epeli Nailatikau husat i Spika long Palamen bilong Fiji na i bin holim ol bikpela wok long Fiji olsem diplomat long planti kantri na tu long Fiji ami i bin tokim bung we Praim Minista Sir Michael Somare i bin holim long Palamen long Mandé nait long bikman ya i prisenim ripot bilong grup na tu, tok gutbai bung we olsem ol i amamas tru long Bogenvil ileksen i bin go gut tru.

"Wantaim klia tingting, mi tok olsem mipela i sapotim ileksen we i pinis tasol long Bogenvil. Mi

no lukim kain ileksen long ol narapela hap, we i gutpela tru na nogat meknais o trabel na ol i ogeaisim gut tru. Na mi tokaut long dispela wantaim sori na amamas wantaim bikos Bogenvil i bin stap insait long bikpela hevi long planti yia na nau tasol em i wok long kamap orait. Ilekse i go gut na pipel i makim ol lida bilong ol pinis. Tasol dispela em i stat long wokabaut bilong Bogenvil i go fowed na longpela rot i stap yet.

"Mipela i bin stap long ailan long lukluk na was na helpim ol Bogenvil pipel i luksave na go insait long ileksen na tu, wokim ripot bilong mipela long ol samt- ing we mipela i lukim na kisim long taim bilong vot.

"Mi na lain bilong mi i go bek wantaim gutpela bel amamas long karimaut wok we ol i givim mipela long en," Ratu Nailatikau i tok.


Samting olsem 15 intenesenel obseva i bin stap inap long tripela wik long Bogenvil na ol i

bin raun long olgeta hap bilong ailan na karimaut wok bilong ol long ol ples we ol pipel i bin vot long en. Ol obseva i bin kam long Komonwel na Pasifik Seketeriet, Fiji, Nu Silan, Japan, Australia na Yunaitet Nesens.

Ratu Nailatikau i bin prisenim ripot bilong ol obseva grup i go long han bilong Praim Minista Sir Michael Somare long dispela bung nait long Palamen.

Inta Gavman Rilesens na Bogenvil Afeas Minista Sir Peter Barter, Spika Jeffrey Nape, Foren Afeas minister Sir Rabbie Namaliu, ol arapela minister, Palamen memba, Sief Seketeri Joshua Kalinoe, Bos bilong PNG Difens Fos Komanda Peter Ilau, Polis Komisina Sam Inguba, ol bikman bilong ol Dipatmen, fiji komyuniti long Pot Mosbi na midia i bin witesim dispela seremoni bung.

Praim Minista bai prisenim dispela ripot long taim bilong Palamen bung long dispela wik.



• Lida bilong Intenesenel Obseva Grup na Spika long Palamen bilong Fiji, Ratu Epeli Nailatikau i toktok long gutpela ron bilong namba wan Otonomes Bogenvil Gavman ileksen. Praim Minista Sir Michael Somare i sindaun na harim toktok i stap.

Foto: MIDIA YUNIT BILONG OPIS BILONG PM

Sir Peter na Rabbie wanbel long ripot

INTA Gavman Rilesen na Bogenvil Afeas Minista Sir Peter Barter na Foren Afeas Minista Sir Rabbie Namaliu i luksave na amamas long ripot bilong intenesenel obseva grup na tok ripot bilong ol i autim laik bilong ol pipel.

Tupela i autim tok amamas insait long wanpela stetmen bihainim ol i kisim ripot long grup lida na Spika long Fiji Palamen Ratu Epeli Nailatikau long dispela wik.

"Dispela ripot em i bikpela samting na bai i lukautim gutpela wokabaut bilong Bogenvil taim em i kisim nupela Otonomes gavman bilong em na tu long demokrasi na gavman i wokim gutpela wok long stretpela na kli- apela pasin (good governance).

Bikos dispela em ripot bilong wanpela independent grup, em i

givim gutpela piksa long Bogenvil na rot em bai go het wantaim namba wan Otonomes gavman bilong em.

Em inapim ol samting i stap insait long Lincoln na Bogenvil Pis Agrimen we i tok ileksen i mas fri na i mas stret.

Dispela em mak ol i luksave long intenesenel level bilong gavman i bihainim demokrasi na gutpela gavanens. Mama lo bilong PNG na Bogenvil i laikim dispela ripot. Em i bikpela samt- ing long rot Bogenvil i bihainim long kamapim gutpela sindaun we ol Bogenvil pipel i bin singaut na pre long em," Sir Peter na Sir Rabbie i tok.

Ol i tok amamas olsem ol lida, komyuniti, ol ileksen Opisa long Bogenvil na PNG i bin wok bung gut wantaim long kamapim gut-

pela ileksen we i kamap klia long ripot bilong ol obseva.

Long wankain taim tupela i tok amamas long gutpela ripot, ol i tok tru, ol obseva i no inap stap long olgeta hap we ol pipel i bin vot long em na husat kendidet i no amamas long sampela samt- ing i bin kamap long taim bilong ileksen, ol i gat rait long kisim dispela i go long kot bilong dis- putet ritens we i save lukluk long ol dispela wari.

"Mipela i taikim olgeta grup i stap insait long dispela samting i luksave long lo na rait bilong ol narapela. Wankain lo we i bin sti- aim dispela ileksen i ams go het na go pas long ol narapela.

Na Bogenvil Otonomes Gavman i mas kirapim wok bilong em na tu, stretim ol hevi bilong ileksen long gutpela rot," tupela i tok.

Tok amamas long Kabui i win

PLANTI tok amamas long Bogenvil, PNG na ovasis i wok long go long lida bilong namba wan Otonomes gavman bilong Bogenvil, Joseph Kabui.

Minista bilong Inta- Gavman Rilesens na Bogenvil Afeas Sir Peter Barter, i tokaut long amamas bilong em i go long nupela Presiden bilong Bogenvil Joseph Kabui wantaim olgeta ol memba bilong Bogenvil

Haus ov Representitiv long win bilong ol insait long ileksen bilong Bogenvil Otonomes Gavman.

Sir Peter i tok em i amamas tru long win bilong ol na bai lukluk long wokbung wantaim nupela gavman bilong Bogenvil long ol taim i kam.

Minista i tok olsem em i lukluk i go pas long wok wantaim Bogenvil Eksekutiv Kaunsel taim em i kamap, na bai

dispela Otonomes Gavman i ron gut na mekim kamap ol wok bilong ol insait long Bogenvil Pis Agrimen wantaim Mama lo bilong Bogenvil.

Sir Peter i tok moa olsem em i gat strong- pela bilip long Joseph Kabui olsem Presiden long wanem em i gat bikpela save long wok

politik na tu em i wanpela mausman insait long toktok bilong Bogenvil Pis Agrimen na tu wok kamap bilong Otonomes Bogenvil Gavman.

Sir Peter i tok tu olsem ol risal bilong dis- pela ileksen i soim ples klia olsem dispela gav- man bai bungim olgeta manmeri na ol yangpela husat i gat save long mekim tenis i kamap long provins.

Minista i tok dispela em i no isipela wok bai ol i wokim tasol em i tok olsem em i amamas long wok klostu wan- taim nupela Bogenvil Otonomes Gavman long kamapim gutpela sindaun insait long provins na tu long kantri.

Long wankain taim tu, Foren Minista bilong Australia Alexander Downer i givim tok luksave na amamas i go long ileksen bilong Joseph Kabui olsem namba wan Presiden bilong Bogenvil.

Kabui i bin wanpela bilong ol 5-pela man husat i bin resis long sia bilong presiden bilong dispela autonomes gav- man long lidim 39-pela sit asembli insait long Not Solomons Provins we i gat mak olsem 180, 000-pela manmeri.

Momis bai kisim kot salens

JOHN Momis em biknem lida na olpela Bogenvil Gavana husat i kamap namba tu na lusim sia bilong Presiden long go pas long Bogenvil i go long Joseph Kabui long dis- pela namba wan Otonomes Bogenvil ileksen i tok em bai kisim win bilong Kabui i go long kot bikos em i lukim olsem sampela samting i no stret i bin kamap long sampela eria long taim bilong ileksen.

Nau yet, Mista Momis i toktok wantaim ol loya bilong em long dispela samting.

Em i tok em i no wan- bel long win bilong Kabui long wanem sampela samting i bin kamap long pretim ol vota long givim vot long kendidet ol i laikim na tu sampela krangki pasin i bin kamap long sampela eria we mak bilong ol man i vot i antap moa long mak i stap long Komon Rol.

Em i tok em i man bilong sanap strong long egensim korapsen, sapotim jastis, raits an demokrasi. Na sam- pela samting i kamap long sampela hap bilong Saut na Sentrel Bogenvil i go egensim ol dispela na i moabeta long kot i stretim.

Mista Kabui i bin win wantaim 37,928 vot taim Mista Momis i kisim 22,970 vot.

Long wankain taim, planti Bogenvil i taikim bai gutpela bel i mas stap namei long ol lida na dispela gutpela wok bung we ol i bin wok aninit long em na nau i laik kirapim namba wan Otonomes Gavman i mas stap.

Sampela ripot Wantok i kisim i tok pasin we Mista Momis i laik kisim no amamas bilong em i go long Nesenel Kot i soim olsem em i salensim laik bilong ol pipel bilong Bogenvil na i no gutpela.



Hap Hap Nius

Is Nu Briten:

OL i painim sip i bin lus

MV Garaga i bin lusim Lamasa long Nu Ailan long Tunde apinun, Me 21 na em bin karim 217 bek kakau, 6-pela pasindia na 8-pela boskru.

Ol pasindia em ol lain bilong Lamasa yet.

Jimmy na Norma Kendi i papa bilong dispela sip. Sip i save wokim ron long kisim kakau namel long Lamasa long Nu Ailan i go olsem long Pomio na karim i go olgeta long Rabaul long salim.

Sip i bin bungim sampela hevi long enjin na em i bagarap long nait bihain long em i lusim Lamasa.

Ol ripot i tok kepten bilong sip i bin salim tok long radio i go long papamama bilong sip, Norma Keni husat i bin salim tok lukaut toktok i go aut na sip Buka Kwin i bin kisim.

Nu Ailan:

OGENAISEEN
Global Fan i beis long Geneva long Swiselan i helpim ol pipel bilong Nu Ailan wantaim ol taunam.

Ol bin lonsim program bilong kisim ol fri taunam o moskito net long Global fan long Kavieng las wik Fraide.

Walter Schnaubelt i makim maus bilong ol yut long Nu Ailan i tok dispela Malaria Projek bilong Global Fan i makim 10-pela distrik olsem pallot projek long kisim na traum ol moskito net.

Program i bin stat long Ogas las yia. Nu Ailan provinsel gavman bai givim sampela mani long kos bilong tilim ol dispela moskito net.

Tok lukaut

TOK lukaut i go long ol PMV draiva insait long Is Nu Briten olsem ol i ken lusim laisens bilong ol sapos ol i rausim ol skul sumatin long ol bas bilong ol.

Opisa bilong Len Trensport Bot long Is Nu Briten Israel Ainui i putim aut dispela toksave bihain long em i kisim ripot olsem sampela PMV bas draiva na boskru i save rausim ol sumatin long wanem ol i peim hap bas pe tasol.

Sampela sumatin i bin putim dispela ripot long pasin we ol PMV draiva i save rausim ol, ol i no wokim sampela tes na dispela i bagarapim ol mak na skul bilong ol.

Mista Ainui i tok i moabeta long ol sumatin i kisim nem bilong ol bas draiva na ripotim ol.

Em i tok sapos ol i save long husat tru ol bas draiva i wokim dispela pasin, ol opisa bilong em na ol polis i ken givim mekimsave long ol.

POSF wokim raun long Is Nu Briten

OL lain bilong Pablik Ofisas Supanuesen Fan (POSF) long Pot Mosbi bai stap long Is Nu Briten tumora Fraide long toktok long ol memba bilong ol long tupela nupela prodak bilong ol.

Long wankain taim tu, wokabout bai i gat long em bikman bilong fan, Menesing Dairekta Leon Buskens, Etrministreta Steven Brown na Menesa Joseph Pupua.

Tupela nupela prodak we ol opisa bai toktok long ol em long

ol fan memba em long Ritaiamen Seving na Benefit Entaitelmen. Bung wantaim ol fan memba bai kamap long Vunapope Konferens senta long Kokopo.

Ol opisa bai toktok tu long ol senis i kamap long fan bihainim Supafan lo. Bai ol i toktok tu long ol kain kaikai o gupela samting we ol memba i ken kisim taim ol i putim ol seving mani i go long POSF.

Tambuim Kwik mani bisnis

....Noken harim swit toktok bilong ol

BISNISMAN na Kakao Bot Memba Jacob Pineli i laikim bai ol atoriti long Is Nu Briten i kamapim lo long putim tambu long ol Kwik Mani bisnis insait long provins.

Long wankain taim tu, Mista Pineli i tok lukaut long ol kakao na kopra fama long noken putim mani bilong ol long ol dispela kain giaman mani bisnis.

Mista Pineli i wokim dispela toktok bihain long sampela lain bilong U-Vistrak kwik mani bisnis i wokim ol gris tok raun long Is Nu Briten long ol kakao fama i putim mani bilong ol long bisnis na ol bai kisim bikpela winmani.

Taim Mista Pineli i wokim tok lukaut, em i tokim ol pipel long Is Nu Briten na moa yet ol kakao fama long noken bihainim

tok gris bilong dispela giaman mani bisnis we i tok long givim bikpela winmani na i no save karim kaikai tasol ol pipel bai lusim liklik mani bilong ol we ol i kisim long hatwok bilong ol yet.

Mista Pineli i laikim bai Is Nu Briten Provinsel Gavman na ol lida i wokim lo long tambuim ol kwik mani bisnis insait long provins.

Ol NGI helt woka sindaun long woksop

HIV/AIDS i wok long go bikpela moa insait long kantri na planti trening long skulim pipel long save long sik, rot bilong abrusim na tu rot bilong lukautim ol lain wantaim sik i kamap tu.

Ol helt woklain, kaunsela na sosel woka bilong Niugini Ailans rijen i stap insait long wanpela HIV/AIDS trening woksop long Vunapope, Is Nu Briten long dispela wik.

Nesanel Katolik Helt Sevis i givim mani long dispela woksop wantaim sapot bilong Caritas Australia na sampela marasin kampani bilong Australia i helpim long go pas long dispela wanpela wik woksop long skulim ol helt woka i skruim save na wok long luksave long HIV/AIDS, rot bilong lukautim ol lain wantaim dispela sik bihainim sindaun na pasin bilong PNG yet.

Tripela save lain bilong Collaboration for Health in PNG i kari-maut dispela woksop. Meri i go pas long trening woksop Elizabeth Reid i tok lukautim gut ol lain wantaim HIV/AIDS i bikpela samting long rot bilong stopim dispela sik.

Bikpela as tingting long holim dispela woksop em long helpim ol helt woklain i skruim save long luksave na lukautim ol lain i gat HIV/AIDS, ol i mas save long rot bilong lukautim ol yet long noken kisim binatang bilong sik AIDS taim ol i lukautim ol siklain na helpim lukautim ol lain ausait husat i no kisim dispela wik.

Mis Reid i tok bikpela samting tu em ol wokfos long helt insait long PNG i noken mas kisim dispela sik bikos ol i save givim helt sevis i go long pipel.

COURTS X SELL

TREID-IN SEIVIM K50

DIPOSIT K1.00 Tasol

AKITA EN21-3N #103794
21" KALA TV
• NTSC pilai bek • oto painim, storim, pasimaut fansen
• 255 chanol memori
Bipo Kes K795

SEIVIM K70

DIPOSIT K1.00 Tasol

ENZER E5518
DVD PLEA #114861
• pilaim DVD, DVD-R, DVD-RW, VCD, SVCD, CD, MP3-CD, CD-R, CD-RW, piksa-CD (mpeg)
Bipo Kes K395

SEIVIM K10

DIPOSIT K1.00 Tasol

TAKADA ISB6A #501738
DRAI IRON
Bipo Kes K85

SEIVIM K20

DIPOSIT K1.00 Tasol

YAMATA FY811 #522718
20 STITS ELEKTRIK SAMAP MASIM
• elektronik lek kontrol
• bikpela moa bed

SEIVIM K100

DIPOSIT K1.00 Tasol

AKITA XPB58-2000S #302740
5KG WASIM KOLOS MASIN
• planti wei long wasim • wei bilong sokim
• planti wei long wasim wantaim wara
Bipo Kes K599

COURTS

Edim valu OLGETA dei!

COURTS - GORDONS
Spring Garden Road, Gordons, Port Moresby
Ph: 302 5867 • Fax: 325 4149 • E-mail: sales@courts.com.pg

COURTS - LAE
Milfordhaven Road, Lae, Morabe Province
Ph: 472 4800 • Fax: 472 4621 • E-mail: courts_lae@courts.com.pg

Olgeta Dro bai igat NIUELA Praiz long...



Dei bilong Dro: 02nd JULY, 2005

BAIM NAU! Na Kisim Sans long winim

BIKPELA SURPRIZE!

KES MONI

K15,000.00

K12,500.00

K10,000.00

K8,000.00 or

K5,000.00

long Courts "Surprize"
Toksave: Ol "SURPRIZE ENTRI TIKET" igat DEIT APRIL 1st igo inap 30th JUNE, 2005, bai stap insait long dispela JULY SURPRIZE DRO.

Raskol pasin strong long Madang

Michael Novingu i raitim

LONG las wik Fraide, komyuniti bilong Madang i bin holim bung long Divain Wod Yunivesiti long painimaut watpo raskol pasin i wok long kamap strong long Madang taun.

Ol pipel i singautim ol 6-peta Palamen memba bilong ol long kamap long dispela miting na bekim askim bilong komyuniti long dispela pasin nogut i wok long kamap long Madang taun.

Ol mausman i makim wan wan

grup insait long komyuniti i stretim dispela bung long painim as bilong wanem na raskol pasin i wok long kamap bikpela na tu, traim long painim rot long stopim dispela.

Intarim Siaman bilong dispela komiti Pater Jan Czuba husat i Presiden bilong DWU i tok as tingting bilong dispela bung i bilong painim rot long traim na stopim raskol pasin long Madang we i pre-tim planti manmeri long taun sampela wik i go pinis.

Dispela komiti i painim olsem ol dispela raskol pasin i kamap we ol

i yusim ol strongpela gan. Tripela memba bilong Palamen em Sir Peter Barter, Alois Kingsley na Matthew Gubag i wari long dispela pasin nogut i kamap na ol i sapotim dispela tingting long wokbung wantaim ol komyuniti long stopim dispela kain raskol pasin.

Long wankain taim, Sir Peter i tok wok bilong polis i no stret olsem ol i gat hevi long ka, wokbung wantaim komyuniti, opis bilong ol i no klin na ol arapela samting we i kamapim long bringim lo na oda i no stret long provins.

Long kisim luksave long komyunit, ol polis manmeri i mas gat dispelin o gutpela pasin, werim klinpela yunifom na olgeta wik i mas gat toksave long wanem samting i wok long kamap long taun.

Klinpela yunifom bai soim em yu polis manmeri na klinpela polis stesen bai mekim ples i luk nais na givim gutpela piksa long ol polis.

Sir Peter i bin tok long kisim ol kalabus lain long Beon long klinim polis stesen.

Em i tok moa olsem Nesenel Kot

haus long Madang i luk olsem ol i kot insait long wanpela stoa we i liklik tumas. Na Distrik Kot haus i bagarap pinis na klostu em bai bruk.

Sir Peter i tok i moabeta long ol i wok bung wantaim long bringim lo na oda na long wokim dispela, katim moa mani long baset long kamapim gutpela wok long lukautim polis na jastis sistem. Em i tok moa olsem givim laisens long ol man long kisim gan i mas stop nau.



PEOPLE'S PROGRESS PARTY

PABLIK TOKSAVE
8th Jun 2005

"PPP KONVENSEN I BIHAINIM LO"

Mi olsem Pablik OPisa bilong People's Progress Party (PPP) Inc. i mas stretim dispela paul toktok we Memba bilong Pomio, Hon. Paul Tiensten na Memba bilong Kikori, Hon. Mark Maipakai i kamapim long giaman pablik bihainim long dispela PPP Konvensen na tu toktok bilong ol memba bilong Nesenel Eksekutiv.

Pastaim tru, mi laik tokaut long ol fainensel memba, ol sapota, provinisel presiden na ol brens bilong Pati insait long kantri olsem olgeta wok bisnis, kibung na arapela wok bilong Pati i save bihainim stret Pati Konstitusen o Lo (wan wan taim i save senisim) o Mama Lo long Integrity of Political Parties and Candidates long dispela lidasip na Nesenel Eksekutiv bilong nau yet.

Olsem na long dispela Nesenel Konvensen we i kamap long Wawin ausait tasol long Lae long 20 na 21 de bilong mun Mei i bin kisim tok orait bilong Nesenel Eksekutiv, Palamentari Wing na ol fainensel memba. Dispela i bihainim Pati Lo.

Ol kworum we i mas bihainim konstitusen i bin go gut tru bikos i bin gat planti lain na fainensel memba i kamap long dispela konvensen. Rejistra bilong Politikel Pati na Kandidet, Mista Paul Bengo i bin stap tu long givim tok klia long ol memba long Ogenik Lo o Mama Lo long Integrity of Political Parties and Candidates. Tupela opisa bilong Opis bilong Iktorel Komisn i bin givim toktok tu long nupela Preferential Voting Sistem.

Olgeta nau memba bilong Palamen husat i resis long 2002 Generel Ilekseen aninit long tiket bilong PPP i bin kisim toksave notis bilong dispela konvensen. Memba bilong Pomio tasol i no bin kisim. Memba bilong Kikori, Hon. Mark Maipakai i bin kisim notis bilong konvensen long wanem em i stap yet olsem memba bilong Palamentari Wing. Olsem na sapos Mista Maipakai i bin gat tok long Pati, em i mas stap long Konvensen. Dispela Konvensen tasol i save mekim bikpela disisen bilong Pati na ol dispela kain tok kros em ol i ken stretim.

Long namba tu isu Pati Konstitusen i oraitim olsem taim i gat kesuel veken-si insait long Nesenel Eksekutiv olsem long 2002 taim Sir Julius Chan na Brown Sinamo i memba bilong Nesenel Eksekutiv i bin risain na resis long ilkesen. Nesenel Eksekutiv i gat pawa long makim wanpela memba bilong Pati long kisim dispela wok.

Seksen 23 (2) bilong Konstitusen i tok, "Immediate past President, the Leader of the Parliamentary Wing and life member(s) shall be ex-officio members of the National Executives".

Olsem na long bihainim Seksen 23 (2) bilong Konstitusen, namba tri Palamentari Wing na Nesenel Eksekutiv miting bilong Pati i bin kamap long 8 Epril 2003 we Hon. Dr. Allan Marat i bin siaman na tu dispela taim em i bin Palamentari Lida bilong Palamentari Wing na Deputi Praim Minista. Em i oraitim long dispela miting olsem Brown Sinamo i mas stap bek yet olsem Tresera bilong Pati. Long sait bilong Sir Julius Chan, dispela miting tu i sanapim em olsem eks-ofisio memba na Pati founda o man i statim pati. Olsem na Sir Julius na Mista Brown Sinamo i tupela i memba bilong Nesenel Eksekutiv.

Memba bilong Kikori i no bin kamap long Konvensen na tu em i no bin toksave long Generel Sekretari olsem em i no inap kamap long wanem kain risen. Tasol bihainim em i go long niuspepa na toktok planti long ol samting we em yet i save olsem i bihainim lo.

Insait long ol minit bilong dispela Nesenel Eksekutiv miting, Hon. Mark Maipakai na Hon. Paul Tiensten i no kamap long miting olsem na tupela i no save long ol dispela resolusen.

Long taim bilong Nesenel Konvensen i bin gat sampela bikpela toktok we mipela i pasim. Sampela bilong ol em:

a) Konvensen i luksave long disisen bilong Nesenel Eksekutiv long rausim Memba bilong Pomio, Paul Tiensten olsem memba bilong pati.

- b) Konvensen i stretim tok long senisim Provisen bilong Pati Lo long tokaut stret long pati long taim politikel senis.
- c) Konvensen stretim tok long makim nupela Nesenel Eksekutiv Komiti.

Sampela provisen mipela i senisim insait long Pati Lo i sut long ol seksen em long senis long kamapim ol memba bilong Nesenel Eksekutiv. Nupela Eksekutiv nau bai i gat Presiden, tupela Vais Presiden, Jenerel Seketeri, Tresera, Palamentari Lida, Presiden Faunda bilong pastaim, wanpela laip memba na tupela memba nating we Konventa na Deputi Lida bilong Palamentari Wing i makim.

Yut, Ol meri na Ol wokmanmeri mausman insait long Nesenel Eksekutiv nau bai i stap aninit long Provinisel Brens.

Olsem na Konvensen i makim ol dispela lain i go long nupela Nesenel Eksekutiv Memba bilong Pati inap tripela yia olgeta.

Alex Anisi	-Presiden	-Is Sepik
Peter Nongkas	-Vais Presiden	-Nu Ailan
Brown Sinamo	-Vais Presiden	-Hailens
Emos Daniels	-Jenerel Seketeri	-Nu Ailan
Philemona Kassan	-Tresera	-Sentrel
Kathy Kakaraya	-Memba	-Hailans
Titus Philemon	-Memba	-Milin Be
Hon. Andrew Baing	-Palamentari Lida	-Morobe
Sir Julius Chan	-Founda & Laip Memba	-Nu Ailan
Ubun Marakai	-Laip Memba	-Hailens

Konvensen tu i strongim sapot bihainim long Hon. Andrew Baing olsem Palamentari Wing.

Olgeta pepa wok, minits na resolusen bilong Konvensen em stret pinis na bai mipela salim i go long Rejistra bilong Politikel Pati na Kandidet, Iktorel Komisn Opis na ol atoriti we i pas wantaim mipela.

Ol 4-pela memba bilong Palamen i kamap long dispela miting.
Hon. Guao Zurenuoc, MP, Memba bilong Finschafen
Hon. Andrew Baing, MP, Memba bilong Makam
Hon. Jamie Maxtone-Graham, MP, Memba bilong Saut Anglimp Waghi
Hon. Bryon Chan, MP, Memba bilong Namatanai.

Olsem ol arapela politikel pati ogenesisen, PPP tu i strongim tingting bilong ol yangpela memba bilong Pati long kamap Lida na kisim Eksekutiv wok insait long Pati, tasol i no amamas long dispela kain pasin sampela memba bilong Palamen i wok long kamapim na go het yet long putim bak-sait long Pati lo na pusim ol yet i go na giaman olsem lida. Yu no inap long baim o salim Lidasip, yu em tru tru lida o giaman tasol. "Yu mas wok hat na onaim Lidasip".

Las toktok em mi laik tok strong long Pablik Opisa bilong Pati olsem Paul Tiensten em i no moa memba bilong PPP olsem na em i nogat rait long tok-tok o givim aut stetmen long Pati. Long Nesenel Konvensen, Nesenel Eksekutiv i wokim disisen pinis na rausim Mista Paul Tiensten. Hon. Mark Maipakai i memba yet bilong Pati tasol em i nogat rait long putim aut pablik stetmen long Pati. Sapos Mista Maipakai o narapela manmeri i no bihainim dispela notis na go het yet, bai Nesenel Eksekutiv i kotim yu.

Husat ol fainensel memba bilong Pati na ol pablik i laik save moa long People's Progress Party Generel Ilekseen i mas ringim Generel Sekretari long ph: 327 7636/327 7635 o Mobail: 686 4315 o Post Office Box 6030, Boroko, NCD

EMOS DANIELS
General Secretary and Public Officer
People's Progress Party Inc.

Lae kisim bagarap long bikpela guria

PLANTI manmeri na pikinini insait long Lae insait long Morobe provins i bin ronawe long ol haus bilong ol bihainim long wanpela bikpela guria i bin seksekim taun long las wik.

Bikpela guria long mak bilong 6 poin long Rikta Skel i bin kamap long Lae long 5 kilok moning na sampela haus long taun na ol setelmen i bin pondaun. Tasol nogat man i kisim bagarap.

Planti famili i bin slip yet taim guria i kamap na ol haus samting i pondaun antap long ol tasol laki nogat man i dai.

Wendy Akusa i tok sampela famili long 4 na 5 Mail eria i bin lusim ol haus na ol samting bilong ol nau i askim long helpim wantaim ol nil na kenvas long wokim ol haus.

Ol i askim provinisel disasta opis long helpim ol. Ol ripot i tok planti famili nau i nogat haus na ol i wok long bildim ol liklik haus long stap long em taim ol arapela i go stap wantaim ol wantok na ol poroman bilong ol.

Lukautim gut boda poliswari long ol bikpela raskol pasin

SINGAUT i go long Nesenel Gavman long wokim samting bilong daunim ol trensenel kraim o ol kriminel pasin we ol ausait lain bilong ol ovasis kantri i stap insait long en.

Bosman bilong ol polis long Momase Giossi Labi i bin wokim dispela singaut taim em i kam bek long wanpela lukluk raun i kam long ol woklain i stap insait long koman bilong em na ol ples we ol i stap long em.

Em i wari na sori long stap bilong sampela opisa bilong em bikos ol ples we ol i stap long em i no gutpela tumas, moa yet, ol dispela long boda ples Wutung long Wes Sepik.

Inspekta Labi i tok Wutung i sot long ol woklain na wok samting bilong helpim ol i karimaut wok bilong ol long dispela boda stesen.

Em i tok sapos gavman i no wokim samting long stretim ol dispela, moa hevi bai kamap.

Em i tok em i no amamas long ol nesenel lida long wanem ol i no inap long kamapim mani bilong baim ol samting bilong polis ben na tu, putim mani long ol bikpela eria we i laikim helpim long en.

"Long mi yet, mi laikim bai ol i rausim polis ben bikos em i no sevim intres bilong kantri. Ol i yusim ben long pilai long taim ol bikpela samting i kamap. I moabeta long yusim dispela K130,000 bilong polis ben we ol bin resim long kamapim gut ol polis operesen long ol ples olsem Wutung na Daru bikos ol dispela i stap long boda eria na em ol eria we trabel inap kamap long ol.

"Ol opisa long hap i laikim ol ka na bot long helpim ol i karimaut gut wok bilong ol." Inspekta Labi i tok.

Mista Labi i tok long nau, 6-pela polis opisa tasol i lukautim tupela boda polis stesen ya na kondisen o kain stap ol i stap long em na wok i no gutpela.

Dispela i min olsem ol i sot long ol ka, nogat telipon, nogat gutpela ples long stap long em na ol arapela hevi moa olsem. Na ol i nogat gutpela sans long save, lukim o holim ol kriminel o lain i bilong ausait husat i laik kam insait long PNG bihainim boda eria rot long wokim ol kriminel o bikhet pasin bilong kisim ol gan na spak brus na ol arapela samting nogut i kam insait long kantri.

Hailans
Haiwe i op
bek

Kimisopa opim bikpela Uwoku kopi projek

James Kila i raitim

KUNDIAWA Woks Dipatmen i nau opim gen Hailans Haiwei rot long Mindima ples insait long Simbu provins long ka long ron gen bihan long ol i bin pasim rot long wanem bikpela rein i bin pundaun na mekim graun i bruk.

Woks Dipatmen bilong Kundiawa i bin laik long kliarim na opim rot long las wik Tunde tasol ol Narku papa graun i bin pasim rot na bin askim long kompensesen.

Simbu provinsel polis komanda Jimmy Onopia itok olsem polis ibin stap long dispela taim long lukim olsem ol Woks Dipatmen wokman i stretim rot na i nogat planti hevi i kamap.

Mista Onopia i tok moa olsem rot i bin pas long las wik Fraidei na Sarere tasol i op gen long Sande apinun aninit long was bilong polis. Wok bilong dispela rot bai go het yet long dispela wik na polis bai stap long mekim sua nogat trabel i kamap.

Deputi Gavana bilong Simbu, Yaldrua Kelaga i tok moa olsem long 2003, sem samting i bin kamap long sem rot long Hailans haiwe na ol Narku papagraun bin askim long kompensesen na gavman bin givim ol K300, 000.

Gavana Kelaga i tok olsem em wanpela longlong samting stret long ol i askim ken long kompensesen long dispela sem rot taim gavman i bin bai ol pinis.

INTENEL Sekyuriti Minista Bire Kimisopa i salensim ol manmeri long Kwonggi na ol arapela ples insait long Isten Hailans provins long givim graun bilong ol long ol arapela lain famili bilong ol sapos ol i ting ol bai no inap mekim wok long en.

Mista kimisopa i bin mekim dispela toktok las wik Fraide antap long maunten bilong Kwonggi taim em i opim Uwoku Kopi Developmen projek. Dispela projek developmen em hap bikpela developmen projek bitong Sihereni Kopi Projek insait long Kongi-Miruma eria long apa Daulo eria long Isten Hailans provins.

Dispela projek em wanpela gutpela piksa tru insait long PNG na Hailans rijen bikos ol papagraun long kwonggi i laikim developmen long kamap long ples bilong ol na i givim graun mak bilong en i moa long 80 hekta long wanpela tokol kampani Sihereni long karimaut wanpela bikpela kopi developmen.

Ol papagraun yet i bin halivim na wok hat tru na planim nupela kopi insait long wanpela hap antap long maunten em bipo ol tumbuna bilong ol i save pait kros na kilim ol yet long

en. Dispela wok developmen long Uwoku i bin lukim tu ol birua bilong bipo i lus tingting long kros pait namel long ol yet na i wok bung wantaim long kirapim dispela projek.

Dispela Uwoku Kopi developmen projek i bin pulim planti manmeri tru. Sampela lain bilong Agro-Nuklius Entaprais long Mosbi, opis bilong Isten Hailans Gavana, Daulo distrik etministreta Ipaie Maniha na tu Isten Hailans provinsel Polis Komanda Philip Solala i bin stap.

Mista Kimisopa husat i go olsem wanpela spesel gest long dispela lonsing i givim bikpela salens tru long ol manmeri bilong Kwonggi na Miruma. Em i tokim ol tu olsem mani em i stap long graun sapos yu wok hat long graun.

"Sapos yu wanpela hap ain na yu holim yet graun em orait. Tasol sapos yu no ain na yu no mekim wok long developim graun bilong yu bikos yu gat bikpela les pasin orait moabeta yu givim long wanpela brata husat i ken mekim gutpela wok developmen long en," Minista Kimisopa i tok.

Mista Kimisopa i tok wanem kain gutpela sindaun bai kamap long ol pikinini bilong yumi na ol tumbuna bihain sapos yumi holim yet graun na i no mekim wanpela gutpela kain



• Ol pipel bilong Sihereni i stretim mumu bilong bikpela kaikai.

developmen long en. "Dispela kantri bilong yumi PNG i nidim narapela moa 10 o 20-pela kain man olsem David Oromarie husat i gat bikpela tingting long ikonmik developmen long ples bilong em na i mekim gutpela wok long dispela hap," Mista Kimisopa i tok. Suprintenden Solala i sapatim tok-

tok bilong Mista Kimisopa na tok olsem planti graun insait long Isten Hailans i no develop yet long wanem ol manmeri i soim planti les pasin tumas. "Taim olgeta manmeri i wok long graun na lukim mani i kam long dispela hatwok bilong ol long graun, kantri bilong yumi bai nogat planti hevi bilong lo na oda," em i tok.

Sauten Hailans i ken harim Wantok Redio Lait

OL manmeri i stap long Kaupena long Sauten Hailans provins i ken harim Wantok Redio Lait long mak bilong FM redio stesen ben 93.3 bihan long Papua Niugini Redio Brokastin Netwok o PNGCBN.

Menesing Dairekta Pawa Warena i tok aut las wik long opisal lonsing bilong dispela radio stesen.

Mista Warena i tok olsem PNGCBN i stap nau long kantri, long wanem em i bin wanpela driman bilong tupela man bilong sios em Reveren Gerald Bustin

bilong Evenjelikol Baibel Misin Intanesenel wantaim Reveren Mondopa Mini bilong PNG Baibel Sios long lukim olgeta man i harim tok bilong God.

Mista Warena i tok moa olsem driman bilong dispela tupela man em long lukim ol man i autim tok bilong Jisas long ol manmeri.

Em i tok olsem astingting bilong Wantok Radio Lait em long yusim ol elektronik komyunikesen midia o ol masin iwok long pawa long tokaut long dispela gutnius bilong Kraiss.

Mista Warena i tok long wankain taim tu, bai dispela redio stesen i toktok long ol bikpela hevi we i wok long stap insait long kantri na tu insait long wanwan sios, misin ogenesisesen, NGO na ol gavman opis.

Em i tok moa olsem Wantok Redio Lait bai yusim tripela ripita stesen o hap bilong kisim signal em long lalibu, Goroka na Lae long kisim signal.

Opisel opening bilong Wantok Redio Lait bai kamap long dispela Sarere.

Ol Kurumul meri kisim skul long somap

WANPELA ogensaisesen insait long Hagen i wok long skulim na trenim ol meri long lainim long somapim ol klos bilong ol meri.

Dispela ogensaisesen, Faudesen bilong Rurel Developmen Inc o Ford Inc i wok long lainim ol mama long Kurumul eria long Westen Hailans provins long somapim ol dres na klos nabaut bilong ol meri olsem wanpela wei long ol i ken salim na kisim sampela mani.

Long pasim dispela wan wik woksop, progrem menesa bilong Ford Andreas Pu'u i tok

olsem dispela ogensaisesen i kisim dispela tingting long ronim kain woksop bilong ol mama long wanem ol i lukim olsem planti mama nogat dispela kain save olsem na ol i save stap nating.

Mista Pu'u i tok moa long 20-pela meri i bin kam long dispela woksop na planti bilong dispela meri em ol i kam long ples na nogat kain save long somapim ol klos.

Em i tok olsem as tingting bilong dispela program en long trenim na skulim ol meri long lainim ol samting we i ken helpim ol.

The All-New

TOYOTA

HIACE

- Bigger 3.0 litre Diesel engine
- Standard LWB 15 seater & Hi-Roof LWB 16 seater.
- AM/FM Radio cassette
- Airconditioning (Optional)
- Power steering
- Stability and comfort
- Most popular vehicle in it's class

Instrument Panel Mounted Gearshift

Open the front Panel

Mechanical Lock Type slide door

SRS Air Bags (Optional)

Ela Motors

TOYOTA

TOYOTA TSUSHO (PNG) LTD.
www.elamotors.com.pg

Now Available Nationwide

For More Information Contact: Port Moresby Ph 3229400 Fax 3217268 or Lae Ph 4781800 Fax 4722463

Ol yut i go pas long gutpela wok

Baruni Spesel Yut Grup i go pas long lukautim Lo na Oda

OL YUT bilong ples Baruni insait long Pot Mosbi nau i wok long go pas long strongim lo na oda long ol ples we i save gat trabel bipo.

Ol i kolim ol yet Baruni Spesel Yut Grup na samting olsem moa long 60 yut i save wok bung na klinim raunim ples bilong ol, sait bilong rot. Ol i save mekim wok bilong ol long kisim liklik mani.

"I gat planti yangpela i tingting long kam wok bung wantaim mipela na planti moa i wok long kam. Salens bilong mipela nau em long strongim dispela wok," Komyuniti Lida Temo Ely i tok.

Em i givim luksave long Sosesel Divisen bilong Nesanel Kapitel Distrik Komisnin (NCDC) long givim kontrak wok long ol yut.

"Inap long tupela wik, i nogat wanpela hevi bilong lo na oda i kamap. Na namba wan taim long hia i nogat bikpela pairap long nait. Em i gutpela samting tru," Ely i tok.

Tupela yut lida, Kennedy Fred na Tuari Lama i tok ol i amamas long dispela sans.

"Sapos mipela i no mekim dispela wok, bai mipela i mekim ol raskol pasin na karim bikpela hevi. Dispela program i no bungim mipela tasol, mipela i ken lukim olsem wok mipela i mekim i wok long karim gutpela kaikai," Oki i tok.

Em i tok dispela grup i save singaut long ol arapela yut long lusim ol samting nogut olsem hombru na mariwana o spak brus.

"Mipela i gat bilip long dispela projek. Mipela i save toktok long ol arapela yut, na givim tok lukaut olsem mipela i laikim dispela projek long wok. Ol i mas helpim mipela o kontrak ya bai lus. Mipela i stat pinis na mipelai gat tingting long go het yet.

Ol meri na ol ples manmeri i givim sapot bilong ol long dispela projek pinis.

"Ol i senis tu na em i gutpela long lukim ol pikinini man bilong mi i wok wantaim ol. Tupela wantaim em ol yangpela manki na mi lukim olsem ol i kisim gutpela kaikai long en," wanpela strongpela sapota Tarata Iduhu i tok.

Wanpela bikpela sapota na mama, Madia Ohaha i tok olsem dispela program i kirapim skin bilong ol yut.

"Ol i gat bikpela bilip tru long dispela samting. Na em i bikpela samting long ol long go pas long dispela program," em i tok.

Bikpela as tingting bilong dispela program em long strongim ol pastaim long ol i go mekim wok agrikalsa, skils trening na pilai spots.

Nau grup i redi long rejistaim asosiesen bilong ol na opim wanpela benk akaun.

"Mipela i lukluk long strongim mipela yet. Taim ol yut i redi long muv i go long namba tu level, bai ol i go," Mista Ely i tok.



• Ol yut bilong Baruni vilesi klinim baret long bikpela mein haiwe bilong ol. Wok bilong lukautim lo na oda i strong moa insait long Baruni viles.

Salvesen Ami gat nupela lida

Veronica Hatutasi i raitim

SAVESEN Ami Sios long PNG i bin makim wanpela bikpela de long histri bilong sios tas wik Sande long luksave long nambawan sios lida bilong ol insait long 49 yia sios i karimaut wok bilong em long PNG.

Kenel Andrew Kalai bai go pas nau long Salvesen Ami Sios long moa long 10,000 sios memba long PNG. Meri bilong em Kenel Julie Kalai bai wok wantaim em na em bai go pas long Ministri bilong ol Meri na Famili.

Kenel Kalai i kisim ples bilong Kenel Trevor Tuck na misis bilong em Kenel Memory Tuck bilong Saut Africa husat i bin go pas long Salvesen Ami Sios long PNG inap tok save i kamap long dispela samting.

Kenel Kalai em i bilong ples Kalo long Sentrel Provins. Meri bilong em i bilong Boregaina long Rigo eria insait long Sentrel provins. Tupela i kam bek tasol long Ingran we ol bin wok long 9-pela mun na Kenel Kalai i bin holim wok olsem Asisten Seketeri bilong Yunaitet Kindom Teritori, we i gat bikpela mak bilong ol sios memba long wol. Kenel Julie i bin wok wantaim Ministri bilong ol meri long Ingran.

Kenel Kalai em i gat luksave long sios bilong em na tu long ol arapela sios long PNG olsem wanpela strongpela na gutpela lida. Em i save makim Salvesen Ami, ol arapela sios na kantri long planti sios, Yunaitet Nesens na humen raits na sosesel isu bung ovasis. Intenesenel lida bilong salvesen Ami Jenerel John Larson i bin makim Kenel Kalai olsem

Komanda bilong Salvesen Ami sios long PNG Teritori na em i kamap olsem namba wan asples PNG long holim dispela wok long histri bilong sios long kantri long 49 yias.

Ol sios memba long Pot Mosbi i bin bung long Salvesen Ami sios long Boroko long lukim Kenel Andrew an Julie Kalai i kisim opisel blesing na luksave long ksik wok bilong ol.

Ol spika i bin tok amamas na luksave long gutpela lidasip we Kenel Kalai i gat na ol i bilip olsem em bai givim gutpela stia long sios long PNG.

Modereta bilong Yunaitet Sios Reveren Samson Lowa na Jenerel Seketeri bilong PNG kaunsel ov Sios Tom Anayabere i bin makim maus bilong ol Kristen Sios long dispela bikpela de.

Taim Modereta Lowa i autim tok amamas bilong ol sios i go long Kenel Kalai, em bin tok, "kantri i kisim blesing long ol kain asples PNG lida olsem yu long kisim dispela bikpela wok long go aps long sios. Yu wanpela bikpela na gutpela lida husat i gat luksave long PNG, sios na yu sanap olsem wanpela wol lida," Reveren Lowa i bin tok.

Long toktok bilong em, Kenel Kalai i bin tok tenkyu long luksave we ol bikman bilong sios i bin givim em na makim em long wok bilong go pas long Salvesen Ami long PNG.

Em bin tok tenkyu tu long ol sios memba long sapot bilong ol na tok em i gat bikpela salens long karimaut dispela wok tasol wantaim sapot bilong ol pipel na Bikman antap, em bai karimaut wok bilong em.

Tripela man Tubuserea kisim 52 krismas

Paulias Tali i raitim

TRIPLETA man long ples Tubuserea husat i bin mekim pasin nogut long wanpela yangpela meri wantok bilong ol i bin kisim mekimsave inap long 52 krismas.

Las wik fraide, Nesanel Kot long Waigani painim olsem Richard Tiki, i mekim asua.

Waini Maing, na Biai Mavaru, tupela wantaim i gat 23 krismas we tupela i bin haitim

tok long kot. Tiki em marit na papa bilong wanpela pikinini. Nesanel Kot i painim em mekim rong na givim em 16 krismas kalabus.

Tupela arapela Mavuru na Maing, tupela wantaim i no marit. Tupela kisim 18 krismas kalabus.

Jastis Don Sawong i bin harim kot na i tokim ol olsem ol i mekim asua pinis na ol bai go kalabus wantaim hat leba.

Kot i harim olsem long 2004, long moning taim, wanpela yangpela meri wantaim boi pren bilong em i bin sindaun long ples we ol kar i save stap long en na dispela tripela man i bin spak i kam. Tiki i bin kam na pulim boi pren bilong meri ya na Maing na Mavuru i bin pulim yanpela meri i go long bus na mekim pasin nogut long em.

Bithain Tiki i kam na mekim pasin nogut long meri ya tu.



BANK OF PAPUA NEW GUINEA

PRESS RELEASE KINA FACILITY RATE FOR JUNE 2005

The public is advised that based on the assessment of the key macroeconomic indicators available to the Bank of Papua New Guinea, the Kina Facility Rate (KFR) will remained unchanged at 7.00 percent for the month of June 2005.

L Wilson Kamit, CBE
Governor

Raun lukim ol meri na pikinini



• Tupela pikinini Manus i no isi long soim kain stall tumbuna danis bilong ol Manus yet. Dispela kain danis na paitim garamut bilong ol Manus i gat kik stret ya! Foto: VERONICA HATUTASI



• Moa long danis bilong ol Manus dispela ol pikinini i no isi long em.



• Ol skul manki bilong bilong Hahela Praimeri skul long Buka i bilasim ol gut stret na redi long amamasim win long ol nupela lida long Bogenvil Otnomes Gavman. Foto: ALOYSIUS LAUKAI



• Ol meri Bogenvil i bin mekim bikipela wok long Otonomes Ileksen na hia, ol i helpim Joel Banam i bin resis long presiden sla i vot. Foto: ALOYSIUS LAUKAI

Gan i mas raus

....Meri na pikinini egensim tru

WANKAIN toktok i kamap long ol meri na long PNG na ol arapela hap bilong wol olsem gan i mas raus long komyuniti na kantri. Na bikipela mekim save i mas go long ol lain i holim na yusim gan i stap.

Long PNG, Gan Komiti i wok long raun long wan wan rijen long PNG long kisim tingting long ol pipel long hevi bilong gan.

Ol meri, ol mama na ol

pikinini i egensim tru pasin bilong yusim gan insait long kantri long wanem dispela i bagarapim gutpela sindaun long famili, viles, komyuniti, sosaiti na kantri. Moa yet, ol meri na pikinini i save stap wantaim bikipela pret.

Ol i nogat fridom long muv o i go long ol hap we ol i laik go olsem long gaden long kari-maut wok bilong ol.

Na tu, ol i karim bikipela hevi long wanem ol i tusim ol papa

bilong ol na man husat i save wok na lukautim famili.

Long wankain taim tu, pasin long wokim pasin pait egensim meri o paitim na mekim nogut meri i save kamap moa yet taim sampela man i holim gan long mekim ol meri long slip wantaim ol.

Na planti taim, ol man i save yusim tu gan long repim o bagarapim ol meri.

Wankain toktok na singaut long rausim ol gan olgeta long

sosaiti na givim bikipela mekim save we i go moa yet long kilim dai ol lain i holim gan i kamap long ol meri long olgeta rijen Gan Komiti i raun long em., stat yet long Hailans, Sauten, Momase na Ailans rijen.

Planti ol skul pikinini tu i bin givim tingting bilong ol na autim tingting olsem ol i no laik groap long sosaiti we i gat gan na gan i bosim.

Ol lida na atoriti i mas harim strongpela toktok i kam long ol meri, pikinini na komyuniti na wokim samting.

Neiba bilong PNG em Solomon Allan i bin stap long hevi na pait na taim dispela samting i kamap, pasin bilong fosim na bagarapim meri tu i bin kamap.

Sampela ol paitman i wokim dispela tai mol i holim ol gan. Ol i sutim tok long sampela polisman tu i wokim dispela pasin.

"Mi bin gat 14 krismas na wanpela polisman i bin kam wanpela nait, samting olsem 10 kilok, na em i poinim gan long mi na odaim mi long bih-hainim em long lukim ol nara-pela man.

Komanda i poinim gan long mi na repim mi. Mi bin pilim pen na lusim blut tu," Amnesti Intenesenel i bin kisim ripot long toktok wantaim ol meri Solomon long dispela yia.



• Ol yangpela meri sumating bilong Solomons Ailan i soim strong olsem ol gan i noken stap long sosaiti bilong ol. Foto: AMNESTY INTERNATIONAL

Lo bilong lukautim ol pikinini



Pat 6-Atikel 7

OL Stet pati bai wokim olgeta samting bilong rausim pasin bilong rabisim ol meri long politikel na pablik laip insait long kantri. Moa yet, ol i mas lukim olsem ol meri na man i mas stap long sem level na i gat wankain rait long: vot long olgeta ileksen na ol i sanap resis long ol ileksen i go long ol pablik bodi, i mas stap insait long wok bilong kamapim ol gavman polisi na go hetim ol, holim pablik opis o wok long olgeta level bilong gavman na go insait long wok bilong ol Non Gavman Ogenaisesen na asosiesen we i gat tingting long pablik na politikel laip bilong kantri.

Ol toktok i kam long liklik buk ol i kolim CEDAW we Pasifik Rijnol Human Raits Edukesen risos Tim i redim.

Sotpela Tok Lukaut Skruim toktok long HIV/AIDS. Kirap Nogut

Maski yu redim yu yet gut, yu bai kirap nogut stret taim yu painimaut olsem yu gat HIV o AIDS.

Yu bai inap paul na i no save bai yu mekim wanem samting. I moabeta long yu stap wantaim wanpela man o meri husat yu givim gutpela luk-save long em long dispela kain taim.

Tingting bilong ol manmeri i gat HIV/AIDS i ken senis klostu klostu. Wanpela de ol bai pilim olsem nogat man i laikim ol na ol bai stap sore olsem ol i wanpis. Narapela de ol bai pilim gutpela. Dispela i save kamap olgeta taim.

Bai yupela i ritim sampela moa long ol kain tingting ol manmeri i gat HIV/AIDS i save gat long en.

Ol toktok i kam long liklik buk ol i kolim "Living with HIV/AIDS, A Guide for self care and positive Living" National AIDS Council i redim.



Kuk Kona wantaim MERI WANTOK

Kuka na Taro long stail bilong ol Hula

Yu mas i Gat:

- 1-pela bikipela kuka
- 1-pela mekpas spring anien
- 1-paun fres toma-to
- 1-pela mekpas kru pamkin
- 1-pela bikipela taro o tapioka o singapo
- 2-pela drai kokonas long kisim kokonas milk long ol Lemon juis

We long Kukim:

- 1-Larim wara i boil na kukim kua long

em. Taim em i kuk, rausim olgeta mit.

2-Klinim, wasim na katim anien, tomato na kru pamkin.

3-Putim kuka mit, anien na kru pamkin yu katim na tomato insait long sospen na kapsaitim kokonas milk i go insait. Karamapim sospen.

Putim sol na wara bilong lemon o muli.

4-Kukim antap long stov o paia we i no tuhat tumas long 20 o 30 minit

5- Sevim wantaim taro

TOKTOK NATING

Wantaim
Fr. Paul Liwun SVD



LONG wanpela de wanpela nupela peris pater i wokabaut insait long peris bilong em long lukim ol famili na manmeri bilong komyniti bilong em. Namba wan famili em i bin bungim long dispela de, em i wanpela man bilong wokim su (Shoe maker).

Pater i go insait long haus na woksop bilong dispela man bilong wokim su na stori wantaim em. Insait long toktok bilong ol, sampela taim pater i bin yusim bikpela toktok bilong tioloji.

Man bilong mekim su tu i no stap isi.

Em tu i serim planti gutpela spiritual tingting bilong em. Taim Pater i harim i stap, em i kirap nogut tru olsem wanpela liklik man bilong wokim su, tasol em i gat gutpela spiritual tingting bilong em. Olsem na Pater i tokim em:

"Yu gat planti gutpela tingting na stret-pela save. Wankain man olsem yu i kisim dispela wok olsem man bilong wokim su? Dispela wok em i rabis tumas long yu.

Yu mas i gat narapela kain wok i gutpela moa o winim dispela wok olsem man bilong wokim su. Dispela wok em i rabis tumas long yu, husat i gat gutpela na waispela tingting o tingting olsem nau yu serim wantaim mi".

Taim man bilong wokim su i harim Pater i mekim dispela toktok; em i apim het bilong em na lukluk strong long pes Pater na i tok: "Pater, moabeta nau tasol, yu mas kisim bek toktok bilong yu".

"Kisim bek wanem kain tok?", Pater i askim.

Man bilong wokim su i askim em, "Yu mas pulim bek toktok bilong yu olsem wok bilong mekim su em i wanpela rabis wok na nogat namba".

Wantaim belhat long bel bilong em, man bilong mekim su i bin tokim Pater moa olsem: "Pater! Yu lukim tupela su i stap antap long tebol?"

Papa bilong dispela su em i pikinini man bilong Mista Smith, man bilong em i bin dai las yia. Mista Smith em i wanpela wok-boi nating.

Taim em i dai, pikinini boi bilong em i bin kisim wok bilong Mista Smith long mekim ol rabis wok insait long taun. Na em i save wok olgeta de long san na long kol wantaim.

Sapos mi save olsem taim bilong ren na kol i kamap, mi bin harim God i askim mi, "Inap yu wokim sampela su bilong pikinini man bilong Mista Smith na givim long em, bai em i ken werim long taim bilong ren na em bai i no pilim kol taim em i mekim wok bilong em long bungim ol pipia insait long siti bilong yumi. Long dispela we yu bai helpim em i no inap long kisim sik".

Man bilong mekim su i tok moa: "Taim mi harim singaut bilong God long mekim dispela wok, mi bin tokim God olsem, "Yes Lod, mi bai wokim su bilong em.

Man bilong wokim su i lukluk gen long pes bilong Pater na i tok, "Pater, mi bilip olsem nau yu givim homili wantaim helpim bilong God".

Mi tu, wantaim helpim bilong God mi wokim su bilong pikinini bilong Mista Smith.

Wapela de bihain, taim papa bilong gaden i singautim yumi i kam long em, em bai tokim mi olsem: "Kam, yu gutpela na stretpela pikinini".

Olgeta wok yumi mekim olgeta de long kamapim gutpela sindaun long famili na komyniti bilong yumi, em i gutpela wok.

Maski em i rabis wok o klinpela wok... tasol olgeta i bilong onaim nem bilong God, em i gutpela wok. Olsem na noken skelim na daunim narapela long wok ol i mekim.

Anglikea mekim bikpela HIV/AIDS aweanes

....Sen John Ambalens lain greduet

Veronica Hatutasi i raitim

ANGLIKEA Stop AIDS em i han bilong Angliken Sios we i mekim bikpela wok long karimaut wok aweanes bilong Edukesen i go long pablik long kantri long daunim HIV/AIDS insait long PNG.

Na bikos dispela sik i kamap bikpela tru long ol yangpela manmeri, i gutpela long ol wanlain bilong ol yet i karim ol aweanes toktok i go long ol.

Olsem na Anglikea i givim trening pinis long moa long 1,000 yangpela manmeri long go aut na givim ol aweanes toktok long rot we sik HIV/AIDS i kamap long en, rot we ol manmeri i ken abrusim, wanem samting yu ken mekim sapos yu gat dispela sik na moa gutpela toksave.

Em i moabeta long karimaut ol aweanes toktok long dispela samting long ol "pia group" o grup i gat wankain laik olsem ol yangpela skul sumatin, ol lain wan lotu, ol meri na yut grup bikos bai ol dispela lain i

ken kisim strong mesej taim ol wanlain yet i autim.

Long Fraide las wik, 33 yangpela man na meri bilong Sen John's Ambalens i bin kisim ol setifiket pepa bihain long pinisim tripela wik "Peer Education" trening woksop we ol bin holim long hap bilong ol Anglikea long Waigani.

Deputi Dairekta Dominica Abo i tok insait long tripela wik, ol trena i bin lainim na kisim moa save long Besik HIV/AIDS o ol samting we manmeri i mas save long dispela sik, jenda o samting i karamapim man na meri, yusim nogut ol drag na alkohol, ol sik STI (Seksueli Trensmitit Infeksen) o ol sik ol manmeri i kisim taim ol i bikhet nabaut na slip wantaim planti patna. O man i slip wantaim planti patna na givim sik long meri bilong em.

Trena Helen Haro bilong Anglikea yet i bin karimaut dispela trening woksop long ol yangpela bilong Sen John Ambalens na tupela woklain bilong Stimsips Treding kampani.

Misis Abo i tok planti ol lain i kam long kisim trening em long lain long ol setelmen, ol grasrut, ol lain i stap nating na ol yut. Antap long save ol lain i kisim long HIV/AIDS, ol i kisim save tu long ol drag na alkohol na rot we tupela i kontribut i go long ol man i kisim HIV/AIDS.

Misis Abo i tok ol trena na presenta bilong ol i karimaut ol edukesen aweanes wok long planti ol bisnis haus na gavman dipatmen.

Ol praivet kampani na bisnis haus yet i save askim ol (Anglikea) long go karimaut ol edukesen aweanes na trening long woklain bilong ol, Misis Abo i tok.

Wanpela piksa em i givim em Pac Rim kampani we i gat ol welpam plantesen long Milens Be, Oro na Nu Ailan provins i toktok wantaim ol long go long ol hap we ol plantesen i stap long ol na givim aweanes na kanseling trening i go long ol helt woka long ol klinik bilong ol. Long dispela rot, ol ken helpim ol woklain bilong ol, Misis Abo i tok.

Ol Katolik fainens opisa sindaun long woksop

OL Sios i save mekim bikpela wok long helpim ol wok go het long kantri tasol wantaim ol kain senis na nupela samting long wok teknologi i kamap, ol woklain bilong em i mas kisim trening na ol i ken mekim gut wok bilong ol.

Olsem na insait long tupela wik, ol Fainens woklain bilong ol Katolik Daiosis long 19-pela provins long kantri i sindaun long tupela fainens woksop long Pot Mosbi.

Long namba wan woksop we bai i pinis tumora Fraide, 18-pela manmeri i save lukautim ol fainens bilong ol wanwan daiosis we i salim ol i kam i bin lainim save long yusim MYOB sofwea program long kamapim gut fainens menesmen wok na save bilong ol na moa yet, long sait bilong peirol sistem.

Ol lain i sindaun long kos em ol i wok long akaun seksen bilong ol daiosisen skul, helt sevis, seminar na opis bilong daiosis yet.

Ol wan wan bisop bilong ol i bin makim na stretim rot bilong ol long kam sindaun long kos.

Long neks wik, nupela lain gen bai sindaun long etvens kos. Em ol dispela i gat save pinis long yusim program tasol ol i laik skruim save na wok moa yet.

Trening program i kam aninit long AusAID Sios Patnasip Program (CPP) we ol bin lonsim long las yia long mun Septemba.

Aninit long dispela program, 7-pela Sios insait long kantri i kisim helpim mani long helpim karimaut ol sosel sevis na developmen program olsem long eria bilong helt,

Edukesen, HIV/AIDS na moa. Sevenpela sios em long Angliken, Katolik, Yunaitet, Luteran, Seven De Ewentis, Salvesen Ami na Baptis.

Kodineta bilong Katolik Sios AusAID Sios Patnasip Program Briony Menchin ito rot we dispela patnasip i wok em AusAID na Caritas Australia (Ogenaisesen bilong sios i save givim helpim) i save putim mani i kam long Sios Patnasip Program long karimaut ol wok we ol sios i plenim long em.

Long ol kos, Mis Menchin i tok sapos ol narapela sios i laik salim ol lain bilong ol long woksop we wanpela i ranim, em i orait.

Long dispela tupela kos we ol fainens opisa bilong Katolik Sios i sindaun long em, tupela savaman, we wanpela i bilong bilong Baptis Sios long Australia, i givim trening.

Em long Frank Whittaker na David



• Tupela trena em Frank Whittaker na David Kenny.
Foto: VERONICA HATUTASI

Kenny i wok wantaim Courage International long Australia we i save save helpim ol oge-naisesen long ol tet wol kantri o ol developim ol risos bilong ol long gutpela rot long helpim komyniti.

Tupela i bin tokim Wantok olsem trening we ol i givim i no bilong lainim long mekim samting tasol i bilong save gut na strongim tingting long glasim na skelim gut ol samting long wankain taim.

Bai i gat moa trening kos gen aninit long Sios patnasip program long mun Oktoba long dispela yia.



LITIMAPIM NEM BILONG GOD

Mi bin beten long Bikpela bai em i helpim mi, na em i harim prea bilong mi. Em i tekewe olgeta pret long bel bilong mi, na nau mi stap bel isi. Olgeta manmeri i gat hevi, tasol ol i bilip long Bikpela, ol i save amamas. Olsem na bilip bilong ol i no bagarap. Ol rabisman i prea long Bikpela na em i harim prea bilong ol, na i helpim ol long olgeta hevi bilong ol. Ensel bilong Bikpela i save stap klostu long ol manmeri i aninit long Bikpela, na em i save helpim ol bai ol i no kisim bagarap. Bikpela i save mekim gutpela pasin long yumi. Yupela yet i mas traim na lukim na bai yupela i save olsem Bikpela i gutpela tru. Man i save bilip tru long Bikpela, em i ken i stap belgut tru.

BUK SONG 34: 4-8

Infrastraksa gaitlain bilong ol skul

TAIM skul i gat gupela ples long skul long em na i gat inap samting we ol sumatin i ken kisim gupela lainim, em bai helpim gut ol long skul gut na tu, skruim save bilong ol, Ekting Edukesen Seketeri Joseph Pagelio i tok.

Em i wokim dispela toktok long opim bilong "Nesanel Infrastraksa Gaidlain" (NIG) bilong ol Praimeri na Komyuniti skul insait long kantri.

Infrastraksa bilong ol skul

em ol skul samting olsem ol klasrum, ol haus bilong ol tisa na ol arapela skul na wara saplai samting.

Dokta Pagelio i tok em i wok bilong Nesanel Edukesen Dipatmen long givim teknikal etvais o stia tok na makim na was long mak na strong bilong edukesen we i karamapim tu ol skul samting (infrastruktur).

Dokta Pagelio i tok AusAID i bin sapatim long kamapim dispela NIG aninit long Besik Edukesen Developmen Projek.

Projek bai i ron long 4-pela yia na bikpela as tingting em long helpim ol skul i kamapim ol skul mentenens na developmen plen wantaim helpim bilong ol edukesen atoriti, Dokta Pagelio i tok.

Ol stekholda o ol lain i patna wantaim edukesen Dipatmen long karimaut dispela wok em long ol skul komyuniti, praivet sekta, ol sios, Ol Non Gavman Ogenaisesen (NGO), provin-sel na nesanel level gavman.

Ol dispela lain i bin kontribi-ut o putim tingting bilong ol

long kamapim dispela gaidlain insait long ol woksop we ol bin holim long las yia.

Dispela gaidlain o stia i mekim klia wok bilong ol patna long givim besik edukesen sevis. Ogenik Lo i mekim ol Skul Bot Menesmen na ol Lokol Level Gavman olsem em i wok bilong ol long sanapim ol bilding na tu, kari-maut ol wok mentenens bilong ol skul bilding na klasrum insait long ol wan wan skul.



DEPARTMENT OF EDUCATION STAFF DEVELOPMENT UNIT

Date: May 23, 2005
File: SD2-5-1

EXPRESSIONS OF INTEREST FOR TEACHER QUALIFICATION UPGRADING PROGRAMS (PGDE AND DIPLOMA IN TEACHING) IN 2005.

Expressions of Interest are sought from Provisionally Registered Teachers teaching in the National Education System (NES) to be considered for Postgraduate Diploma in Education (PGDE) and Diploma in Teaching through the Teacher Qualification Upgrading program in 2005.

The following information are required for each interested applicant.

1. Full Name (as on certificates):
2. Gender: M/F:
3. Date of Birth:
4. File No:
5. School:
6. District (where school is located):
7. Province:
8. School's Postal Address:
9. School Phone: Fax:
10. Nearest Airport to school:
11. Name of Airline:
12. Mode of travel (to nearest airport) & one way fare:
13. Highest Educational Qualification Achieved:
14. No. of years teaching experience:
15. Current Teaching Position No:
16. Grades Currently Teaching:
17. Subjects Currently Teaching:
18. Approval and signatures for:
 - a) Institution/School Head: Name: Signature: Date:
 - b) Respective Inspector: Name: Signature: Date:
 - c) AS/PEA (PEB): Name: Signature: Date:

NOTES:

1. NO APPLICATIONS WILL BE ACCEPTED WITHOUT THE APPROVAL FROM THE ABOVE.
2. IF YOU ARE A TRAINED TEACHER, DO NOT APPLY FOR THIS PROGRAM
3. IF YOU ARE A CASUAL OR AN ANCILLIARY STAFF, DO NOT APPLY FOR THIS PROGRAM

Attach relevant educational qualifications, academic transcripts, Provisional Registration Certificates together with recent inspection reports and other supporting documents with your expressions of interest.

Completed Applications should be forwarded to Superintendent Staff Development Unit, Department of Education, P.O. Box 446, Waigani, NCD. All applications should reach Staff Development Unit by close of business on Friday July 15, 2005.


IMPORTANT: APPLICATIONS ARE TO BE FORWARDED BY POSTAL MAIL ONLY.
DO NOT SEND ANY APPLICATIONS BY FAX AS FAX COPIES AT TIMES ARE NOT VERY CLEAR.

For further information contact Superintendent SDU or Mrs Shirley Maniot on 301 3383.


DR. JOSEPH PAGELIO
Acting Secretary for Education

Nius Bilong HIV AIDS

wantaim
David
Ephraim



HIV/AIDS! Bikpela hevi tru nau i wok long kamap insait long komyuniti bilong yumi. Ol pipel toktok strong tumas long gavman long go pas long givim mani long kamapim rot bilong daunim na rausim birua HIV/AIDS.

Tasol gavman i sot liklik long mani na ol risos long kamapim wok. Long dispela as na planti NGO na Dona Ejensi i wok long kirapim ol liklik wok bilong daunim dispela hevi.

Nau yet planti woksop i wok long kamap long kamapim polisi we ol manmeri i ken luksave na bihainim tasol insait long ol dispela polisi planti i no stret sotim ol helpim stret tingting bilong ol lain bilong yumi long ol ples.

Planti dispela i save kamap aninit long wok-painim aut bilong ol forenas o manmeri bilong arapela kantri.

Olsem ol i tok yumi wanpela pua o turangu kantri insait long Pasifik. Sapos yu lukluk gut poveti o nogat gupela sindaun em samting we i stap insait tasol long ol tingting bilong man, wankain tasol long HIV/AIDS, yumi mas stat toktok strong long ol pipel bilong yumi long traim kamapim rot long helpim ol yet.

Bikpela samting we yumi ol husat i save wok long ol bikpela NGO, gavman na praivet dipatmen i mas wokim em long mekim rot long helpim ol yet. Inap long wetim mani bilong ol dona ejensi na kamapim rot bilong yusim ol net-serot risos bilong yu we i ken helpim long bringim gupela winmani we i ken strongim ikonomi bilong yumi.

Taim ol manmeri i kamapim self rilains em nau yumi save insait long bun bilong yumi olsem kain hevi olsem HIV/AIDS em liklik samting tasol bikos pipel i save long lukautim ol yet!

Tok Lukaut

Long sampela wik i go pinis profesa Glen Mola i bin givim sampela tok skul na tokaut long wanpela samting we planti long yumi i no luksave o yumi i no save tingting tumas long en.

Em populesen o namba bilong ol manmeri bilong yumi. Tete yet yumi stap olsem 5.1 milien manmeri dispela em long 2000 senses tasol nau yet i luk olsem populesen i wok long go antap moa yet.

Na dispela i no kirapim gavman yet long luksave na sanapim o kamapim rot bilong strongim helt, edukesen na rot sevis bilong helpim kain bikpela populesen.

Planti taim yumi wok long wari tumas long HIV/AIDS, Korapsen na ol liklik samting nambaut tasol yumi no save stretim o tingting long populesen bilong yumi.

Profesa Mola em wanpela man husat i wok strong stret long kamapim rot we ol manmeri ken luksave na skelim gut famili inap long strong bilong ol. Nau yet planti manmeri i nogat wok bikos nogat wok i stap.

Olgeta yia moa long 80,000 pikinini i save kamaut long dispela edukesen system, olsem long 4000- 5000 manmeri tasol i save i gat wok na ol narapela em nogat.

Mi laik askim yu rida wanem tingting bilong yu long dispela? Taim nau bilong kamapim famili o pikinini long mak we yu nap long lukautim.

Populesen i go antap moa yet olsem tu HIV/AIDS, raskol pasin na korapsen wanem pasin na tingting bai yu wokim o soim long ol narapela generesen.

Tingim na skelim, HIV/AIDS stap pinis. Yu yet nau!



Salim ol pas i kam long WANTOK
NIUSPEPA: P.O.
Box 1982, Boroko
N.C.D 111
Fax: 325 2579
Email:
word@global.net.pg

Gavman i daunim ol grasrut pipel

Dia Edita

Mi gat sampela tingting i pas long ol lida man long palamen na husat i gat wok long lukautim ol opis na lukautim kantri wantaim.

Mi ritim planti nius tumas long korapsen o paol pasin ol lida man o biksot save mekim na dispela i save givim wari na sori i kam daun long mipela grasrut manmeri we mipela save painim hat tumas long pasin bilong sait bilong wok na sindaun gen stap gut.

Ol LIG bilong mipela tu i tok ol nogat mani, na provinsol gavman tu i nogat mani, na mipela nau bai mekim wanem tru long givim developmen long ol provins na senta na ol viles o ples bilong mipela wanwan?

Ol long nesenol gavman ol wok long mekim wanem tru na ol i no nap salim ol developmen mani bilong wanwan provins i kam bilong developim ol provins bilong ol?

Tupela memba bilong mipela - Open Memba na Gavana, tupela wok go kam long Pot Mosbi long ol miting - tupela i gat wanem kain luksave tru long nogat wok developmen long provins bilong tupela we olgeta hap long taun i bus tru long ol dispela gras ol kolim long Inglis 'Elephant Grass' na kunai tu i banisim tru taun olsem em banis bulumakau we ol kau redi long kaikai ol dispela gras.

Sapos yu kisim bas long ples balus na ron i kam long taun bai yu no nap lukim yet taun i stap we yu bai ting olsem taun i no yet.

Tasol bai yu kirap nogut draiva bai stopim bas na tok -welkam tu Lorengau taun.

Man, bai yu no bilip olsem em i taun. Nogat. Bai yu ting yus tap insait long wanpela plentesin o banis bilong ol kau na hos.

Ating long sampela kain rot i nogat mani long gavman bilong helpim developmen na givim sevis long ol pipel bilong mipela o olsem wanem - i go long yutu-

pela memba bilong mipela, bikos mipela wet tasol i stap long lukim yutupela mekim sampela wok nau.

Na long ol lain long ol bik opis na palamen, mi laik tok olsem, pasin yupela wok long mekim na paolim ol pablik mani na rait bilong ol pipel long yusim dispela ol mani long laik bilong yupela na pasin korap i wok long go bikpela moa.

Mi laik tok liklik olsem long yupela pasin nogut bilong yupela i save putim namel long yupela na mipela na namel bilong yupela na God tu.

Na dispela korap pasin bilong yupela i pasim ai bilogn God long kantri PNG, na em (God) no nap harim prea bilong yupela long palamen haus.

Bai mi tok long Inglis we i mekim tok sot i go olsem: Your hands are defiled with our blood, and your fingers with iniquity, your lips have spoken lies, your tongue hath muttered perversness.

None calleth for Justice, nor any pleadeth for truth. You trust in vanity, and speak lies, you conceive mischief, and bring forth corruption.

Your works are works of corruptness, and the act of violence is in your hands. Your feet run to evil corruption, and you make haste to cheat and steal from us, your thoughts are thoughts of evil corruption, wasting and destruction are in your mind always.

The way of peace and development ye knew not, there is no judgment in your goings.

You have taken what belongs to the people who have a right to, and your own corruptions are multiplied before you.

Your corruptions are with you and you yourselves knew them. God will judge you fully.

P.I.
LORENGAU
MANUS PROVINS

Stil pasin bikpela long kea senta

Dia Edita

Mi GAT sampela belhevi na mi laik autim dispela belhevi i go long Madang provinsol gavman.

Mi wanpela man mi save i go long Bogia na kam long Madang na wanpela taim mi bin i go long Bogia na mi kalap i go daun long ples Simbine.

Wanpela wiken mi lukim ol lain long kea senta i pulim lain i kam na i go bek gen long kea senta.

Ol i bin stilim planti samting olsem buai, gaden kaikai, kisim kulau,

katim diwai, kisim rop na planti moa.

Ol dispela samting ol i mekim wantaim i nogat gutpela toktok namel long ol papagraun na ol lain long kea senta. Dispela pasin i kamap long Asurambu, Posdam na long Mangem.

Nau yet mi ting gutpela long Madang gavman i mas painim wanpela graun we em i stap longwe long ol arapela ples we em bai putim olgeta Manam pipel long em, ol gavman i mas salim ol i go bek long ailan sapos paia i slek.

Bikos gavman bilong Madang i no bin traim long lukautim ol gut na tu tripela kea senta pasin bilong stil em bikpela long dispela 5-pela mun.

Na tu mipela ol bikples i no save stil olsem and tu ol papagraun na planti bikples lain i no laikim ol Manam long stap long ol kea senta.

Em tasol belhevi bilong mi. Husat i laik sapotim o agensim mi bai wanbel tasol.

JOHN J. PUPU
MADANG



Toksave: Sampela ol pas mipela i kisim i longpela tumas na i no givim spes long ol arapela pas, plis raitim pas liklik. Na tu putim nem na adres bilong yu long olgeta pas yu salim i kam, tenkyu. - Edita

Midel Ramu mas kamapim provins bilong em yet

Dia Edita

Mi wanpela pikinini Simbai insait long Kobon kaunsol eria. Mi bilong Ainongk ples mi stap namel long tokples Simbai na tokples Kobon boda insait long Madang provins.

Nau mi laik raitim dispela pas bilong sapotim brata Simon Bidik, em i tok long Midel Ramu mas i gat provins bilong em yet. Dispela pas i kamap long Wantok Niuspepa long Mei 5-11, 2005. Olsem na sapos yu wnapela Mid Ramu stap long sampela

hap bilong PNG ples sapotim dispela pas bilong mitupela Simon B. long wanem Mid Ramu populesen i wok long go antap tru olsem 80 o 90 tausen manmeri. Hamas yia i go pinis tasol Madang gavman i nogat luksave bilong en long Midel Ramu pipel.

Plantu manmeri long Simbai na Kobon ol i no lukim taun bilong ol Madang na idai. Nogat na nogat olgeta. Madang Gavana Mista James Yali, Madang provinsol gavman na Memba bilong Midel Ramu Ben Semri, ating

yupela lusim tingting pinis long Midel Ramu a? Traim na opim ai na lukluk long Midel Ramu nau. Madang gavman no ken bilasim nating nem Midel Ramu i stap long Madang. Nogat. Rausim Midel Ramu i kam ausait na bai mipela kamapim provins bilong mipela yet. Em tasol na yu husat Midel Ramu laik sapot plis rait tasol long Wantok na bai mi lukim. Tenkyu.

DANIEL B. UNAGEM
RABAUL
IS NU BRITEN
PROVINS

Kot disisen lukautim ol korap lida long kantri

Dia Edita

PLIS givim mi spes bai mi autim tingting bilong mi. Long mi yet, mi lukim olsem sapos ol ECP i wok yet insait long kantri bilong yumi bai i painim planti ol korap pasin bilong ol lida bilong yumi long long bikpela position Fainens Dipatmen i go daun long ol provinsol gav-

man tu olgeta olsem na hariap tru ol i rausim ol.

Em tasol husat i laik sapot o agensim yu welkam tasol.

BILL HUMANI
KIMBE
WES NU BRITEN PROVINS

Buk Baibel i no niuspepa

Dia Edita

Mi LAIK bekim pas bilong brata Kois Kaupa bilong Yonki. Brata Kois tenk yu long pas bilong yu. Mi amamas long ritim. I luk olsem yu i no ritim gut pas bilong mi. Taim Jisas i dai long diwai kros, dispela taim stret bikpela laplap long tempol i bruk antap na em i kamdaun. Dispela tok i stap long Mak 15:38 i no Matyu 15:38 olsem yu tok. Yu askim olsem, yu kisim dispela tok long wanem hap? Nau yu lukim long Mak 15:38. Mi no putim Matyu 15:38 olsem yu tok long en. Long teks Matyu 5:17-19 yu tok long en em i tru, em toktok bilong Jisas. Tasol bilong wanem Jisas mekim dispela tok? God i bin givim ol dispela lo long Moses bai tokim ol Israel long bihainim na taim Jisas i stap long dispela graun em bihainim lo tu. Tasol wanem samting mi toktok long en yu i no klia.

Mi i no save tok pisin bilong mi i no stret o yu i no ritim gut pas bilong mi. Dispela ol teks long Matyu 12:1-4, Mak 2:23-28, 3:1-6, Luk 6:1-11, Kolosians 2:16-23. Sapos yu ritim gut ol dispela teks bai yu klia long wanem samting mi traim long toktok. Narapela teks long Luk 20:45-47 na Matyu 23:1-12, Luk 18:9-14. Ol farasi na saveman bilong lo, ol i ting ol i moa yet long ol narapela manmeri bikos ol man bilong save long olgeta lo. Olsem na i no luksave long sin bilong ol yet. Lo i bin karamapim sin bilong ol. Olsem na planti taim Jisas traim long kiarim ol tasol ol tok agensim Jisas na ol birua gen long Jisas.

Brata Kois, mi i no traim long tok bak-sait long wanpela sios nogat tru. Dispela pas bilong mi yu bin lukim ya mi bin bekim pas bilong narapela brata husat i bin tok, ol Sande lotu bai i no inap i go long Heven bikos ol brukim lo bilong Sabat. Insait long 66 buk mi i no save lukim wanpela tok olsem i stap. Sapos i gat wanpela tok i stap, orait yu kam bek wantaim sapta na ves na bai mi klia. Nogut yumi i stap olsem ol farasi na saveman bilong lo na yumi lus long ples nogut. Brata Kois mi laikim yu ritim dispela teks i stap long buk Mak 12:28-34. Dispela em nambawan lo Jisas i givim.

Yumi toktok planti em i no gutpela yumi ritim Buk Baibel na askim God long kiarim yumi long mining bilong Baibel. Yumi noken ritim nating olsem niuspepa.

JOHN K. LUMBU
LAE
MORobe PROVINS

Ol gavman sevis we?

Dia Edita

Mi WANPELA pikinini ples long Mare ples eria insait long Wampar, Huon distrik long Morobe provins. Hia em namba tu taim bilong mi long kisim maus bilong pipel long Wampar na tokaut na rait i kam long Wantok Niuspepa long belwari bilong mipela i go long gavman.

Wari bilong mipela i olsem. 1975 Indipendens i kam inap nau long 2005 na 30 yia bilong yumi PNG long kisim independens. Tasol long mi, em mi stap yet long kolonial taim. Bikos mi no slip o sanap antap long sevis bilong yupela gavman. Yupela gavman i save amamasim independens long kaikai na spak long hotel nambaut. Plis inap yupela i amamas long givim sevis long mipela? Ol sevis olsem rot, wara, pawa, bris, skul, aid pos na narapela moa. Mi wok long krai long bel na tingting na prea long gavman long kain sevis olsem. Tasol i hat tru wanem taim bai mi kisim sevis bilong gavman?

EFANG JONAH
MARE LAS PLES
MORobe PROVINS



Sir Moi kamap angka bilong Nesenel Alaiens

BIHAIN long wanpela yia, Papua Niugini nau i gat nupela Deputi Praim Minista.

Man husat i kisim dispela wok em Sir Moi Avei, Minista bilong Petroleum na Eneji na Memba bilong Kairiku-Hiri long Sentral Provinces.

Sir Moi i kisim luksave bilong em long Gavana Jenerel Sir Paulias Matane long Mande dispela wik.

Bihain long Sir Paulias i gimim luksave bilong em, Sir Michael i tokim ol nius lain long Gavman Haus olsem Sir Moi em wanpela gutpela man long kisim dispela wok bikos em i gat save na eksperiens long wok politik na gavman.

Sir Michael tu i tok em i mas tilim gut politik bilong kantri olsem Mama Lo o Konsititusen i tok. Em i tok, Momase i gat Praim Minista, Ailans i gat Gavana Jenerel, Hailans i gat Spika bilong Palamen na Deputi Praim Minista i mas i go long Papua Rijen.

Sir Michael i abrusim sampela ol ples kla nem i kam aut long ol nius ripot olsem Oposisi Lida Peter O'Neill, PNG Pati Lida Lida Mekere Morauta, Yunitel Risoses Pati Lida Sam Akoitai na Pangu Pati lida Sir Rabbie Namaliu.



TOK PISIN
wantaim
PETER MAIME

Deputi Praim Minista i kamap bihain long Gavana bilong Morobe, Luther Wenge, i kisim Sir Michael i go long kot bai kot i glasim na mekim independen disisen bilong em, sapos Sir Michael i bihain Mama Lo bilong PNG, long kisim longpela taim long makim namba tu bilong em.

Las wik mi bin tok olsem dispela wok bilong Deputi Praim Minista bai go long draiva o bos kru bilong Nesenel Alaiens Pati (NA). Mi bin tok man bilong maunten husat i save long ron bilong kar. Praim Minista, Sir Michael, em man nambis na i save long ron bilong sip long solwara. Ol sip i gat kepten na ol kepten i save long ron bilong sip. Na em olsem lida bilong Nesenel Alaiens na Praim Minista, em kepten bilong pati bilong em na tu kepten bilong Nesenel Gavman.

Na tru tumas, ol sip i mas gat gutpela angka long strongim long taim bilong win na hai wara taim ol i sua, na Sir Michael i luksave olsem Sir Moi bai kamap gutpela angka bilong sip bilong em.

Las wik, mi tu bin tok Sir Michael i no tok aut yet long kantri olsem em bai ritai long politik. Em tu i no tok husat namel long 4-pela deputi bilong em bai kisim NA Pati i go long 2007 Nesenel Ilekse.

Ol 4-pela deputi bilong em em Treseri Minista Bart Philemon bilong Momase, Pablik Sevis Minista Sinai Brown i makim Ailans, Lens Minista Dokta Puka Temu i makim Papua rijen na Trensport na Sivil Aviesen Minista Don Poyle, bilong Hailans.

Na mi bin strongim tok bilong mi olsem Nesenel Ilekse bilong 2007 i kam klostu. Sapos yu papa bilong wanpela politikel pati bai yu patit strong long win na kamapim gavman. Sir Michael i no save larim ol man i pusim em raun. Em bai laik long NA long win long ilekse na sanapim gavman gen.

Mi tok moa olsem husat namel long 4-pela deputi lida bilong em inap long kisim NA na tok gris wantaim ol arapela pati i go long 2007 ilekse na sanapim gavman? Na husat politikel pati bai bos kru wantaim NA nau i go inap bihain long 2007 Nesenel Ilekse.

Sir Michael i painim pinis angka bilong em long Nesenel Alaiens na gavman bilong em. Na husat i kamap kepten bilong sip i stap long han bilong Sir Michael tasol.

WANTOK **KOMENTRI**

Pasin bilong stretim hevi i stap

NAMBA wan Otonomes Gavman bilong Bogenvil bai kisim luksave long bikpela inoguresen o sanapim bilong en long Trinde na Fonde long wik i kam.

Dispela i makim bikpela samting tru insait long stori bilong yangpela kantri bilong yumi. Bogenvil nau bai i gat gavman bilong ol yet. Ol bai i ken lukautim mani na sindaun bilong ol yet, tasol ol bai i stap aninit long nem bilong PNG yet.

Na wankain tasol olsem PNG i bin kisim independens na nogat blut i bin kapsait, Bogenvil tu i bin karimaut namba wan otonomes gavman ilekse bilong ol na nau ol i gat Presiden, Joseph Kabui.

Tasol nau namba wan liklik birua i kamap bihain long ilekse. Bipo gavana bilong provins na man husat i bin resis long kamap presiden, John Momis i tokaut pinis olsem em bai go long kot long tokaut olsem ilekse i no bin ron gut long sampela ples long wanem i gat ol man i wok long pretim ol manmeri wantaim gan long taim bilong vot.

Mista Kabui yet i tok olsem ol sut toktok Mista Momis i mekim i nogat as long en.

Long dispela sait, sapos Momis i tingting strong long karim dispela ilekse i go long kot, em i gat rait long mekim olsem.

Planti manmeri insait long kantri na ol lain husat i wok wantaim em bipo i ken tokim yu olsem Mista Momis em i wanpela man husat i gat gutpela na stretpela tingting. Na wankain long sait bilong Kabui. I gat planti manmeri long Bogenvil yet na ausait long Bogenvil tu husat i gat bikpela sapot bilong Kabui.

Tasol long wanem as na olgeta hatwok bilong olgeta manmeri husat i lusim laip bilong ol long kamapim gutpela Bogenvil bai i lus nating?

Ekting Gavana bilong Bogenvil Gerard Sinato i mas kisim luksave olsem man husat i stap namel long dispela tupela man na ilekse kros bilong ol.

Sinato i tokaut pinis olsem long tingting bilong em yet, tupela lida i mas paitim toktok na wanbel long stretim hevi.

Na long dispela as, yumi i mas tingim olsem maski bikpela pait i bin kamap long Bogenvil. Nogat wanpela man o meri i dai long taim bilong ilekse. Olgeta pipel bilong Bogenvil i laikim gutpela sindaun na gutpela bihain taim bilong ol na pikinini bilong ol.

I gat rot long Momis long karim hevi bilong em long ilekse i go long kot. Na dispela bai namba wan bikpela traim bilong gavman na etministresen bilong Bogenvil Otonomes Gavman.

Tasol yumi noken ting olsem pasin bilong yumi long Papua Niugini i lus. Nogat. Yumi i gat rot bilong yumi yet long as ples bilong yumi wan wan long stretim hevi.

Pasin bilong paitim toktok na stretim hevi long kamapim wanbel na gutpela sindaun i stap. Long dispela kain taim. Bel kros i no gutpela bilong ol pipel bilong Bogenvil.

Sapos i gat rot long stretim dispela hevi, i stap nau long han bilong dispela tupela lida long bihainim pasin bilong ples long stretim dispela hevi na kamapim wanbel bai wok i ken go het.

Mama Lo i stia bilong PNG

PLANTI kantri insait long Africa na long Saut Pasifik rijen i bin kisim politikel independens bihain long tok

orait bilong mama kantri o kantri i lukautim ol na Konsititusen o Mama Lo bilong dispela nupela kantri.

Tasol sampela kantri i kisim independens bihain long bikpela pait i bruk wantim ol bipo mama kantri bilong ol.

PNG i kisim independens bihain long tok orait bilong Mama Kantri (Australia) na antap long Mama Lo bilong kantri. Rot na wok PNG inap bihainim olsem kantri em olgeta i stap insait long Mama Lo.

Planti saveman bilong Mama Lo i save tok "Mama Lo" em i "Guiding Star" bilong PNG.

Olsem long Baibel yumi save harim stori bilong Trupela saveman i bihainim sta long sankamap na bihainim i kam kamap long taun Bethlehem. Long dispela taun em King i bin kamap na stap. (Mt 2: 1ff)

Onaim na bihainim dispela Guiding Sta bilong PNG (Mama Lo), em wok trupela han bilong gavman bilong kantri mas mekim, olsem Palamen, Nesenel Eksekutiv Kausel (NEC) na ol Kot Sistem.

Sapos wanpela han bilong Gavman i no bihainim o kamapim sampela asua, dispela i ken kirapim bikpela hevi insait long kantri. Wanpela bikpela tok em i kamap pinis long asua bilong NEC, na dispela hevi o tingting Gavana bilong Morobe tokaut pinis em Morobe mas kisim independens bilong em yet. Sapos NEC i traim long brukim Mama Lo bilong kantri o senisim long kisim Australia Polis i kam insait long kantri gen.

Sampela ol liklik tingting long soim Gavman, long em i ken lukluk na mekim wok



Ol prinsipal bilong gutpela lida
wantaim
Evangelist
OHARE JABERE

bilong en. Gavman (NEC) mas nau save olsem:

PNG i kisim independens inap 30 kribas nau tasol ol pipel long ples o distrk level i stap yet olsem PNG i no bin kisim independens na dispela i kamapim planti bel hevi na kros namel long ol pipel.

PNG em i kantri i gat klostu 700 tokples na kainkan pasin kalsa i stap. Pipel tu i no stap long wanpela hap graun. Ol i stap long ailan, bikbus, nambis, na hailans. Dispela kain pipel na kalsa nap les, em wanpela samting tasol i tungim na holim ol i kamap olsem wan pipel, wan neisen na wan kantri, em Mama Lo.

I gat planti saveman PNG i gat na ol inap long tokpait long lukautim pipel bilong ol na risos bilong ol sapos Gavman (NEC/Palamen) i no mekim wok gut o stret.

Kantri PNG nau i stap, em i mama kantri i bin kamapim. Ol i putim baundi mak na brukim brukim na kolim ol graun olsem distrik, na provins na dispela i kamapim kantri. Aspies pipel i no save long tok "neisen/stet/kantri". Pipel long PNG bipo, i save long pasin bilong "klen na traib" na gimim sapot na kirapim klen na traib.

Olsem wanpela saveman i bin tok long Inglis olsem: "Black man does not really understand the nation state; his loyalties are to his tribe".

Gutpela tingting em olsem: Gavman mas rispektim na bihainim dispela "Guiding Star/Mama Lo" em yet i kamapim long yia 1975. Dispela Konsititusen i wok long holim pasin ol pipel long stap olsem wan pipel, wan neisen na wan kantri. Sapos Gavman i popaia o brukim, planti Luther Wenge i stap long kantri bai kirap long mekim wankain tok Songan Luther i mekim. Long wanem yumi blek man yumi no save long wanem samting em i stet o neisen. Yumi save long rot na pasin bilong Hauslain bilong yumi, klen na traib bilong yumi tasol. Pasin bilong brukim graun, solwara, maunten bilong kamapim stet o neisen em i wok bilong ol Mama Kantri i bin kamapim. Olsem dispela saveman skruim tok gen olsem: "Ol kantri bilong ol blek manmeri em ol waitman yet i kamapim."

Sapos yu laik save moa long wok bilong Lidasip rait long mi long: PO Box 3512, Boroko, NCD o Mobail 864 0503.

WANTOK

Published Weekly, Wednesday, for Word Publishing Company, Ltd.

P.O. Box 1982, Boroko, NCD
Papua New Guinea

Telephone: 325 2500

Fax: 325 2579

Email: word@global.net.pg

**Pe bilong wanpela yia
52 niuspepa**

Ples:	Air:
PNG	K140.00
AUSTRALIA	US\$100.00
ASIA PACIFIC na JAPAN	US\$80.00
AMERICA na EUROPE	US\$150.00

General Manager
Justin Hansu Kili

Editor
Neville Choi

Published by Justin Hansu Kili, MBE of Section 58, Allotment 3, Office 2, Waigani Drive.

Word Publishing Company Limited is owned by the four major churches of Papua New Guinea- Catholics 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms of acceptance are available at Word Publishing Company Ltd and are set out full on the display advertising form.



PASIFIK NIUS

WESTEN PASIFIK:

WOL Helt Ogenaisesen (WHO) i bin bun long bik siti Beijing long paitim tok long rausim sik misels insait long Westen Pasifik Rijen.

Dispela tripela de kibung bilong Teknikel Etwaisri Grup bai paitim tok long makim 2012 olsem taim bilong daunim sik misels.

Bikpela tingting nau em long kisim gutpela sapot i kam long ol memba bilong palamen na ol gavman na tu, gutpela helpim mani.

"Mipela i laik rausim sik misels kwik taim," Dokta Shigeru Omi, Rijinel Dairekta bilong WHO insait long Westen Pasifik, "tasol mipela i mas luksave olsem wok i go het insait long rijen i no wankain long wanem sampela kantri i strong moa long ol arapela.

"Wanpela grup saveman i kamapim Tas Fos long rausim sik misels na ol i makim 2012 olsem yia we bai i nogat moa sik misels," Dokta Omi i tok.

Maski i gat inap long 95 pesen i go daun long namba bilong ol manmeri i dai long misels, em i wok long stap yet olsem namba wan sik i save kilim dai ol yangpela pikinini.

Planti taim em i save givim ol bikpela hevi olsem pasim ai, pasim iau na bagarapim kru bilong het.

Samting olsem 30,000 pikinini i save dai olgeta yia long sik misels insait long rijen. Klostu olgeta long ol dispela pikinini i stap insait long dispela 5-pela kantri: Cambodia, China, Pipels Demokratik Ripablik ov Lao, Papua Niugini na Philippines.

"I no stret we ol pikinini i wok long indai long sik misels, wanpela sik we i gat banis bilong em," Dokta Olmi i tok.

Westen Pasifik Rijen i gat 37 kantri, na 22 long ol i stap insait long Pasifik rijen.

VANUATU:

PRAIM Minista Hami Lini i tokim Pot Vila Kaunsel ov Siefs olsemem bai kamapim wanpela senis long lo i bosim wokabaut bilong ol pipel na dispela bai kamap long narapela bung bilong palamen.

Lini i mekim dispela toktok long sapotim wanpela rekomendesen i kam long Ombudsman, Peter Taurakoto, long gavman long skelim rot bilong senisim dispela lo bihain long wanpela bipo kalabus man i sutim wanpela Saina bisnisman na kilim em pastaim long em i go katim susa bilong em.

Long wanpela bikpela kibung wantaim praim minista, ol sief i tokim em long rausim dispela man i mekim dispela birua sapos em i man bilong narapela kantri.


Ektimng Polis Komisina Arthur Caulton i tok as long kilim dispela man i no stap long sait bilong wok bisnis.

Polis i holim pasim tupela man pinis na ol i singaut long ol komyuniti lida long givim gutpela stia tok long ol pipel bilong ol.

Dispela em i namba tu taim wanpela Saina bisnisman i dai bihain long wanpela Saina marit i bin dai las yia.

Nius i kam long PACNEWS

WOL NIUS WOL NIUS WOL NIUS



WOL NIUS WOL NIUS WOL NIUS


Soldia skul...

WANPELA soldia bilong Saina i wokabaut long bel aninit long wanpela hap waia i paia na stap. Dispela soldia i skul long wanpela bes bilong ol ami long Jinan i stap long Is sait bilong Shandong provins long Saina.



Yupela lukim tu?

PRESIDEN bilong kantri Kuba i mekim wanpela tok-tok long pinis long wanpela bikpela kibung we i bin kamap long siti Havana. Long dispela kibung, ol i autim belhat bilong ol long presiden bilong Amerika, George Bush long wanem em i no laik kisim wanpela man i save pait egensim pasin komunism, Luis Posada Carriles i to long kantri Venezuela long sanap long ol sas olsem em i bin kamapim bom we i bin pairap long wanpela balus long 1976 na i kilim 73 manmeri.



Paitman...

OL PAITMAN bilong Alvoru Kos (Ivory Coast) long Afrika i ron long wanpela kar bilong ol. Planti tausen manmeri i bin ronawe lusim wanpela taun las wik Fonde bihain long 55 manmeri i bin indai na bikpela pait namel long tupela ples i bin kamap.




Ektimng Spaidamen asua...

WANPELA man Saina i putim klos bilong Spiderman na kalap i go antap long wanpela bikpela opis long siti Hong Kong na karamapim wanpela bikpela TV skrin long makim namba 16 krismas bilong bikpela hevi i kamap long 1989 we ol soldia i bin kilim ol yangpela sumatin. Nau dispela ektimng Spiderman wantaim ol arapela yangpela manmeri i wok long singaut long gavman bilong Saina long givim tuksave long rong ol i bin mekim.

WOL NUIS WOL NUIS WOL NUIS




WOL NUIS WOL NUIS WOL NUIS



Man o pis?

Nogat ya. Em i no pis. Em i wanpela soldia bilong Yunaitet Stets Nevi i brukim wara long wanpela hap trening em i kisim long het opis bilong ol long Manama, Bahrain. Planti long ol wok ol Nevi bin kamapim long woa long Irak i bin kamaut long dispela bes.



Wasim gut...

WANPELA palaman insait long wanpela hap banis klos i sanap na waswas insait long Palamen haus long Canberra, Australia. Wanpela karamap i gat nem bilong Foren Afes Minista Alexander Downer long em i bin kamap insait long Palamen haus na ol wok manmeri pret. Dispela karamap i bin kamap tupela de bihain long wanpela kain waitpela das o paura em sampela hait man i bin salim i go long embesi bilong Indonesia long Canberra yet.




Bikhet man...

Ol polis bilong Israel i save lukautim boda i holim wanpela man Israel yet husat i wok long autim bikpela bel kros bilong em long wanpela bikpela banis ol i sanapim long ples-bilong em.



Waswas...

WANPELA man i wasim hos bilong em long Wara Eden long Appleby long Westmoreland long Noten Inglan pastaim long ol i go long wanpela bikpela ples bilong salim hos. Dispela so ol i kolim Appleby Horse Fair em winim oigeta arapela so long Yurop, na i save pulim planti manmeri long ol kain kain hap long UK.



Tingim Wara...

Long makim Wol Envaromen De Wol Waitaip Fan (WWF) i sanapim wanpela traipela wara tap long fran bilong stetsiu bilong "Christ the Redeemer" we i sanap antap long Corcovado maunten long Rio De Janeiro.

Kopi tasol na haus i kamap... sapos yu sindaun nating na wet long ol man i givim kaikai long yu, yu rong pinis! Kirap na mekim wok, bai yu kisim gut long bihain taim... James Kila i lukluk long tupela man i hat wok na kirapim haus long moni bilong kopi tasol..

Sanapim haus long kopi tasol

...olsem namba wan pos long divelopmen

James Kila i raitim

KEREMUNGE viles i stap insait long Kumga lain wan pisin long Dei Kaunsol eria long Westen Hailans provins. Dispela ples em i stap moa long 30 kilomita ausait long Maunten Hagen siti.

Mi bin raun i go long Keremunge na Kumga eria na mi ken tok stret olsem rot i go olsem long ples long hap i bagarap tru. Maski olsem hap bilong en em wanpela konstraksen kampani i wokim i stap, ol narapela hap long Kup DPI stesen bipo i stap wankain yet.

Tasol wanpela gutpela piksa mi lukim em ol lain manmeri bilong dispela rurel eria i no wari. Ol i wok yet long kamapim kopi long salim na helpim sindaun bilong ol insait long komyuniti bilong ol.

Las wik ol manmeri insait long Keremunge hauslain i bin bung long amamasim tupela brata bilong ol em Nelson Naldi na Jacob Wani bihain long dispela tupela man i opim nupela haus kapa insait long komyuniti bilong ol.

Dispela tupela man i no kisim dinau mani long benk o kisim mani long ol ausait lain o dona ejensi long helpim ol long wokim haus bilong

tupela. Ol i skelim gut mani ol i kisim long salim kopi bilong ol na ol i wokim dispela tupela haus bilong ol insait long hauslain bilong ol.


Dispela tupela man i kamap olsem gutpela piksa o piksa tru long ol arapela lain manmeri long hauslain bikos maski ol i stap longwe tru long taun, ol famili bilong ol i ken slip long gutpela haus kapa wankain olsem ol lain long taun i gat long en.

Dispela tupela brata i lusim moa long K20, 000 long wokim wan wan haus bilong ol yet. Mi bin go insait long haus bilong tupela na mi ken tok olsem ol rum insait long haus i gutpela tru na wankain olsem ol haus long taun.

Planti ol manmeri insait long ol hauslain na ol lain famili insait long Dei Kaunsol olsem Kotnatiki, Kinjibi-Meia na tu sampela lain i kam long Hagen-Sentrol na Hagen Siti i givim ol toktok long dispela bung.

"Wanem samting i kirapim bel bilong mi long wokim haus-kapa em bikos mi laikim ol famili bilong mi i ken slip na malolo gut long gutpela haus," Nelson Naldi i tok.

Dispela tupela man i stap olsem gutpela piksa insait long komyuniti bilong ol long Keremunga pisin long hatwok bilong ol yet long wok long kopi i helpim ol long



• Jacob Wani i sanap ausait long haus bilong em.

sanapim tupela haus-kapa insait long viles komyuniti bilong ol.

Narapela samting tu em dispela tupela man Nelson Naldi na Jacob Wani em ol memba bilong Westen Hailans CCGS Famas Koporetiv. Dispela em i wanpela pailot projek em Kopi Indastri Koporesen (CIC) i kirapim long sapatim ol fama long kisim liklik dinau long helpim ol long wok bilong kopi projek bilong ol. Tasol

bihain long sampela taim, taim ol i sanap strong long wok kopi ol i ken bung wantaim ol narapela fama i save hatwok long prosesim kopi bilong ol na salim i go ovasis na kisim gutpela mani.

Dispela bikpela bung long Keremunga long Dei Kaunsol long wiken i go pinis i lukim planti ol lain lida bilong wan wan komyuniti insait long Dei Kaunsol i givim ol toktok bilong ol long amamasim dispela tupela man na tu givim gutpela toktok long gutpela pasin long stap insait long komyuniti bilong ol.

Planti ol lain husat i bin givim toktok long dispela taim i tok olsem planti bilong ol i lukim laipstail bilong ol i senis long wanem em mani bilong kopi i wok long hepim sindaun bilong ol.

"Sevim gut mani yupela i kisim taim yupela i salim kopi na mekim gutpela wok long en. Noken baim bia na spak na mekim kain kain trabel long ples," dispela em strongpela toktok wanpela Dei Kaunsol komyuniti lida, Roy Pena i tok.

"Taim yu sevim gut mani bilong yu long taim bilong kopi sisen bihain bai yu lukim gutpela kaikai bilong en i kamap. Yu bai gat gutpela haus, draivim gutpela kar na tu pikinini bilong yu i ken go long gutpela skol," Mista Pena i tok.

Sampela ol yut lida i givim strongpela toktok tu i go long ol yangpela man long komyuniti long onaim ol arapela manmeri na wokhat long kopi bilong ol na kamapim gutpela wok insait

long famili, komyuniti na distrik bilong ol.

Wanpela yut lida Thomas Tong i tokim ol manmeri na ol yangpela olsem ol i mas wok long kopi gaden bilong ol long wanem ol i holim graun ol bai lukim planti gutpela senis i kamap long laip bilong ol long komyuniti.


Dispela bikpela seremoni o kaikai long Keremunga i lukim ol kaunsol na hetman long ples i sainim wanpela agrimen long tokaut olsem sapos wanpela trabel i kamap long Keremunga ol bikhet man na ol lain long ples bai i no inap long bagarapim dispela tupela haus em dispela tupela fama Nelson Naldi na Jacob Wani i mekim.

Wanpela lida na bipo hetman olsem sief bilong Yana Koimba i mekim bikpela singaut i go long olgeta lain manmeri na ol yangpela insait long komyuniti olsem insait long wan wan kaunsol long dispela hap ol manmeri i mas senisim tingting, na tingim lotu na tu onaim wok bilong ol narapela na senis i ken kamap long komyuniti.

Yut Lida Thomas Ton i mekim bikpela singaut tu i go long i yangpela long soim pasin bilong onaim ol wokmanmeri bilong sios.

"Dispela ol samting dispela tupela brata i kamapim em kisim longpela taim na i kamap long hatwok stret.

Tong i singaut long ol yangpela long lusim pasin bilong raskol na bikhet pasin na go bek na wok long kopi bilong ol.



• Haus na ol flaua gaden bilong Nelson Naldi.

Yangpela meri PNG harim singaut long Bikpela

...Ekta Sister long muvi strongim tingting

Veronica Hatutasi i raitim

TAIM planti yangpela meri skul sumatin i wok long wari long go hetim skul bilong ol long ol teseri institusen olsem ol yunivesiti na kolis, yangpela Rosalind MckKenzie Saige i no wari.

Em bin kisim tok orait pas long go hetim skul long Tiata Ats long Yunivesiti ov PNG long Waigani. Na long wankain taim tu, em i kisim tok orait long skul bilong kamap wanpela Katolik Sister long kantri Filipins. Dispela em long yia 1997.

Tasol em i no hat long mekim disisen wanem ofa bai em i kisim bikos em i strongim tingting bilong em pinis long harim singaut bilong Bikpela na kisim ofa long skul bilong kamap wanpela Sister long Kongriksen bilong ol Canosian Daughters of Charity (Kanosia Sister ov Sariti kongriksen). Olsem na long Epril 12, 1997, yangpela Rosalind husat i gat 18 krismas long dispela taim i bin tok gutbai long famili bilong em na PNG na go long Filipins. Em bin go olgeta long Canossa Kolis kempus long San Pablo Siti insait long Lugano provins na wokim yunivesiti skul bilong em long hap long 4-pela yia. Bihain long dispela, em i go long skul Sister we em bin wokim namba wan tok promis bilong em long kamap Sister long kongriksen bilong ol Kanosa long Oktobe 2004.

Mama na liklik brata bilong em i bin go witesim bikde bilong em. Bihain long dispela, em i helpim kari-

maut wok long Elementeri level Tisa na bihain long malolo bilong em nau, em bai go bek na kisim fultaim wok olsem Elementeri level tisa long Filipins.

Sevenpela yia olgeta, em i no bin kam malolo long PNG bikos em i go hetim skul long kamap Sister bihain long em i pinisim teseri skul bilong em long 4-pela yia long 2001.

Long dispela yia Me, Sister Rosalind i bin kam malolo long tripela wik wantaim famili bilong em long Gordons, Pot Mosbi na Wantok i bin painim em na stori wantaim em. Ritim stori bilong Sister Rosalind husat i gat bikpela laik long tokim na skulim ol manmeri long save long Jisas na tu, laikim moa yangpela manmeri i givim bikpela tingting na sapos ol i pilim olsem Bikpela i singautim ol, long bihainim dispela long wok olsem Pater, Sister na Bruder.

Bihainim dispela, em i laikim bai ol papamama i givim sapat na strongim beten insait long famili na ol pikinini i ken kamap ol gutpela manmeri long famili, sosaiti na kantri. Ritim tu rot we wanpela muvi piksa i bin kirapim tingting bilong em long kamap Sister.

"Laik bilong mi long kamap wanpela Sister long Katolik Sios i bin stat long narakain rot. Taim mi stap long Gret 3, mi bin tukim muvi piksa, "The Sound ov Musik" na Sister long piksa ya husat i gat naispela nek long singsing na tu, em i lukautim na skulim ol pikinini bilong Von Trapp famili.

Mi kisim tingting long kamap wanpela Sister olsem em na dispela tingting i pas pinis.



• Rosalind wantaim mama Elvina na liklik brata long greduesen bilong em long Canossa kempus long Filipins long yia 2001.

"Mi no save papa bilong mi i kisim tingting we tasol wanpela taim, em i askim mi olsem, yu laik kamap wanpela Sister, na bikpela amamas i kisim mi na hariap mi tok, yes. Taim mi stap long Gret 6, em i askim mi wankain kwesten gen na mi givim wankain ansa. Mi amamas olsem papa na mama bilong mi i givim bikpela sapat long mi long dispela rot long kamap Sister" Sister Rosalind i tok.

Bikos long dispela intres bilong em, mama bilong em i wok long HIV na STD opis wantaim helt Dipatmen long Hohola i bin bungim Sister Sonia Sangel em wanpela Filipino Kanosen Sister husat i bin wok long Sen Theresa Klinik long Hohola na dispela i bin opim rot bilong Rosalind long bungim ol Sister bilong Kanosen kongriksen.

Na em i save go na stap wantaim kongriksen long Gordons, lainim laipstail, wok na preia pasin bilong ol na dispela i skruim laik bilong em moa yet long kamap wanpela Sister long kongriksen bilong ol. Moto o het tok bilong kongriksen em, "Telimautim Jisas na ol manmeri bai laikim em long olgeta hap. Na tu, helpim ol trangu lain.

"Mi laik wokim stret ol dispela. Na mi laikim bai moa yangpela pipel i ken luksave long dispela na kam insait long vokesen bilong kamap Pater, Sister na Bruder na ol i ken skruim Tok bilong Bikpela long olgeta hap bilong wol.

Na tu, helpim long senisim laip na sindaun i kamap gut na sevim ol pipel long sait bilong fisikel na spiritual eria aninit long helt, edukesen na rilijes sevis.

Laip long Filipins i no bin isi long wanem em bin wanpela tasol bilong narapela kantri namel long ol Filipino

lain long skul em bi stap long em. Planti taim em bin "homesick" o sik taim em i tingting long ples, famili na kantri tasol long bikpela laik bilong em long Jisas long Diwai Kruse na bikpela laik bilong em long ol manmeri i mas save long Jisas i strongim em na em i stap strong.

"Mi bin wanpela meri (nogat man tu) tasol bilong narapela kantri insait ong kempus. Mi bin lainim tu tokples tasol i no long go insait long spesel klas, nogat. Mi bin lainim long ol liklik Elementeri skul pikinini we mi skulim ol.

Tru, mi save tingim ples planti taim tasol mi kisim strong long Jisas long Diwai Kruse, moa yet piksa bilong dispela Diwai Kruse long Sen Peter Chanel Erima, em Peris bilong mi.

Preia i bin helpim strongim mi long stap strong na nau mi kamap Sister na karimaut wok long kongriksen bilong mi.

Mi askim ol papamama long sapatim ol pikinini bilong ol sapos ol i laik bihainim rilijes vokesen.

Mi amamas long gutpela sapat tru mi kisim long papamama bilong mi long taim mi bin soim intres taim mi liklik yet long kamap Sister.

Sapatim wantaim preia na ol gutpela stia. Tasol ol i mas klia olsem dispela kain wok em i no bilong kisim mani tasol em i bilong givim sevis long God.

"Wantaim bikpela laik long go aut na helpim ol pipel bilong mi yet long PNG, mi laik tok olsem em i gutpela long ol ausait lain i kam wok na helpim yumi tasol i gutpela moa taim wanpela lain bilong yumi yet i kam stap namel long yumi na wok na skulim yumi long wanem ol i gat gutpela save long laip-



• Sister Rosalind wantaim papa bilong em Andrew Saige long Pot Mosbi. Ol foto: VERONICA HATUTASI

stail, kalsa, laip na sindaun, Sister Rosalind i tok.

Em i tok laip na wok long Filipins i gutpela tasol em i wanpela bikpela sakrifais long lusim famili, ol pren na wantok na ples we yu groap long em na moa yet, long ol bikpela de olsem Krismas we ol famili i bung wantaim we em i save misim.

Tasol em i tok planti yia em i stap long Filipins na em i gat ol lain we em i kotim famili bilong em na moa yet, kongriksen bilong Kanosia we em i kolim famili.

Long PNG, Kanosen Kongriksen i stap long Bomana ausait long Mosbi siti we ol i ranim wanpela skul bilong ol yangpela meri i nogat sans long go ehtim skul long nomol edukesne sistem.

"Skul of Life" em dispela skul ol kanosen Sister i ranim na ol i skulim ol yangpela meri ol laip skil o save we bai helpim ol long laip bilong ol olsem somap, keit-ering o kuk skul long redim ol kaikai long ol bikpela bung, hotel, ol bikpela samting olsem betde, krismas na moa, lainim ol akademik sabjek o rit na rait na ol arapela vokesenel sabjek. Husat yangpela meri na papamama i laik save moa na i gat intres long skul o long joinim kongriksen bilong ol Kanosia, nem bilong Mada Supiria yu ken rait o toktok long en em Sister Leonor Dijan FDCC, telipon namba 3281504. O Canossian Convent, P O Box 7585, Boroko, NCD, PNG.



• Liklik Rosalind tasol tingting long kamap Sister i strong pinis.

Laip bilong em:

Nem: Sister Rosalind McKenzie Saige
Asples: Papa, Andrew Saige, Manam Allan, Madang Provins, PNG
 Mama, Elvina Saige, Oro Provins, PNG
Famili: Namba wan long 5-pela pikinini
Bonde: Me 3, 1978
Skul: Gordons Intanesenel skul-Elementeri na Praimerl
 Marianville Gels Hai skul- Gred 7-10
 Gordons Sekonderi- Grets 11 na 12
Teseri skul: Canossa Kolis kempus, San Pablo Siti, Lugano Provins, Filipins.
 Canossa Academy, Lipa Siti, Filipins.
 Novisiet, San Juan Manila
Kamap Sister: Postulen -2001
 Wokim namba wan promis - Oktoba 2004
 Bai wokim las promis bihain long 5-pela yia
 Namba wan PNG Kanosen Sister
Wok: Greduet wantaim Basela ov Edukesen, speselals long Elementeri Tising na Rilijes Kodneta bilong Elementeri Dipatmen
 Wok tisa long Elementeri level long Lipa Siti, 2 awa ausait long Manila.
 Las taim
 Long PNG: 1998 Inap long Mei 2005

Wanem kain 'primitiv' at? Sem long ol Westen kantri

LONG dispela wik mi kisim wanela askim long go lukim lonsing bilong at so we bai i kamap long dispela wik i go inap Sarere long Sir John Guise Stadium hia long Mosbi.

Nesanel Kalsarel Komisn (NCC) i kamapim dispela eksibisen o so bilong soim ol kain kain samting long sait bilong kalsa bai ol manmeri long pablik i ken lukim. Ol dispela samting i karamapim ol penting, ol atifek we ol atis bilong yumi tete i mekim.

Minista bilong Komyuniti Dvelopmen, Dame Carol Kidu i bin stap long lukim Tresera na Minista bilong Fainens, Bart Philemon na Menesing Dairekta bilong Invesmen Promosen Atoriti, Ivan Pomaleu na Seken Seketeri bilong Embesi bilong Japan. Na em tasol.

Na ol sinia pablik seven, gavman minista na ol bosman bilong ol dipatmen na praivet sekta we bosman bilong NCC, Dokta Jacob Simet i askim long kamap? Minista bilong Kalsa yet i no bin soim pes, tasol Glasim Musik i ken fogivim em long wanem gutpela minista i bin go aut long kantri long kisim helpim long sik em i gat, tasol i nogat wanela as long ol sinia wok manmeri bilong em long i no soim pes. Na i nogat wanela man bilong Turisim Promosen Atoriti i bin stap.



infomel wok we i save mekim liklik mani bilong ol atis." Minista i tok long Mande nait. "Dispela infomel wok i mas groa inap em i kamap wanela samting mipela i ken salim i go aut long kantri."

Tasol mi lukim olsem i nogat planti ol lain husat i save mekim disisen i bin kamap long lonsing na i soim olsem dispela driman bilong minista bai kamap wanela driman nating i sindaun na hait insait long ol opis long Waigani.

Long bikpela toktok bilong em, Eksekutiv Dairekta bilong Nesanel Kalsarel Komisn, Dokta Jacob Simet i tokim ol liklik hap manmeri na nius midia i stap olsem PNG At i gat nem long ol arapela hap bilong

pasin tumbuna bilong ol. Long wanem na ol dispela waitmanmeri husat i wok insait long dispela kantri na wokabaut namel long ol pipel bilong yumi nau i salim ol at bilong yumi aninit long nem 'primitiv' bai ol i ken mekim moa mani. Em pasin bilong mangal na tanim baksait. Sem bilong ol Westen kantri long wol, mipela i tok.

Tasol long narapela sait, ating ol musium na ol arapela praivet kolekta i mas kisim luksave long bikpela laik bilong ol long PNG at, olsem Dokta Simet yet i tok, "Bikpela hap PNG at we i stap ausait long kantri na ol wan wan hap ol i givim luksave long ol insait long ol dispela musium" i soim tru manimak bilong em na bikpela luksave ol manmeri i givim ol taim mipela yet i no save onaim.

Planti PNG at bilong taim bipo em ol eksplora o ol man bilong painim nupela graun na ples long namba 18 senseri, tasol wan wan PNG at em ol i bin kisim bipo tru na bikpela hap bilong ol i sindaun insait long ol musium na ol praivet koleksen long wol. Ol dispela em ol i bin kisim long namba tu hap bilong namba 19 senseri.

"Planti long ol dispela atifek i lapun tru na planti long ol em ol i no mekim moa insait long dispela kantri inap long 100 yia nau," Dokta Simet i tok. "George Brown koleksen bilong Nu Briten na Nu Ailan i gat moa long 2000 hap olsem ol samting bilong pait, ol bikpela katapel, supia, sil na ol tubuan na malangan tambu samting na mi no luksave long ol olsem ol i kam long ol dispela hap tasol ol i bin mekim ol long dispela tupela ailan long pinis bilong namba 19 senseri.

Em i tok ol dispela atifek em ol i bin rausim long PNG taim kantri i nogat gutpela lo bilong was long ol dispela samting i go aut, tasol maski long dispela taim, olgeta dispela samting nau i stap long han bilong ol musium na ol wan wan man husat i lukautim ol. Tasol olsem samting bilong kalsa ol i gat nem i stap aninit long nem bilong ol pipel bilong PNG.

Ol dispela samting em inap long kirapim gavman na ol plena na lain bilong karimaut wok long sapotim strong dispela At na Atifek Eksibisen nau i kamap long Mosbi.

"PNG at na atifeks we i stap insait long ol musium na praivet koleksen bilong wan wan manmeri long wol em i bikpela samting long rot we wol i lukim PNG kalsa, at na kraf na ol arapela kain kain at tude," Dokta Simet i tok. "Ol em ol lain i kamapim piksa na nem bilong PNG kalsa long taim bipo na i go yet tude. Olsem na long dispela as, PNG at i gat nem insait long wol."

"PNG at i bin gat bikpela nem tru na ol i tok em i gat stail bilong em yet. Planti i bin kolim Niugini At we i narakain liklik long nem primitiv at."

Long ol dispela hap toktok bilong Dokta Simet, mipela i ken tok olsem PNG at long dispela senseri i go pinis i bin narakain tru long at mipela i gat tete, em i bin i gat bikpela laik na stail bilong ol i bin narakain olgeta long ol arapela kain atwok long wol na at we ol i no painim insait long Melenesia na Pasifik.

"Mipela save tu olsem maski ol at bilong mipela i senis insait long 150 yia i go pinis, mipela i holim strong yet planti hap at na kalsa we ol atis



• Namba wan sinia meri atis insait long kantri tude, Winnie Weoa bilong Wabag i sanap wantaim wanela piksa em i penim.



• Ol atwok bilong ol PNG atis olsem dispela i soim strong bilong yumi long sait bilong kamapim ol samting olsem we bai i ken karim nem bilong PNG long ol arapela hap long wol.



• Julie Mota, narapela biknem meri atis i stori wantaim ripota bilong EMTV long ol wok bilong em.

bilong yumi tete i save yusim. Dispela em ol as tingting bilong bipo."

Minista bilong Komyuniti Dvelopmen, Dame Carol Kidu i tok sapos ol Infomel Sekta atis na wok manmeri i laik mekim mani, PNG at na ol atifeks i mas sanap antap long bisnis bilong salim ol at wok i go long ol lain bilong baim i stap ovasis.

Em i tok long givim mak long ol at na atifeks i go ovasis, NCC i mas kamapim wanela 'sta reteng sistem' long makim mani mak bilong ol samting ol i salim.

"Gavman na praivet sekta i mas

givim at na kraf wantaim luksave ol i save givim long spots," Dame Carol i tok. Mi givim em ful sapot.

Sampela long ol penting o piksa we ol i soim long lonsim bilong eksibisen em planti i no save long ol atis i penim olsem meri atis bilong Wabag, Winnie Weoa husat nau em i namba wan bikpela meri atis insait long kantri, na narapela meri atis i kisim luksave na mekim nem pinis long ovasis, Julie Mota.

Dispela eksibisen nau i kamap long Sir John Guise indo kompleks bilong stedium long Mosbi nau i op inap Sarere na em i fri long pablik long go lukim.



• Minista bilong Komyuniti Dvelopmen, Dame Carol Kidu na Minista bilong Fainens na Treseri, Bart Philemon i lukluk long ol piksa pening bilong ol PNG atis.

Planti taim, mipela i save sanap na tokaut olsem mipela i mas stiaim gut ol yut, tasol mipela yet ol sinia manmeri bilong kantri i save lus tingting olsem mipela i ken givim dispela kain stia long wok na pasin bilong mipela. Tasol mipela i save opim maus na givim ol bikpela toktok bihain long olgeta samting i save kamap.

Sem i mas i go long mipela ol manmeri bilong Papua Niugini husat i save sem na hait long wanela long ol bikpela eksibisen insait long kantri bilong yumi. Ol Papua Niugini At na Atifeks em i wanela maket we Dame Carol Kidu i tok i wok long groa i stap, na kamap wanela samting we i soi mipela olsem wanela nesene.

Minista Carol Kidu na laikim bilong em long ol Ats i kam long stori bilong em long bipo taim em i bin skul antropolojis na em i bin givim sapot bilong em long kamapim lo bilong Infomel Sekta we em i karim i go long Palamen las yia.

"Mi sapotim ol ats long wanem em i wanela wok mipela i tok em i

wol inap long 200 yia nau na i save kamap long ol ples olsem Yurop na Amerika we ol i givim nem 'primitive art' o at o kalsa bilong ol bus lain.

"Dispela em stail bilong at we i bin stap insait long dispela kantri wantaim ol arapela hap bilong wol olsem Afrika na Saut Amerika we i narakain olgeta long ol arapela stail bilong ait long wol olsem Gotik Benin o ol arapela kain at stail."

Dokta Simet i yusim dispela toktok 'primitive' na tude em i gat tingting nogut long dispela nem, tasol olsem nem bilong at, em i sut long wan wan stail bilong at we i luk olsem ol i no pinisim gut.

Glasim Musik i wanbel olsem dispela nem i gat tingting nogut long en, tasol mi ken tok olsem dispela nem i gat nem nogut bipo yet. PNG at na kraf i kamap long han bilong ol Papua Niugini manmeri, maski em i kamap long taim bipo, ol dispela pipel i sindaun gut bihainim laip bilong taun taim ol i mekim ol dispela wok.

Long wanem na ol westen kantri i kolim at bilong mipela 'primitiv' taim ol yet i nogat samting long soim



Laikim Penpren

Nem: Thomas Mendel
 Krismas: 17 (man)
 Adres: Margarima High School, PO Box 33, MENDI, Southern Highlands Province
 Save laikim: Go lotu, pilai kibod, mekim penpren, pilai spot, raitim poem, go painim abus long bus na stori wantaim ol pren.

Nem: Jeffrey Nikoiam
 Krismas: 19 (man)
 Adres: Bema High School, PMB Lae, Morobe Province
 Save laikim: Harim musik, mekim fani na singsing long kwaia.

Nem: Josephine Ofosu
 Krismas: 26 (meri)
 Adres: PO Box 7, Gomoa Ankumu, Ghana, West Africa
 Save laikim: Harim musik, danis, go raun long nambis, ridim buk, huk, kuking kaikai na pilai tennis.

Nem: John Taitus Tomali
 Krismas: 16 (man)
 Adres: St Francis Kulunda Primary School, PO Box 14, Tari, Southern Highlands Province
 Save laikim: Pilai tas futbol, ridim stori buk, helpim papamama, go lotu, pilai gita na harim musik.

Nem: Max Mayam
 Krismas: 18 (man)
 Adres: Morobe Printing and Suppliers Ltd, PO Box 2555, Lae, Morobe Province
 Save laikim: Go lotu, harim gospel musik na senisim presen na poto.

Nem: Miriam Narowen
 Krismas: 17 (meri)
 Adres: Mercy Secondary School Yarapos, PO Box 580, Wewak, East Sepik Province
 Save laikim: Go long lotu, helpim papamama, ridim buk, pilai netbol, soka, basketbol na tok pilai.

Nem: Dickson Papoi
 Krismas: 20 (man)
 Adres: Paim Roots, PO Box 102, Kimbe, West New Britain Province
 Save laikim: Go lotu, wok long gaden, pilai spot, wokim fani, pren wantaim narapela na ronim kar.

Nem: Benson Pimas
 Krismas: 18 (man)
 Adres: Don Bosco Technical School, PO Box 327, Vanimo, Sandaun Province
 Save laikim: Pilai soka, basketbol, harim musik, go long danis, ridim buk na lukim TV.

Nem: Mathew Pimas
 Krismas: 19 (man)
 Adres: Leitre Catholic Mission, PO Box 125, Vanimo, Sandaun Province
 Save laikim: Pilai soka, volibol, harim musik, go long danis na planti moa.

Nem: Donna Giang
 Krismas: 16 (meri)
 Adres: St Marys Catholic Primary School, PO Box 4149, Lae, Morobe Province
 Save laikim: Raun lukim ples na ridim buk.

Nem: Stanley Martin
 Krismas: 19 (man)
 Adres: Aiyura National High School, Private Mail Bag, Kainantu, Eastern Highlands Province



STORI TUMBUNA

LONG bipo, bipo tru i gat wanpela man i stap long sampela hap namel long Wewak na Yangoru. Nem bilong em, Numbo Duo. Na mining bilong em long tok ples bilong mi i min olsem, man bilong maunten.

Em wanpela tasol i stap na em i lukautim dispela bikpela ples maunten nau ol i kolim Prins Alexander Maunten.

Long wanpela de em i kisim ol spia samting bilong em na em i go long bus long painim abus.

Em i bin go longwe tru. Nau taim tudak i painim em long hap rot, em i slip aninit long as bilong wanpela diwai kwila.

Long nait, taim em slip i stap, bikpela ren i kam na mekim wara i stap klostu tasol ya i tait.

Diwai Kwila ya i stap arere tasol long dispela wara. Na taim tait i kam, em i brukim hap graun wantaim diwai na Numbo Duo tu na i karim tupela i go olgeta long solwara. Dispela wara i bin karim ol i go ya, em Hawaii Riva.

Moning i kam na diwai i drip namel long solwara na taim Numbo Duo i kirap, em i lukluk raun na em i lukim wara tasol.

Em i stap drip, drip tasol long diwai ya na em i hangre nogut tru. Long apinun nau em i drip i go kamap long wanpela ailan. Ailan ya em i Walis.

Em i swim i go kamap long ailan ya em i Walis. Em i swim i go kamap long ailan ya

na em i lukim wanpela bikpela gaden tru. Na em i go insait taso! na kisim ol kaikai samting na i go hat na kaikai i stap.

Long dispela ailan i gat ol meri tasol i stap. Man bilong ol, em ol bilakbokis.

Narapela de tupela susa i go long bikpela gaden bilong tupela na lukim samting bilong tupela i bagarap. Na tupela i tok, husat i kam stilim samting long gaden bilong mitupela?

Nau tupela i stat toktok long husat bai stap long gaden na was. I go nau na liklik susa i win long tok.

Na bikpela susa i pasim em namel long suga. Bikpela susa i go long ples na liklik susa i stap long gaden.

Taim apinun i kam, Numbo Duo i lusim ples em i bin hait long en, na i go long gaden ya. Em i go na i laik brukim wanpela suga, na kwiktam tru liklik susa ya i holim han bilong em na i askim em, "Yu mekim wanem long gaden bilong mi?"

Numbo Duo i tokim em long wanem samting i bin kamap long em. Orait, meri ya i tok, "Bai mi kisim yu i go long haus bilong mi."

Nau meri ya i putim em insait long bilum bilong em na putim sampela sayor na taro antap long em na karamapim em gut tru.

Orait, nau na em i karim em i go long ples. Taim em i kamap long ples, kwiktam tru em i go insait long haus bilong em na pasim dua.

Em i lokim dua pinis na i rausim ol samting long bilum bilong em.

Numbo Duo i kam ausait long bilum bilong meri ya na meri i tokim em, "Yu samapim dispela bilum i stap na mi bai go

pulimapim wara bilong kukim kaikai."

Na taim meri i laik go, em i putim wanpela hap diwai long dua na em i go. Numbo Duo i wokim bilum i stap na hap rop bilong bilum i pundaun i go daun long hul i stap namel long ol limbum.

Bikpela susa i lukim na i ting, husat tru i stap long haus? Em nau, em i go opim dua na i go insait.

Taim em i opim dua, hap mak diwai i stap long dua bilong haus i pundaun. Em i go insait na lukim Numbo Duo i sindaun i stap. Em i ran i go long man ya na tupela i mekim sempasin. Pinis nau na meri ya i go.

Liklik susa i kam na i lukim hap diwai ya i no stap na em i save olsem, wanpela samting i rong pinis.

Em i go insait na Numbo Duo i tokim em long wanem samting i bin kamap.

Tupela i stap i go, nau na Numbo Duo i askim meri long man bilong em. Meri ya i tokim em long ol blakbokis na Numbo

Duo i tokim em long tokim olgeta meri long kilim man bilong ol na karim i kam long em.

Long dispela apinun Numbo Duo i kukim sampela na kaikai na sampela em i tromoi.

Ol arapela meri ya i stap na i marit long pikinini bilong tupela ya. Na ol i stap karim ol pikinini na ol i bruk nambaut na i go long ol wan wan ailan. Na sampela tu i go long bikples.


Olsem na nau ol pipe! bilong ol ailan bitong ol ailan bilong Wewak, nambis bilong Wewak na ol pipe! bilong sampela hap bus bilong Wewak i gat wankain tok ples.

Maritman i giamanim mi

Dia Lalplain,
Mi autim behevi long wanpela marit man i bin giamanim mi tasol mi laikim helpim bilong yupela.

NAU mi luksave olsem wanpela marit man i bin giamanim mi pinis. Long las ya, mi na dispela marit man i bin pren na mitupela i save go kaikai wantaim long olgeta belo, serim ol wari bilong mipela wantaim na mitupela i save slip wantaim long planti taim. Em i tok aut olsem em i no laikim meri bilong em na laik long maritim mi. Em i tok tu olsem dispela pikinini i stap wantaim meri bilong em i no pikinini bilong em tasol ol wantok bilong em i tokim mi olsem em i giaman. Mi bin laik traim long rait long meri bilong man ya long tokim em long wanem samting i wok long kamap tasol mi no bin mekim long wanem mi no pillim gut. Mi bin tokim dispela man long mitupela i pinisim dispela prensip bilong mitupela tasol em i bin les. Mi sem tru long lukim ol poro bilong mi nau long wanem ol i save pinis olsem mi save raun wantaim marit man. Long namba wan taim tru, taim ol pren bilong mi i bin save long dispela prensip bilong mi, ol i bin tokim mi long lusim tasol mi i no bin harim tok bilong ol, na nau mi sem tru. Nau mi save olsem man ya i bin giamanim mi tru

na yusim mi tasol long pulapim ol dispela pilings



bilong em long pamuk. Em bai orait sapos em i bekim bek o larim olsem na traim long lus tingting na statim nupela laip?

Deceived Damsel

Dia pren,
 I gat tok i stap olsem ol meri i save pundaun nating tasol long man husat i save tok olsem ol i laikim ol tasol samting true mi man i laik long pamuk o slip wantaim meri tasol. Na dispela em nogut tru sapos man ya em i wanpela marit man long wanem em i bagarapim laip bilong ol yangpela meri em i save slip wantaim na tu i bagarapim famili bilong em yet, ol meri na pikinini bilong em bai i no inap stap wanbel gut wantaim em.

Pren, i luk olsem yu bin lainim planti samting tru long dispela prensip bilong yu wantaim dispela marit man na em gutpela long save olsem yu bin

pilim sore tru long meri na pikinini bilong em.

Yu mas luksave olsem i no gat amamas long mekim dispela kain pasin long yu yet na tu insait long famili bilong man. Na tu sapos man ya i lusim meri pikinini bilong em, mi no ting bai em inap kamap gutpela man bilong yu long wanem em i save wokim bighet pasin na mi no ting bai em senisim dispela bikhet pasin bilong em sapos em kamap man bilong yu. Na tu yum as tingim olsem yu laki olsem yu no bin gat bel long wanpela pikinini we bai ino gat papa. Yu mas lukim dispela na traim long lus tingting long em na statim niupela laif bilong yu ken. Mi save olsem tingting bilong yu long belhat na wari long wanem samting em i mekim long yu i stap yet long dispela man husat i bin yusim yu. Tasol mi wok long tingting tasol olsem yu ting olsem wanem, em i fea long yu putim olgeta hevi antap long man tasol o nogat. Insait long dispela leta tu, yu no raitim klia olsem yu bin save olsem em i wanpela marit man taim yu bin stat pren wantaim em tasol mi ting olsem yu bin panim aut bihan long yu prenim em.

Taim yu save olsem em i bin marit, yu no laik lusim em. Em bin giamanim yu stret taim em i tok olsem em i no laikim meri bilong em. Na yu laik long bekim bek long em tasol yu mas tingim tu olsem nogut meri bilong em i tingim wankain

tingting long yu tu.

Nau olsem yu save long wanem kain pen ol meri save kisim taim man i giamanim ol, nau yum as traim long putim ol dispela pen igo long sait na lukluk long ol wei we yu gen statim niupela laip bilong yu gen. Mi save olsem yu gat ol gutpela poro i stap long helpim na givim sapat long yu olsem na noken sem long go lukim ol gen. Mi save tu olsem yu bai laik long marit na tu statim pamili bilong yu yet long bihan taim taim tasol toktok bilong mi igo long yu em olsem noken hariap tumas long go insait long wanpela presip wantaim wanpela man. Pasin bilong silip wantaim man em i no bikpela samting insait long wanpela prensip. Ol samting olsem save gut long pasin bilong poro bilong yu em moa impotent o bikpela samting stret insait long wanpela prensip long wanem Papa God yet i tok pinis long Buk Baibel.


Laipain

Sapos yu gat wari o hevi, rait i kam long Lifeline, P O Box 6047, Boroko, NCD. Yu ken ringim mipela tu long telipon namba 3260011. Raitim trupela nem na etres bilong yu i kam na bai mipela i salim bekim long pas bilong yu. Mipela bai toktok long ol trupela samting yu askim long em tasol bai mipela i no inap long putim trupela nem bilong yu.

Laipain



Bisnis bilong Groim Diwai insait long PNG - Planim diwai long ol renfores eria



Rot bilong groim sampela bikpela diwai insait long PNG

Casuarina equisetifolia (sheoak)
Nem bilong en: sheoak, (ol arapela nem - sea oak, beach sheoak, horse tail casuarinas)

Ples diwai i kam long en: Australia, ol Pasifik Ailan na Saut Is Esia

Wanem kain diwai: Wanpela namel i go inap bikpla diwai i save stap grin olgeta taim. Longpela bilong em namel long 15 na 20 mita na bikpela bilong namel bilong em inap long 20 inap 100 sentimita na sapos yu lukim longwe, bai yu ting wanpela pain diwai. Bikpela han diwai bilong em i stret na skin bilong em i grey na braun we bihain em i save kamap bikpela na bai i senis i go rap na bruk i go liklik. Aninit long skin em kala bilong em i red na braun. Het bilong diwai i olsem gras bilong kakaruk, ol lip i longpela na i sap. Ol 'nidets' em longpela bilong ol i aninit long 30 sentimita na bikpela bilong em inap long 1 milimita na i gat namel long 5 na 8 han long wan wan lip. Ol flaua bilong man em ol sotpela liklik kap. Prut bilong em i braun na strong. Strong bilong em long groa wantaim ol arapela diwai i no gutpela tumas. Groa bilong diwai bihain long 10-pela yia i ken go inap long 20 mita.

Ples we em i save groa: Diwai i save groa long ples we i gat namel long 200 na 3000 milimita ren. Hot na kol bilong ples i stap namel long 7 na 3 digri sentigred. Em i save groa long ples we i stap namel long 0 na 1500 mita antap long mak bilong solwara. Em i gat strong long groa long taim bilong drai inap long 8-pela mun. Em i no save groa gut long graun i gat planti klei long en. Tasol em i ken groa gut long ol graun we i nogat planti gris. Em i no inap groa long graun i gat planti wara i stap long taim. Na em i save groa gut long ol ples nambis.

Strong bilong em: Diwai em i wanpela long ol strongpela diwai we i ken lait long paia maski em i no drai yet. Dispela spisis diwai em ol i save groim long kisim sit bilong paia o sakol, ol pos, long mekim hendol bilong ol samting olsem tamiok na sawot.

Yu ken yusim long mekim pepa. Skin

dwai bilong em i gat kala long en na yu ken yusim olsem marasin tu. Em i save holim bek graun, kisim bek graun long ples wara na olsem banis bilong pasim win.

Birua bilong em: Em i nogat strong long paia na em i no save groa gut wantaim ol arapela plaua na diwai long wanem em i save laik resis.

Ol prodak na karim bilong en: Ol diwai prodak - pos, paiawut, ol pos na tuls, long wok kapenta, na brukim i go daun long mekim pepa. Em i ken groa na kamapim namel long 6 na 18 kubik mita diwai long wan wan hekta inap long namba 20 yia taim groa bilong em i save pinis. Sapos yu senisim groa bilong em namel long 7 na 10-pela yia i ken karim namel long 75 na 200 tan long wan wan hekta.

Rot bilong groim: Yusim sid o pikinini diwai, yu ken groim ol sidling inap ol i kamap namel long 5 na 10 sentimita longpela bihain senisim i go long ol kontena bilong groa i go inap 30 na 50 sentimita pastaim long yu planim long ausait.

Sid tritmen: Nogat wanpela wok bilong stretim pikinini diwai. Putim ol sid long wanpela drai ples. Na strong bilong em bai no inap stap long taim, olsem na yu mas planim hariap.

Menesmen: Rotesen o wok bilong senisim graun bilong planim dispela diwai bilong kisim piul wut i stap namel long 7 na 15 yia. Long planim long plantesen, yu mas planim wantaim 2 x 2 mita o 3 x 3 mita spes namel long ol.

Agro forestry Wok: Yu ken yusim olsem banis bilong haus na banis bilong win. Em i ken daunim ol arapela samting i groa aninit long en, olsem na noken groim wantaim ol anuel krop insait long ol agro forestry sistem, long ples nambis.

Long hailans bilong PNG, ol i save yusim long haitim san long kopi na kadamon.

MCCARTHY & ASSOCIATES (FORESTRY) PTY. LTD.

National & International Forest Consultants

mccat@datec.net.pg

"Long kisim tok stia long olgeta wok diwai"

Sirambat laik strongim kopi long Nu Ailan

James Kila i raitim

Namatanai.

BILAS PELES Nu Ailan i laik go het long strongim wok bilong groim kopi insait long provins wantai helpim i kam long Kopi Industri Koporesen (CIC).

Bikpela developmen i kamap bihain long Provinsel Etmnistreta bilong Nu Ailan, robinson Sirambat i bin raun go long lsten Hailans provins las wik we em i bung wantaim Sief Eksekutiv Opisa bilong CIC, Ricky Mitio na i givim tingting bilong em.

Mista Sirambat i givim bikpela tok amamas long menesmen bilong CIC long kamapim wanpela opis long Nu Ailan. Dispela opis bilong CIC i stap long Kavieng taun, tasol ol wokman i save mekim wok raun i go olsem long Lelet na ol ples we kopi i save kamap gut long en.

Mista Sirambat i tok dispela gutpela wok bung em etmunistresen bilong em i sapotim tru na i laik dispela i mas go het yet long ol eria insait long Sentrel.

Insait long toktok bilong em Mista Sirambat i tok em bai givim bikpela sapot bihain long wok bilong ol CIC opisa bilong Nu Ailan i karimaut gut wok insait long provins.

Nau yet wok bilong kopi developmen insait long provins em DAL Etwaisa na wanpela CIC Provinsel Kopi Fama Trening na Ekstensen Kodineta, Jacob Morre.

Tupela CIC opisa Mista Morre wantaim narapela opisa husat em asples bilong Lavongai yet em July Wolwoi i mekim gutpela wok kopi ekstensen namel long ol fama long Nu Ailan.

Insait long dispela bung bosman bilong CIC, Ricky Mitio i tokaut olsem CIC i gat bikpela tingting insait long ol wok progrem bilong en long bringim kopi developmen i go long ol nupela eria o provins insait long kantri long ples nambis olsem Nu Ailan.

Dispela bai i ken helpim long bringim kamap bikpela prodak-sen bilong kopi insait



• Etmnistreta bilong Nu Ailan Robinson Sirambat i lukluk long strongim kopi developmen insait long provins bilong em. Foto: JAMES KILA.

long kantri.

Mista Mitio i tok tu olsem i mas gat maket tu i mas kamap long helpim na sapotim wok bilong ol dispela lain fama insait long Nu Ailan na ol i ken salim kopi bilong ol.

Dispela samting tasol bai i kirapim bel na tingting bilong ol long wok strong moa long

kopi developmen.

Insait long narapela toktok bilong em, Mista Mitio i toksave long Mista Sirambat long wokim redi wanpela memorandum ov agrimen (MOA) na CIC tu i ken givim tingting bilong en bipo dispela MOA i go long Provinsel Asembli.

Prais bilong bensin i go daun

STAT long Trinde long dispela wik, prais bilong petrol, disel na karasin i go daun.

Indipenden Konsuma na Kompetisen Komisnin (ICCC) i tokaut long ol dispela senis long prais bilong dispela tripela samting bilong mun Jun.

Petrol o bensin bai lukim prais bilong em i kam daun inap long 5 toea long wan wan lita; disel i go daun inap long 6 toea long wan wan lita; na karasin i go daun inap long 5 toea long wan wan lita.

Komisina bilong ICCC, Thomas Abe i tokaut olsem senis long Impot Pariti Prais (IPP) o prais long wol maket we i save senisim prais bilong yumi hia insait long kantri i stap long as bilong ol prais bai go daun long dispela mun.

Stat long pinis bilong mun Epril, prais bilong wol krud wel i bin go daun bihain long em i bin sut i go antap tru long mun Epril.

Mista Abe i tok long ol mun i go pinis, olgeta kantri

long wol i wok long karim hevi bilong bikpela prais bilong wel.


Antap long ol prais senis bilong mun Jun, ritel prais o prais bilong piul o bensin ol i salim long ol sevis stesen long Pot Mosbi na Lae stat long Trine dispela wik bai i sanap olsem:

Ples	Petrol (toea/lita)	Disel (toea/lita)	Karasin (toea/lita)
Pot Mosbi	269.77 (K2.70/l)	218.72 (K2.19/l)	220.48 (K2.21/l)
Lae	276.33 (K2.76/l)	226.68 (K2.27/l)	227.63 (K2.28/l)

bilong piul we ol i mas bihainim stret prais bilong karim piul i go long ol kain kain hap insait long kantri.

"Aninit long dispela wok glasim, ol opisa bilong Komisnin bai karimaut ol wok painimaut long olgeta sevis stesen stat long Jun 8 long sekim sapos ol i bihainim ol nupela prais," Mista Abe i tok.

Cat 527 SKIDDER



Available in both cable and grapple arrangements the 112kW (150 h.p.) Cat 527 features the Caterpillar® elevated final drive system and extended roller frame for optimum balance, and a torque converter drive train for high drawbar pull.

- Extended track roller frame delivers superior balance and traction.
- Elevated final drive design and proven D&R heavy-duty undercarriage for extended wear life in severe logging applications.
- Increased ground clearance for high performance in soft underfoot conditions - less environmental impact.
- Wider track gauge for increased side slope stability.
- Specially designed logging torque converter produces unparalleled towing ability - highest in the industry!
- Powershift transmission and single lever blade control for easier operation and higher production.
- New industry leading operator's compartment.

Hastings Deering



PORT MORESBY
Phone: 300 8300
Fax: 325 0141

LAE
Phone: 472 2355
Fax: 472 1477

TABUBIL
Phone: 548 9045
Fax: 548 9155

RABAUL
Phone: 982 1244
Fax: 982 1129



Radio Australia
Tok Pisin News

Radio Australia
101.9 FM Port Moresby

Tok Pisin Service
6am - 7am : 6000, 7240 (kHz)
7pm - 9pm : 5985, 6020, 6710, 1280 (kHz)

RADIO TOK PISIN PROGRAM
TUNE IN: 101.9 FM

Radio Australia Tok Pisin Program - stat long mun
Mas 2005

MANDE Moring
6AM Stesen Op - Nius na Karen Afeas
6:30AM Oi Hettain - Musik na Chat
6:55AM Hettain na Musik
7AM Stesen Pas
Nait
7PM Stesen Op
7:01PM Oi Hettain na Program Priviu
7:15PM Musik na Chit-Chat
7:30PM Nius na Karen Afeas
8PM Hett
8:15PM Musik
8:30PM NIUS
8:40PM Spots Riplei
8:55PM Musik
9PM Stesen Pas

TUNDE Moring
6AM Stesen Op - Nius na Karen Afeas
6:30AM Nius Hettain - Musik na Chat
6:55AM Hettain na Musik
7AM Stesen Pas
Nait
7PM Stesen Op
7:01PM Oi Hettain na Program Priviu
7:15PM Musik na Chit-Chat
7:30PM Nius na Karen Afeas
8PM Mama Graun
8:15PM Musik/Spots
8:30PM NIUS
8:40PM Hett Riplei
8:55PM Musik
9PM Stesen Pas

TRINDE Moring
6AM Stesen Op - Nius na Karen Afeas
6:30AM Oi Hettain - Musik na Chat
6:55AM Hettain na Musik
7AM Stesen Pas
Nait
7PM Stesen Op
7:01PM Oi Hettain na Program Priviu
7:15PM Musik na Chit-Chat
7:30PM Nius na Karen Afeas
8PM Focus
8:15PM Musik/Spots
8:30PM NIUS
8:40PM Mama Graun Riplei
8:55PM Musik
9PM Stesen Pas

FONDE Moring
6AM Stesen Op - Nius na Karen Afeas
6:30AM Oi Hettain - Musik na Chat
6:55AM Hettain na Musik
7AM Stesen Pas
Nait
7PM Stesen Op
7:01PM Oi Hettain na Program Priviu
7:15PM Musik na Chit-Chat
7:30PM Nius na Karen Afeas
8PM Youth
8:15PM Musik/Spots
8:30PM NIUS
8:40PM Focus Riplei
8:55PM Musik
9PM Stesen Pas

FRAIDE Moring
6AM Stesen Op - Nius na Karen Afeas
6:30AM Oi Hettain - Musik na Chat
6:55AM Hettain na Musik
7AM Stesen Pas
Nait
7PM Stesen Op
7:01PM Oi Hettain na Program Priviu
7:15PM Musik na Chit-Chat
7:30PM Nius na Karen Afeas
8PM Wantok
8:15PM Musik
8:30PM NIUS
8:40PM Youth Riplei
8:55PM Musik
9PM Stesen Pas

SARERE Moring
Solwev i pas long san na long nait i save kamap 2 minit pastaim long wanwan aua. Bihain i gat musik na promo i go inap long olgeta aua na lusim FM siknel.
Nait
7PM Stesen Op
7:01PM Oi Hettain na Program Priviu
7:15PM Musik na Chit-Chat
7:30PM Nius / Wantok Riplei
8PM Serah (Famil bilong Serah)
8:15PM Musik
8:30PM NIUS
8:40PM Musik na Chit-Chat
8:55PM Musik
9PM Stesen Pas

SANDE Moring
Solwev i pas long san na long nait i save kamap 2 minit pastaim long wanwan aua. Bihain i gat musik na promo i go inap long olgeta aua na lusim FM siknel.
Nait
7PM Stesen Op
7:01PM Oi Hettain na Program Priviu
7:15PM Musik na Chit-Chat
7:30PM Nius / Serah Riplei
8PM Riviu
8:30PM NIUS
8:40PM Musik na Chit-Chat
8:55PM Musik
9PM Stesen Pas

TOKSAVE: YU KEN HARIM RADIO
AUSTRALIA TOK INGLIS LONG 24
AUA 7 DE LONG WAN WIK.

PASIFIK NA WOL NIUS

Kros long bisket i ken pasim Air Vanuatu long go long Fiji

Fiji Gavman i tingting long tambu long Air Vanuatu i mekim ol ron i go long Fiji, bilong bekim pasin bilong Vanuatu i no laik rausim wanpela tambu long noken baim Fiji kreka bisket.

Vanuatu i bin putim dispela tambu long yia i go pinis na i kam inap nau, ol toktok namel long tupela blong stretim dispels hevi ino karim gutpela kaikai.

Flour Mills blong Fiji, kampani em i kisim hevi long dispela tambu blong Vanuatu, i tok dispela tambu i fosim em long rausim samting olsem 12 manmeri long wok long wanem em i lusim moni long tingting bilong Vanuatu.

Sief Eksekutyutiv bilong kampani, Sanjay Punja i tok Vanuatu gavman i het strong long dispela samting, na dispela i mekim Fiji Gavman i tingting long tambu long Air Vanuatu long noken ron i go long Fiji na

tu long Fiji i noken baim Vanuatu kava. Ol i wok long tingting long mekim dispela long wanem i gat tambu long ol biskit bilong Fiji. Em i no bagarapim ekspot bilong mipela, tasol bai i gat planti manmeri husat bai nogat wok long dispela. Flour Mills bilong Fiji i tok ol i wok long kisim dispela i go long kot na bai kot i kamap long Pot Vila bihain long dispela wik.

Sting bilong pis kilim tripela Thailand man

Tripela man bilong Thailand i dai long Malaysia bihain long ol pulim win i gat strongpela smel na posin bilong pis. Polis long Perka State bilong north Malaysia i tok, tripela man i wok long kisim pis i go aut long wanpela bris, taim wanpela long ol i go insait long bot we i bin pulap long ol sting pis. Em i bin pudaun na dai taim em i pulim

win insait long bot. Tupela narapela man i bungim wankain birua taim tupela i traim long sevim wan wok bilong tupela. Polis i tok, masin i save givim win or Air Conditioning System long bot i no bin wok long dispela taim.

Fiji Ami Komanda givim tok lukaut long

Komanda bilong Fiji Militari i tok lukaut long gavman long noken go het long wanpela nupela lo em bai inap givim mari mari long pipel i bin go pas long ku long yia 2000. Kommodre Bainamarama i bin tok ol samting em i save i ken bagarapim ol wok bilong ami long traim holim strong oda bihain long ku tasol em i no bin laik toktok moa long wanem samting em bai tokaut long en.

PASIFIK BEAT

UN misin bai lusim Bogenvil long Julai

PINIS bilong ileksen long Bogenvil nau i makim wanpela las wok bilong Yunaitet Nesens Obseva Misin long Bogenvil. Long pinis bilong dispela mun, UN bai daunim flek bilong ol, pasim dua, na 4-pela intanesenel wok manmeri bilong ol i stap long Bogenvil bai lusim provins na go bek long ples bilong ol long wetim narapela wok gen.

Man i askim: Paul Allen
Man i bekim: Tor Stenbock, Hetman bilong Yunaitet Nesens Obseva Misin long Bogenvil.

STENBOCK: Yes, UNOMB i amamas tru long ileksen; mi lukim olsem i nogat bikpela hevi. Taim bilong vot i go stret na kaunim tu i go gut.

Mi no lukim yet ripot bilong ol intanesenel obseva i bin stap long hap, mi no save sapos i gat wanpela i redi pinis o nogat. Tasol mi save olsem ol i givim pinis ripot bilong ol i go long gavman.

Tasol long givim bikpela toktok long en, dispela em i wanpela gutpela ileksen tru.

ALLEN: Yu klia long wanem kain hevi o samting i no stret?
STENBOCK: I gat sampela

liklik samting i no stret long wan wan hap, tasol olgeta dispela hevi ol i daunim. Tasol mi ting bai mipela i painim moa samting insait long ripot bilong ol intanesenel obseva. Mi no save sapos niuspepa bilong tude (Tunde) i tok klia long salens bilong John Momis, tasol mi no klia long en.

ALLEN: Na UN bai stap long Bogenvil inap wanem taim? Wanem kain wok i stap yet long yupela long wokim?

STENBOCK: Mendet bilong mipela bai pinis long pinis bilong mun Jun. Dispela em mendet UN Sekyuriti Kaunsol yet i givim mipela na taim mipela bungim dispela taim, bai mipela i lusim provins. I gat sotpela taim bihain long pinis bilong mun Jun we mipela bai rausim olgeta wok samting bilong mipela. Dispela bai inap long 6-pela wik olgeta.

ALLEN: Yu ken lukim wanpela as bilong skruim dispela mendet o yu ting olsem pinis bilong mun Jun em i gutpela taim bilong UN long lusim ples?

STENBOCK: Mi ting pinis bilong Jun em i gutpela taim na bai i nogat askim i go long Sekyuriti Kaunsol long skruim wok bilong em. I bin klia long las taim mipela i skruim taim bilong mipela olsem long pinis

bilong dispela bai i nogat moa skruim wok. Hia long graun, mi ting wok bilong mipela i pinis. Na wok bilong UN long graun em bai ol i karim aut aninit long ol ejensi bilong Yunaitet Nesens Developmen Program (UNDP).

ALLEN: Yu pilim olsem i gat nid bilong yu long go het wantaim rekonsiliesen wok bihain long mun Jun?

STENBOCK: I gat nid long go het wantaim rekonsiliesen wok long aitan, dispela em i klia, tasol em bai ol arapela ejensi o gavman bai go pas long en.

ALLEN: Wanem sais bilong ol UN wok manmeri i stap long Bogenvil nau?

STENBOCK: Nau yet mipela 4-pela lain tasol i stap wantaim 4-pela as ples manmeri.

ALLEN: Yupela wok long katim namba i kam daun olgeta?

STENBOCK: Yes, mipela i katim namba bilong mipela i go hap long wanpela yia i go pinis, na nau mipela i go daun inap long pinis bilong dispela mun. Olsem na long pinisim stret wok bilong mipela bai i gat tupela intanesenel wok manmeri na sampela lokol wok manmeri. Na i long namba 15 de bilong mun Ogas em bai

pinis.
ALLEN: Long yu yet, yu stap long taim long Bogenvil na yu pilim olsem wanem nau i laik go long pinis bilong misin bilong yu?

STENBOCK: Mi stap long hia stat long mun Septemba 2001 na nau em i taim bilong go. Na mi pilim amamas olsem mipela i kam na mekim wok mipela i kam long mekim.

ALLEN: Yu stap long hap 4-pela yia olgeta. Nau yu bai lusim ples bai yu sore o nogat?

STENBOCK: Yu save, rigret, nogat, long wanem mi bilip olsem mipela wokim wok bilong mipela. Na mi sore long lusim ples long wanem mi mekim planti poroman wantaim ol pipel na yu save, yu poroman, bai yu sore long tok gut-bai.

ALLEN: Long dispela taim yu stap long Bogenvil, yu lukim sampela bikpela senis i kamap long hap. I gat wanpela samting we yu bai tingim oltaim?

STENBOCK: Ating bikpela samting we mi ken tingim nau yet em spit bilong wok rekonsiliesen namel long BRA na BRF na nesanel gavman we i bin kamap. Em i narakain olgeta na i bin gutpela tru.

Want a place in the global village?

In the Loop
Hosted by Isabelle Genoux & Heather Jarvis

Fresh sounds, phat beats
inspiring, informing & plugged in
Open up YOUR mind
New moves, new grooves
Sharing views and creating smiles

Radio Australia
101.9FM
Port Moresby
Daily 11.30am
radioaustralia.net.au/intheloop

RAGBI LIG

PNGRL Kap

Sande 12/06/05
 3:00 Bulldogs vs Lahanis- POM
 1:00 Bombers vs Broncos- Lae
 3:00 Gurais vs Muruks- Lae
 3:00 Cowboys vs Mioks

SP Lig POM ragbi lig

Fraide 10/06/05
 PRL 1
 4:30 Kone Tigers vs DCA A
 6:00 Waliya vs Paga A
 7:30 Hawks vs West A

Sarere 11/06/05

PRL 1
 09:00 West vs Hawks U19
 10:00 Puma vs Magani Res
 11:00 Tarangau vs Defence A
 12:30 Puma vs Magani A
 2:30 Dobo vs Royals A
 4:30 Souths vs Brothers A

PRL 2

9:00 Kone vs DCA U17
 10:00 Waliya vs Paga U17
 11:00 Hawks vs West U17
 12:00 Kone vs DCA U19
 1:00 Waliya vs Paga U19
 2:00 West vs Hawks Res
 3:00 Kone vs DCA Res
 4:00 Waliya vs Paga Res
 5:00 Tarangau vs Defence Res

PRL 3

9:00 Tarangau vs Defence U17
 10:00 Puma vs Magani U17
 11:00 Dobo vs Royals U17
 12:00 Souths vs Brothers U17
 1:00 Tarangau vs Defence U19
 2:00 Puma vs Magani U19
 3:00 Dobo vs Royals U19

4:00 Souths vs Brothers Res
 5:00 Dobo vs Royals Res

Sande 12/06/05

PRL 1
 9:00 Magani vs Tarangau U17
 10:00 Defence vs Kone Tigers A
 11:30 Magani vs Tarangau A
 1:00 Souths vs Puma A
 3:00 B/Bell Bulldogs vs Coca Lahanis SPC

PRL 2

9:00 Souths vs Puma U17
 10:00 Magani vs Tarangau U17
 11:00 Souths vs Brothers U19
 12:00 Magani vs Puma U19
 1:00 Defence vs Kone Res

PRL 3

9:00 Defence vs Kone Tigers U19
 10:00 Souths vs Puma U19
 11:00 Magani vs Tarangau Res
 12:30 Souths vs Puma Res

Mande 13/06/05

PRL 1

9:00 Waliya vs Royals U17
 10:00 Dobo vs Hawks A
 11:30 West vs DCA A
 1:00 Waliya vs Royals A
 3:00 Paga vs Brothers A

PRL 2

9:00 West vs DCA U17
 10:00 Dobo vs Hawks U17
 11:00 West vs DCA U19
 12:00 Dobo vs Hawks U19
 1:00 West vs DCA Res
 2:30 Dobo vs Hawks Res

PRL 3

9:00 Paga vs Brothers U17
 10:00 Paga vs Brothers U19

1:00 Waliya vs Royals U19
 1:00 Paga vs Brothers Res
 2:30 Waliya vs Royals Res

SOKA

EVEDAHANA Soka Asosiesen

Sarere Jun 11, 2005

ESA 1

08:00 Sapphire vs Natore meri
 08:40 Siale vs Graveside Res
 09:20 Gala Konok vs Outsiders D3
 10:00 Natore vs Notna D2
 10:40 Liwale vs Sulu Res
 11:10 D-Rats vs Kilengs meri
 11:50 Kilengs vs Names D1
 12:40 Sulu vs Texas D1
 13:30 Namagawi vs Siale D1
 14:20 BS Natives vs Graveside D1

ESA 2

08:00 AGM Roots vs Brothers D3
 08:40 Texas vs K-Top Mahnduz D2
 09:20 Wasu Crabs vs Raitopos D2
 10:00 Finka vs Gaidi United Res
 10:40 Namagawi vs Notna Meri
 11:10 Wopa Utd vs Country Roots D3
 11:50 Outsiders vs Sapphire D2
 12:30 Namagawi vs D-Rats Res
 13:10 Batisalem vs TKSS D2
 13:50 Nen Konok vs Raitopos D3
 14:30 Batisalem vs Country Roots meri

Sande Jun 12, 2005

ESA 1

08:00 Kilengs vs Texas Res
 08:40 Nen Konok vs Simbai Utd D2
 09:20 Notna vs K-Top Mahnduz D3
 10:00 K-Imindos vs Gaidi Utd meri
 10:40 Names vs BS Natives Res

11:10 Wopa Utd vs Brothers D2
 11:50 Finka vs Gara United D1
 12:40 Gee Neps vs Gaidi Utd D1
 13:30 Gala Konok vs Nalas D1
 14:20 Junction vs Natore D1
 15:10 Dogura Rats vs Liwale D1

ESA 2

08:00 Sapphire vs Wasu Crabs D3
 08:40 Mahnduz vs AGM Roots D2
 09:20 AGM Roots vs Junction meri
 10:00 Gee Neps vs Natore Res
 10:40 Batisalem vs K-Imindos D3
 11:10 Graveside vs Nen Konok meri
 11:50 Nalas vs Gala Konok Res
 12:30 K-Imindos vs Country Roots D2
 13:10 Gara Utd vs Wasu Crabs meri
 13:50 TKSS vs Natore D3
 14:30 Gara Utd vs Junction Res

Bye: Simbai Utd (D3)

LAHI Soka Asosiesen

Sarere 11 Jun, 2005

SIK Stadium

08:00 Rapatona vs Apotiko U19
 09:15 PNG Power vs Bismark U19
 10:30 Rapatona vs Apotiko meri
 11:45 PNG Power vs Bismark meri
 13:00 Rapatona vs Apotiko P2
 14:15 PNG Power vs Bismark P2
 15:30 Rapatona vs Apotiko P1
 16:45 PNG Power vs Bismark P1

Unitech Oval 1

12:00 M/Bay Utd vs Sambure U19
 13:00 M/Bay Utd vs Sambure meri
 14:30 M/Bay Utd vs Sambure P2
 16:00 M/Bay Utd vs Sambure P1

Unitech Oval 2

12:00 Bumayong vs Balob U19

13:00 Bumayong vs Balob meri
 14:30 Bumayong vs Balob P2
 16:00 Bumayong vs Balob P1

Unitech Oval 3

13:00 Sobou vs Bugandi U19
 14:30 Sobou vs Bugandi meri
 16:00 Sobou vs Bugandi P2

Sande 11 Jun, 2005

SIK Stadium

08:00 Rapatona vs Mungkas U19
 09:15 Guria vs Murat U19
 10:30 Rapatona vs Mungkas meri
 11:45 Guria vs Murat meri
 13:00 Rapatona vs Mungkas P2
 14:15 Guria vs Murat P2
 15:30 Rapatona vs Mungkas P1
 16:45 Guria vs Murat P1

Unitech Oval 1

12:00 Apotiko vs Sambure U19
 13:00 Apotiko vs Sambure meri
 14:30 Apotiko vs Sambure P2
 16:00 Apotiko vs Sambure P1

Unitech Oval 2

12:00 Namaemo vs PNG Power U19
 13:00 Namaemo vs PNG Power meri
 14:30 Namaemo vs PNG Power P2
 16:00 Namaemo vs PNG Power P1

Unitech Oval 3

13:00 Sobou vs TTC Bullets U19
 14:30 Sobou vs TTC Bullets meri
 16:00 Sobou vs TTC Bullets P2



Dipatmen bilong Bogenvil - Opis bilong Etministreta

PABLIK NOTIS

OPISEL LONSING BILONG BOGENVIL FAN APIL BILONG BUNGIM
MANI I GO LONG OTONOMES BOGENVIL GAVMAN (ABG)

Dispela toksave i go long olgeta Bogenvil pipel na ol pren bilong ol insait na ausait long Bogenvil Ailan.

Bogenvil Etministresen na Interim Bogenvil Provinsel Gavman i kamapim wanpela Fan Resing Apil long singaut i go long ol Bogenvil pipel long bungim mani.

Dispela bungim mani em bilong sapatim nupela Bogenvil Otonomes Gavman (ABG) long karim ol sevis aninit long Edukesen, Helt na Infrastraksa.

Yumi olgeta i save pinis olsem Bogenvil ikonmik reveniu o rot bilong bringim mani i kam insait i bin bagarap tru long taim bilong bikpela hevi long Bogenvil. Olsem na dispela singaut bilong mipela i go long ol Bogenvil long helpim long mani sait long traime kirapim bek ol gutpela sevis na kamapim wok bilong ol pipel bilong yumi.

Nesene Gavman na ol Eid dona i ken helpim long mak bilong ol yet tasol strongpela tingting na hatwok i mas kam long yumi ol Bogenvil yet long luksave long dispela driman bai i mas karim kikai.

Olsem na mipela i singaut long ol lain Bogenvil long helpim wantaim mani. Mipela i opim wanpela Benk Akaun wantaim Bank South Pacific, Buka brens long Bogenvil.

Nem bilong dispela akaun em "BOUGAINVILLE SPECIAL EVENT TRUST ACCOUNT" na Akaun Namba em "1001077669".

Husat i givim helpim bai i gat luksave na bai yu ken kisim tok orait long lukim mani ripot long dispela mani we i soim ol i yusim olsem wanem.

Dispela Apil long bungim mani bai i ron long tripela (3) yia olgeta. Stat long dispela yia

2005 na pinis long yia 2008.

Olgeta helpim mani yu givim bai go stret long Benk. Mipela bai i no inap kisim kes o mani long yupela. Taim yu dipositim mani long akaun yu mas rejistarim nem bilong yu na bai i ken kamap long akaun.

Long save moa, plis ringim Mista Patrik Koles na Stalin Sawa long ol dispela telepon namba: 973 9102, 973 9792, 973 9798 o yu ken yusim dispela feks namba: 973 9797 na 973 9102.

Mipela bai amamas long dispela helpim we yu ken givim olsem wanpela trupela manmeri na poroman bilong Bogenvil.

PETER S. TSIAMALILI, OBE




Poto kepsen

1. Pot Mosbi netbol: Mea Mera bilong Sparrows i pasim rot bilong Mermaids Phyllis Tongia long skoa long Anda 21 divison.
2. Gerehu Paimeru Skul Josephine Selu i abrusim gut ol pilaia bilong Hagara Paimeru Skul long skoa long skul soka kompetisen long Sir John Guise Stedum. Gerehu win 3-0.
3. Minista bilong Komyuniti Dvelopmen na Spot Ledi Kidu i amamas wantaim sampela ol 20,000 manmeri husat i kamap long las Sande Trukai Fan Ran.
4. Lukaut! Pilaia bilong Scorpions i pairapim bal long ol Seimen Mobil long NCD volibol.
5. Cherly Tupou (sindaun long wil sia) wantaim liklik brata Samuel. Sanap em papa Paul na mama Amini. Famili i wokabaut long Trukai Fan Ran.
6. Tupela pilaia bilong Royals (lep han) na Medics long POM ragbi union i resis long bal long lain-aut.

Oi poto: PAUL ZUVANI/NICKY BERNARD.



NRL NIUS



MARK Geyer, Niu Saut Wels man husat i laik Blues i mas win i tok ol pilaia bilong Niu Wels i no pilai strong we ol i mas pilai long em. Dispela i mekim na ol lus long Maroons long namba wan 2005 Stet ov Orijin pilai long Brisbane tupela wik i go pinis.

Tasol long namba tu Stet ov Orijin pilai we bai kamap long Trinde wik i kam, Jun 15 long Telstra Stedum long Sidni em i askim sampela pilaia long pilai strong.


Long stat em i askim Blues prop Luke Bailey long makim birua pilai bilong em Carl Webb. Em i tok Bailey na poroman bilong em long fran Jason Ryles i mas bung wantaim na kamapim kain strong we i ken pretim fowet bilong Maroons.

Na em i singaut long Blues lok Ben Kennedy long soim rot long ol Blues long wei bilong atek.

"Sapos yu no laik pilai orait no ken putim Blues jesi," Geyer i tok.



• Antap NSW Blues hap bek Brett Kimmorley husat i lusim ples we na larim Canterbury Bulldogs Brait Anasta (lep han) i kam insait long Blues faiv eit. Blues faiv eit Trent Barrett nau i stap hap bek bilong Blues long dispela namba tu Stet ov Orijin pilai.



• Kwinslen Maroons golden boi Matt Bowen husat i brukim lewa bilong ol Nius Saut Wels Blues bai kamapim narapela strongpela pilai long namba tu Stet ov Orijin pilai. Hia em i putim han i go antap bihain long em i putim golden trai.



• Brisbane Broncos Fowet Dane Calaw i pait hat long painim ples gen long Kwinslen Maroons namba tu Stet ov Orijin pilai we bai kamap long Telstra Stedum, Sidni long narapela Trinde Jun 15.



NRL Poin Lata

Klab	P	W	D	L	B	P/D	Pts
1 Broncos	12	10	0	2	1	119	22
2 Sea Eagles	12	9	0	3	1	67	20
3 Cowboys	12	8	0	4	1	92	18
4 Eels	12	8	0	4	1	25	18
5 Sharks	12	8	0	4	1	18	18
6 Storm	12	7	0	5	1	135	16
7 Raiders	11	6	0	5	2	-18	16
8 Roosters	12	6	0	6	1	23	14
9 Dragons	13	7	0	6	0	6	14
10 Warriors	12	5	0	7	1	25	12
11 Wests Tigers	12	5	0	7	1	-46	12
12 Bulldogs	12	4	1	7	1	-45	11
13 Panthers	13	4	0	9	0	-34	8
14 Rabbitohs	12	2	1	9	1	-167	7
15 Knights	11	0	1	1	2	-200	4

* P: Pilai, W: Win, D: Dro, L: Lus, B: Bye, P/D: Poin Diferens, PTS: Poin

Top 10 poin skora

Pilaia	Tim	Poin
1. Hazen El Masri	Bulldogs	132
2. Luke Covell	Sharks	114
3. Michael Witt	Sea Eagles	112
4. Luke Burt	Eels	98
5. Preston Campbell	Rabbitohs	92
6. Brett Hodgson	Sharks	92
7. Darren Lockyer	Broncos	91
8. Matt Orford	Storms	80
9. Josh Hannay	Cowboys	78
10. Clinton Schifcofske	Raiders	74



• Blues kepten Danny Buderus i silip go daun long putim trai long namba 1 Orijin pilai. Em bai go pas long kamapim narapela stronpela pilai.

Bulldogs i SP Kap lida

Andrew Molen i raitim

POT Mosbi Brian Bell Bulldogs nau i go go pas long SP Kap bihain long ol winim kasen brata bilong ol Pot Mosbi Monier Broncos 23-12 long raun faiv.

Bulldogs i kisim dispela sia we LBC Bombers na Monier Broncos i bin holim.

Long wankain taim LBC Bombers tu i kisim taim long han bilong Enga Toyota Mioks 19-14 long Lae.

Na long narapela gem we i no kamap olsem ol manmeri i ting long en i lukim Rabaul Gurias i pas long banis bilong Chemica Mt Hagen Cowboys 8-4 long Lae tu.

Bulldogs bai lukluk nau long kamap wantaim wanpela gutplea gem plen ken taim ol i bungim Goroka Coca-Cola Lahanis long raun siks pilai bilong ol long Pot Mosbi dispela Sande.

Lahanis i mekim save long M&B Mendi Muruks long Goroka las Sande taim ol i winim ol 40-20 long kisim seken win bilong ol insait long SP kap.

Long narapela sait Broncos bai redi long bekim dinau taim ol i skelim Lae LBC Bombers long asples bilong ol Bombers.

Bombers tu i lus long Mioks na tupela wantiam bai kirapim das long go antap long pons leda.

Gem bilong ol Bulldogs i ron gut tasol bihainim gem plen na tingting bilong kosa bilong ol Chris Enara husat i tok em i amamas long ol pilaia bilong em bilong wanem ol i bihainim plen bilong gem em i putim long em.

"Olgeta samting i kamap bihainim plen tasol," Enara i tok na em i tok tu olsem amamas tu long ol pilaia bilong em olsem tim i pilai gut wantaim long kamapim kain samting.

Fes 40 minit i lukim ol Bulldogs i mekim-save long olgeta liklik asua bilong ol Broncos na ol i no givim sans long ol tu long kisim spes na ron.

Ol i soim strongpela difens na atek long kilim i dai paia bilong ol brata bilong ol.



• Brian Bell Bulldogs risev Charlie Pombo i kisim taim nogut long han bilong Monier Broncos prop Paulus Mondo na lok na kepten Chris Lome long Lloyd Robson pilai graun las Sande. Bulldogs win 23-12. Foto: PAUL ZUVANI.

Wanpela rong insait long hap bilong Broncos i lukim kepten na hap-bek bilong Bulldogs, Stanley Hondina i kisim fes tu poin bilong ol na i no long taim Andrew Andiki i go skoa bilong ol gen bihain long hap-bek bilong Broncos, Edea Morea i no holim bal gut long dami-hap.

Broncos i kisim fes poin bilong ol taim faiv-eit Benjamin John i kikim penolti long putim ol 6-2 bihain long difens bilong Bulldogs i rausim bal insait long wanpela takol.

Tupela moa trai bilong Bulldogs i kam long "Man-of-the-Match" na faiv-eit Charlie Wabo na lok Emmanuel Palme i kisim ol i go 18-2 wantaim tupela kik i kisim ol i go 18-2 long hap taim.

Tingting bilong Bulldogs i stap yet long malolo na ol senta bilong Broncos Eki Ene na Romalus Mago i skoaim tupela trai hariap tru long seken hap long kisim ol i go klostu moa yet.

Tasol Wabo na Hondina i givim hat taim long Broncos we ol i kikim bal i go daun long hap bilong ol na pasim ol long i noken i kam bek hapsait long fil.

Ol fowet bilong Bulldogs, Joe Sipa, Joe Sil, Joseph Omai, Johnson Kuike na Aron Mulunga i go pas long tim long brukim banis bilong ol Broncos.

Wanpela fil gol bilong Hondina i helpim Bulldogs long ronawe long Broncos 19-12.

Ol Bulldogs i putim laspela tit long tel bilong ol Broncos taim winga bilong ol Abraham Yobale i skoa long ful-taim stret long pinisim wanpela gutpela gem we planti Bulldogs sapota bai no i nap lus tingting long en hariap.

Bihain long raun faiv poin tebol i sanap olsem Bulldogs 8, Agmark Gurias 7, Monier Broncos 7, LBC Bombers 6, Toyota Mioks 6, Coca-Cola Lahanis 4, Chemica Cowboys 4 na Mabey & Johnson Muruks 0.

LBC Bombers redi long bomim Monier Broncos

Bai gat planti ol gutpela pilai i kamap long dipsela wiken.

Dispela raun siks bai lukim Brian Bulldogs i pait wantaim Coca-Cola Lahanis long Pot Mosbi, LBC Bombers bai bungim Monier Broncos long Lae, Agmark Gurias bai flai wantaim Mabey & Johnson Muruks long Lae yet na Chemica Cowboys bai kalap kalap wantaim Toyota Mioks long Goroka.

Long pilai bilong Bombers na Broncos dispela bai wanpela hatpel pilai long wanem tupel bai long laik pait gen long kisim namba wan sia em tupela i bin lusim pinis na nau em ol Bulldogs i kisim ples.

Na long redim ol Bombers kosa Joe Katsir i mekim pinisi planti ol bikpela senis long lainap bilong em.

Long fulbek em i kisim bipo Kumul fulbek Michael Mosus na kisim i kam antap Frank Jonah long wing. Nupela man husat i kam insait em Bonnie bilong Lae Defence klab husat bai poromanim Jnr Russ Kaupa.

Na bipo faiv eit Randal Kaupa husat nau i pilai long senta nau bai go bek long olpela ples bilong em na Nime Kapo bai pilai long hap bek.

Kepten Tony Dai na Brown Willy bai stap prop. Bruce Kuti na Titus Maima bai stap long seken ro na John Milba bai stap long lok na stap huka em Lucas Daniel. Ol senta Joshua Namblu na Luke Piniu. Ol risev em Solomon Lopena, David Gido, Albert Kaupa na David Roo.

Long Broncos lain ating lain ap bai wankain olsem bilong las wik. Tasol kepten Kawage Gagma i kisim bagarap na olsem em i no bin stap pilai long las. Sapos em i orait em bai kam bek long ples gen long prop.

Long stretim ol pilaia long ol asua em tim i mekim kosa Ivan Ravu bai mas tokim ol long lukautim gut bal. Las wik ol i mekim planti asua long lusim bal we ol Bulldogs i kisim sans na mekimsave gut long ol.

Long fulbek Ravu bai kisim Nickson Onguglo, senta em Romalus Mago na Eki Ene, wing em Lerory Muriki na Wilfred Henry, faiv eit em Benjamin John na hap bek em Edea Morea.

Long go pas long fowet pek em prop Kawage Gagma na Paulus Mondo, rowa Roy Tela na Luke Kolalio, huka em Toua Kohu na lok em Chris Lome.

Lae Basketbol

...Butibam nekim Red Beach

BUTIBAM pinisim Lae basketbol prisisen gut taim em i autim tiket bilong Red Beach husat i bin go pas long kompetisen 68-59 long A Gret pilai bilong ol man long Lae basketbol kot las wiken.

Long pilai Red Beach i bin go pas long fes kwata na i skruim yet dispela gutpela pilai bilong em inap klostu long pinisim bilong namba tu kwata i lukim narapela kain spirit i kisim Butibam na ol i stat long bomim Beach.

Long dispela taim Beach i nogat wei moa long stopim ol manki Lae siti. Long taim Butibam i pulimapim kain ol basket long pinis bilong seken kwata i nogat wanpela samting i bin stopim ol inap ol i winim pilai long taim i pinis.

Dispela lus bilong Red Beach i kamap long wanem man bilong was Malcom Garher husat bai mas mekim wok i no bin putim gutpela was long dispela taim.

Red Beach Wayne Lucas, Danny Joshua, Allan Alex, Simon Bunana na Martin Labi husat i pilai hat long winim ol boi Butibam tasol strong i sot.

Tasol bikpela amamas i go long Butibam husat i kamapim gutpela pilai bihain long ol i kisim mekimsave long kosa bilong ol long wanpela taim brek long namba tu kwata.

Ol manki Butibam olsem Edwin Buala, Papo Maliaki, Peter Buala, Steven Jack, Rueben Tata na Jeffery Kiki i no giv ap hop taim ol i lukim ol Beach i sutim basket i go daun long umben bilong ol. Ol i putim het i go daun na mekim pilai stret we dispela i lukim hatwok bilong ol.

Dispela em i namba wan taim ol basketbol sapota bilong Lae i lukim trupela pilai bilong Butibam we ol i kamapim gutpela ofensiv na difensiv pilai.

Long wankain nius Lae Basketbol Asosiesen i tokaut long 50 memba skwat husat bai tren long dispela wiken.

Dispela namba bai go daun moa yet we Asosiesen bai makim fainol tim bilong ol man na meri we bai go long All-Star Neseno Sempionsip we bai kamap long Lahir long mun Julai.

Oganaising komiti i wok long redim gut ol ples bilong stap na pilai.

Tambu long John Supa na poroman bilong em long lukim ol SP Kap pilai

Paul Zuvani i raitim

PAPUA Niugini Ragbi Futbol Lig Neseno Judisari Komiti i no amamas long pasin em ol sapota bilong Coca-Cola Lahanis i mekim long bagarapim widua bilong Chemica Cowboys bas long Goroka long taim em i go insait long ples bilong pilai.

Judisari siaman Eric Kuman i tok komiti bilong em i no laikim kain pasin em John Supa na ol wanlain bilong em i mekim taim ol i ron i go insait long fil na kikim bal bihain long ol Cowboys i putim trai.

Supa wantaim ol lain bilong em i mekim dispela pasin long taim ol i spak.

Dispela em i namba tu taim kain pasin i kamap. Namba wan taim em long tupela wik i go pinis we wankain pasin i bin kamap long ol sapota bilong Lahanis tim.

Kuman i tok ol pipel bilong isten Hailan i manmeri bilong bel isi na amamas na olsem ol i laik lukim pilai bilong ol.

Na kain pasin em ol liklik lain i mekim i no ken bagarapim dispela gutpela sans we sapos i go het i ken bagarapim dispela sans long bihain taim.

Em i tok ol manmeri i les pinis long lukim wanwan ol man i bagarapim gutpela taim bilong ol arapela lain.

Na olsem em askim Goroka Ragbi Lig na Coca-Cola menesmen long kamapim wantaim sampela lo o wei long stopim dispela kain pasin i kamap. Sapos ol i no mekim olsem ol i ken kisim sas long dispela ol kain pasin.

Kuman i tok pasin em ol sapota bilong Lahanis i mekim i no go gut wantaim lo na pasin bilong pilai na long kain wei ol i mekim dispela i bin givim hevi long pilai i bin kamap.

Em i tok dispela em i soim pasin nogut long PNGRFL na long wok em i mekim long kamapim strong gen wantaim SP Kap kompetisen.

Kuman i tok PNGRFL judisari i skelim pasin em tupela man i mekim na olsem ol i kamap wantaim disison long pasim tupela man long ol i no ken kamap na lukim ol PNGRFL pilai aninit long SP Kap nem long olgeta bilong 2005 sisen.

Supa i bin kisim laipben (pasim long olgeta bilong laip bilong em) long em i no ken lukim ol pilai. Em i kisim dis-



• Taim gen... Mt Hagen Chemica Cowboys prop Rodney Pora i traim long ronawe long ol Brian Bell Bulldogs pilaia long raun 2 SP Kap pilai. FAIL POTO

pela sas long 2003 long han bilong bipo deputi siaman bilong PNGRFL na dispela sas i stap yet.

Long pasin em Supa wantaim poroman bilong em i mekim Lahanis nau i kisim sas long baim K2000 long asua bilong tupela man. Dispela em

i namba tu taim kain pasin i kamap long Lahanis i no toktok long sapota bilong em long ol i no ken mekim kain pasin olsem Kuman i givim tok lukaut long ol tim, pilaia na sapota long ol i mas tingting gut long wanem samting ol i mekim long taim bilong pilai.

PNG pawa lifta go long Osenia pilai

Paul Zuvani i raitim

Papua Niugini Pawa Lifting Federesen bai salim foapela ligta i go long Osenia Sempionsip long Fiji long 16 i go long 18 Jun, 2005.

Dispela foapela lifta em John Anis (90kg) na Kevin Kombra (82.5kg) bilong Mt Hagen na Linda Pulsan (67kg) na Frank Robby (100kg) bilong Pot Mosbi.

Long taim bilong tokaut long tim Kombra, Anis na Robby tasol i bin kamap. Pulsan husat wanpela meri tasol i no stap long dispela taim. Tasol i gat bikpela hop olsem em bai mekim gut gen long dispela ol pilai bihain long em i bin mekim gut long las yia.

Narapela lifta Kombra nau i sempions bilong Osenia na olsem em bai go long difenim dispela taitol bilong em.

Wokabaut olsem tim opisel em PNG PLF presiden Hebou Asi.

Robby husat i makim ol lifta i tok PNG i gutpela long sampela ol lifting tasol i no gutpela long Bens Pres we nau ol bai go long en.

Na long dispela ol i makim tim

we i kwalifai long merit.

Niu Silan em i tok i gutpela long dispela pilai.

"Tasol long ol meri PNGi mekim gut long las yia. Niu Silan husat i gutpela long dispela pilai bai salim tasol wanpela lifta. "Mipela i makim kantri na olsem mipela bai traim mekim gut long dispela ol pilai," Robby i tok.

Na PNG Spot Federesen Seketeri Jenerol Sir John Dawanincura i tok dispela tim i winim ples long go bikos ol i pasim dispela minimum kwalifikesen standet rait. Na olsem ol i no go nating bikos ol i stap long pilai, nogat. Moa yet Sir John i tok dispela wei bilong makim ol tim i gutpela long wanem ol strongpela na gutpela pilaia tasol i stap long tim.

Long makim Trukai Industri Ailans Rijnol Sels menesa Daniel Duncan i tok Trukai Industri i amamas long pas wantaim Pawa Lifting em i no nupela samting long ol i sponsaim tim long go long dispela sempionsip.

Em hop tim bai mekim gut na wisim tim olgeta gutpela wokabaut.



• Silip na hapim ain em Osenia Sempion Kevin Kombra. Sanap na was em John Anis (namel), Hebou Asi (lep han), Trukai Industri mausman Daniel Duncan na Frank Robby.

Tim bai lusim kantri long 14 Jun na kam bek long 20 Jun. Ol narapela kantri husat bai kamap long dispela pait tu em Fiji, Tonga, Australia, Nauru, Tahiti, Samoa,

Amerika Samoa, Niue, Kiribati na Niu Silan. Dispela wokabaut bilong tim em Trukai Industri i sponsaim.

Simbu winim gen Hailans kikkoksing taitol namba tu taim

Andrew Molen i raitim

NANDEX Muay Thai kikkoksing klab bilong Simbu i winim gen Hailans Rijnol Kikkoksing taitol we i kamap long Goroka las wiken.

Simbu i winim ol narapela tim bilong Hailans rijnol yet na ol tim i kam long Madan, Pot Mosbi, Kimbe, Rabaul, Wewak na Erave. Simbu i bin holim dispela taitol na kambek long difenim na nau inim gen.

Instrakta bilong Simbu na tripela taim bilong Hailans Sempions, John Kwiwa i tok amamas long ol paitmanmeri bilong em long hatwok ol i putim long trening na kamapim gut-

pela pait. Em i tok ol bai traim gen long lukluk long difenim dispela taitol narapela yia. Inap olsem 254 paitmanmeri i bung long Nesenol Spots long Goroka we ol i brukim bun inap tupela de long lukim husat bai i kamap sempion long wanwan divisen bilong ol.

Sikspela anda-kad pait i bin i kamap tu namel long ol sinia paitman husat i bai go daun long Melbon, Australia long Jun 20 long stap insait long sampela pait long lukim sapos ol bai inap long kamapim ol profesenol paitman olsem bos bilong ol Stanley Nandex.

Mein baut o pait bilong dispela tonamen i bai kamap namel long asples paitman em

Willie Yoba na Andy Linstan bilong Madang. Yoba i mas pait wantaim Mark Sondo bilong Pot Mosbi tasol Sondo i bin gat sampela bagarap long han na olsem em i inap kamap na pait.

Wanpela strongpela pait i kamap long tupela we i lukim ol i kirapim das insait long tripela raun we Linstan i win.

Long ol junia pait, planti gutpela pait i kamap na long 52-57kg divison i lukim Gideon Timothy bilong Pot Mosbi i kamap sempion bihain long em i bungim wanpilai bilong em, Kosman Wambon bilong Pot Mosbi long fainol. Nandex i tok amamas long em i go long ol paitmanmeri long ol i soim laik long dispela spot na i kamap na

em i tokim ol long go bek na tren strong long redi long nesenol sempionsip long Septemba. "Planti gutpela pait i kamap nau na mi amamas long lukim yupela," Nandex i tok.

"Planti bilong yupela i gat gutpela talen na skil we yupela i soim long hia na mi laikim bai yupela i mas tren strong moa bai yupela i ken i gat sans long kamap ol gutpela paitmanmeri bilong dispela spot long PNG na long ovasis tu," em i tok.

Bihain long nesenol sempionsip bai i gat wanpela sempionsip long 70kg divison we wina bai makim PNG long Wol Sempionsip long Kanada we prais mani i sanap olsem K400 000.

Sauten rijinol soka tonamen

Paul Zuvani i raitim

MOA long 34 soka asosiesen long Sauten rijinol bai kamap long Sauten Rijinol soka tonamen we bai go nau moning, Kwins Betde long Pot Mosbi.

Ol pilai bai kamap long Bisini na Sir John Guise Stedum soka graun. Oganaising komit siaman Scott Vavine i tok em i amamas long namba bilong ol soka tim husat bai kamap na pilai.

Vavine i tok: "Ol wok rere bilong mipela i go wantaim taim na 34 tim i rejista pinis long kamap long ol pilai."

Em i tok bikpela as tingting bilong holim dispela tonamen em long strongim soka long rijinol na bihain go het na bihainim ol narapela tingting ol i gat long en.

Ol tim we bai kamap em Pot Mosbi, NCD Pablik Sevens, Gerehu Kantri, EPC, Oro Kapiton, Makerupu, Babaka, Kamali, Kalo, Karawa, Koupa, Gemo, Boku, Libuna, Kareko, Hula, Irupara, Upulima, Cloudy Bay, Magarida, AP Baga, Pinu, Koiari, Popondetta, Kokoda, Higaturu, Aeka, Beuru, Sauga, Kerema na Kikori. Ol tim bai stap long foapela pui.

Ol fainol bai kamap long Mande 13 Jun long Bisini soka graun.

Em i tok tru (mama bodi) PNG Futbol Asosiesen sampela taim i nogat luksave long dispela tonamen tasol i gat taim ol bai mas givim luksave. Vavine i tok em i no amamas long pastaim edministresen bilong PNGFA we i gat luksave na sapot tasol long ol bikpela senta tasol nogat long ol liklik senta. Em tok nau em i taim we Sauten rijinol bai sanap na soim olsem em i save pilai soka na inap kamapim ol gutpela soka pilaia bilong kantri.

Pot Mosbi rot rana

LAS wik Sarere Pot Mosbi Rot Rana i gat ron we i stat long Apex Pak long Boroko.

Dispela resis ol i bin ronim bipo tasol planti ol rana i lus long rot. Olsem na las wik planti rana i no klia gut long kos na planti i mekim sot kat o ol i bin lus olgeta. Husat i bin makim kos long resis i bin givim bikpela toksave long kos tasol sampela i kam bihain na ol i no harim toksave.

Em i tru dispela kos em i hat liklik tasol i gat planti mak long rot we ol rana i mas tanim, tasol sampela i no lukim gut mak na ol i bin go long narapela rot.

Bikos dispela hevi i bin kamap tupela taim, dispela resis i no inap go insait long bungim poin long Must Run Challenge. Long 1.9km resis i nogat hevi. Kos em i stret pinis na wina bilong resisem Richard Waninara (7.21) bihain long em Rison Pane husat i kisim seken ples (7.34) na namba tri em Craig Thompson (7.40) i mekim spit tru. Long 5.5km resis Russel Hasu (22.00) i kisim namba wan ples na kamap namba tu ples em Simon Pinampio we em i kamap 22.01. Tupela i mekim strongpela resis insait long Apex Pak. I luk olsem husat i winim 10.8km resis i no bin ronim kos tru. Planti rana i mekim spot gut insait long Henao Draiv. Namel long dispela resis David Cannings (57.12) i wok hat ru long winim Bruce Alabaster (56.66) Richard Terry (57.05) na Jim Taylor (57.12). Paulus Opus we i wok hat long painim strong bilong em na stat long resis em i ron wantaim Paul Crouch-Chivers. Insait long Henao Drive Paulus i painim strong bilong em na mekim gutpela spit.

PNG Swimming Inc. holim swima/kosa kosa

PAPUA Niugini Swimming Inc long dispela Kwins Betde wiken bai holim wanpela swima/kosa klinik long Pot Mosbi na Lae.

PNGSI presiden Elizabeth Wells i tok long go pas long givim skul em Australia swimming kosa Rick Van Der Zant. Helpim em bai PNG swimming sempion Ryan Pini.

Insait long dispela klinik ol swima bai lainim ol gutpela wei (teknik) bilong swima long foapela strok we i go wantaim long wom hap, tanim long taim bilong swim na tingting i gat long taim bilong swim.

"As tingting bilong mipela em long skulim ol swima bilong mipela long ol wei bai ol i ken swim gut na kamap sempion. Dispela klinik bai givim gutpela sans long ol swima na kosa bilong mipela long save moa long ol pasin bilong swim," Wells i tok.

Na em i tok tenk yu long Australia Hai Komisen long givim mani long helpim ronim dispela kos.

Liz i tok Zant i bin ronim wankain kos long 2004 long Pot Mosbi na em i no kirap nogut long lukim Zant i kam gen long ronim dispela kos.

"Long kamap kosa i bin driman bilong mi na mi amaamas tru long ol i givim mi dispela sans," Zant i tok.

Porgera holim bodibildas sempionsip

PAPUA Niugini Bodibildas Federesen bai holim nesenol sempionsip bilong em long gol main taun, Porgera Enga provins long dispela Sarere.

Federesen vais presiden Ronald Haihavu i tok inap olsem 45 o 50 bodibilda bai kamap long dispela ol sempionsip. Na tripela senta tasol bai kamapim ol pilaia. Dispela ol senta em Lae husat bai kamap wantaim 20 plas bodibilda, Goroka 16 na Pot Mosbi 7.

Em i tok Bougenvil i bin tok long kamap long dispela ol pila tasol bikos ol i holim ol ileksen dispela i pasim ol long redi long kamap na olsem ol bai i no inap kamap.

Haihavu i tok long dispela sempionsip Federesen bai makim faipela man long go long Osenia Bodibilding Sempionsip long Tahiti long Oktoba bihain long dispela yia.

Ol bilda bai kompet long bantam (65kg), laiwet (70kg),



• Bodibildas (l-r) Allan Yegiora na Rondate Miso. Baksait lephan: Raphael Yokefa, Lukas Werwin, Ronald Haihavu na Yago Pikson. Foto: PAUL ZUVANI


midolwet (80kg), lait heviwet (85kg) na hevi wet (90+).

Ol bodibildas long Pot Mosbi em Raphael Yokefa, Lukas

Werwin, Yago Pikson, Allan Yegiora na Rondate Miso. Haihavu bai go olsem tim opisel. Em i tok tenk yu long Trukai Industri long sponsasip.



WANTOK Spots



7 pes 29
Lukim moa Stet ov Orijin
na NRL stori insait



7 pes 29
Lukim moa Stet ov Orijin
na NRL stori insait

Maroons o Blues?

... tupela tim wantaim i redi long win

Tupela tim wantaim i redi.
Yumi bai save long wining tim las wisil i bo long namba tu Stet ov Orijin pilai we bai kamap long Telstra Stedum long Sidni long Trinde wik Jun 15..

Long wok rere bilong ol tupela tim i mekim sampela hatpela disison.

Long stat Niu Saut Wels selekta i lusim hap bek Brett Kimmorley na kisim faiv eit Trent Barrett long kisim ples bilong em.

Planti toktok i kamap long kain pilai em Kimmorley i mekim na dispela pas em i mekim we golden boi bilong Maroons Matt Bowen i intaseptim na givim win long Maroons bihain long tupela tim i dro 20-20 long fultaim.

Bowen i putim trai long narapela hap ol i kolim fes poin we husat i putim namba wan poin bai winim dispela pilai we tupela tim i dro long en.

Long dispela as Kimmorley i go daun na Barrett i kam antap. Long wankain taim Kimmorley i go aut Canterbury Bulldogs faiv eit long kisim ples bilong Barrett long Blues faiv eit.

Long narapela senis biknem bek rowa Steve Menzies i kisim ples bilong wantok Manly pilai Anthony Watmough long risev.

Long taim bilong mekim ol senis Blues kosa Ricky Stuart i tok kain pilai em Kimmorley i kamapim i mekim ol selekta i nogat bilip long en na olsem ol i laikim nupela hap bek we ol i bilip gupela wok bai kamap namel long Barrett na Anasta.

"Em i hatpela disison long mipela i mekim," Stuart i tok taim em i tok long sensim Kimmorley.

"Long ol wik i go Brett i no pilai gut na olsem em bai amamas sapos ol i kisim em o nogat. Em i no pilai long mak em yu laikim long em i mas pilai long en.

"Sapos yu lukiuk long Trent Barrett na Braith Anasta mi ting dispela em i gupela bung we Trent i bin mekim gupela wol long NSW long namba wan Stet ov Orijin.

"Mipela i amamas long dispela disison (makim bilong Barrett na Anasta).

Em i tok ol i bin kisim longpela taim long toktok long kisim Andrew Johns long 17-man skwat tasol i luk olsem Newcastle Knights kepten i mas kamap long moa pilai bipo long ol i kisim em.

Na long ol Maroons Brisbane Broncos fowet Dane Carlaw i pait long kisim ples Maroons lain ap long namba tu Stet ov Orijin pilai.

Makim bilong Carlaw i soim gupela mak bilong em husat i gat nem long stap insait long Kangaroo tim.

Carlaw husat i painim hat long bilip long em yet long stat bilong sisen long hevi em i gat long sol bilong em i kirap nogut long



• Trent Barrett, man husat i kisim ples bilong Brett Kimmorley long Blues hap bek i tok em i redi. Lukim moa stori long pes 29

ol i makim em long tim.

"Mi no lukiuk long dispela, bihain long narapela faivpela wik," Carlaw i tok.

"Long faivpela wik mi no ting mi gat wok.

Na wanpilaia bilong em long Brisbane Brad Thorn i go antap long prop long kisim ples bilong Steve Price husat i kisim bagarap.

Tasol Thorn i no bin pilai long wiken long wanem em i gat hevi.

Na pawa haus bilong Cowboys Carl Webb i stap long seken ro long fes 13 lain ap bilong Maroons.

Kwinslen selecting komiti siaman Des Morris i tok i nogat bikpela wari long kisim Webb i kam insait long pilai.

"Mi no ting, em i stap long dispela kain pilai bipo na i bin helpim mipela long pilai bipo," Morris i tok. "Em i wanpela pilai

husat i no hat long kisim hariap."

Long tupela skwat Kwinslen Maroons tim em Billy Slater, Ty Williams, Shaun Berrigan, Paul Bowman, Matt Sing, Darren Lockyer (kepten), Johnathan Thurston, Petero Civoniceva, Cameron Smith, Brad Thorn, Mick Crocker, Carl Webb na Chris Flannery. Long risev em Ben Roos, Dane Carlaw, Casey McGuire na Matt Bowen. Kosa em Michael Hagan.

NSW Blues tim em Anthony Minichiello, Matt King, Mark Gasnier, Matt Cooper, Luke Rooney, Braith Anasta, Trent Barrett, Jason Ryles, Danny Buderus (kepten), Luke Bailey, Nathan Hindmarsh, Craig Fitzgibbon na Ben Kennedy. Risev em Craig Wing, Andrew Ryan, Steve Menzies na Steve Simpson. Kosa em Ricky Stuart.

PNGSF lonsim "Scratch Loto"

Andrew Molen i raitim

NEM bilong ol spotsmanmeri bilong yumi olsem swima Ryan Pini, wet lifta Dika Toua, ron meri Maek Koime na kriket Mahuru Dai na sampela moa biknem pilai na i kamap long narapela samting bilong helpim spot.

Dispela em long "scratch lotto" tiket PNG Spots Federesen i lonsim long Pot Mosbi aste ol i kolim "Scratch for Sport."

PNGSF i bungim mani long salim ol spotsmanmeri bilong PNG i go pilai long ol bikpela pilai na long dispela yia em i redi long salim tim i go long Palau mini Saut Pasifik Gems long pinis bilong mun Julai na stat bilong Ogas.

"Mipela i gat bikpela wok nau long bungim mani long salim tim bilong yumi i go long mini Saut Pasifik Gems long Palau na 2006 Komowel Gems long Melbon, Australia.

"Long bihainim tingting bilong mipela long mipela i mas sanap long strong bilong mipela yet mipela long PNGSF i save mekim ol fan resing long traun bungim mani bilong mipela long salim ol tim i go." PNGSF fanresing komiti siaman, Syd Yates i tok taim em i lonsim dispela ol nupela tiket.

Em i tok sampela ol fanresing ol mekim pinis em golf salens bilong Praim Minista na Trukai Fan Ran.

Yates i tok PNGSF i kirapim tingting bilong laki tiket long 1999 wantaim as tingting long bungim mani bilong ol pilai na long dispela taim em i kisim bikpela sapot long pablik.

"Spots loto i ron gut tru wantaim fes tiket "Go for gold" i go long "Scratch Lotto" long 2002 a "Laki Pik" long 2004.

"Nau mi laik tok amamas long lonsim nupela loto tiket 'Scratch for sport'," Yates i tok.

Em i tok tenkyu yu i go long TMS Global Services long givim sans long PNGF long yusim dispela ol tiket olsem wanpela fan resing bilong ol.

Ol nupela tiket ya bai i stap long ol stua we Laki pik tiket i bin is tap long en olsem ol Steamships trading stua, Stop 'n' Shop stua insait long Pot Mosbi, TST na ol narapela stua olsem Cheongs supamakot long Aotau, Q&Q long Is Boroko, Jofo trading long Hohola, Hogi shop, Korobosea, Brain Bell, Boroko, Royol Papua Niugini yot klab, Kids Generation-RH hypermart, Gordons na Tamasi No.6 long RH Hypermart, Baby & Me long taun na Tamasi No.6 long Sogeri.

Yates i tok tenkyu tu long ol dispela lain long salim ol tiket bilong ol.

Seketeri-jenerol bilong PNGSF Sir John Dawanicura tu i tok amamas bilong em i go long Brian Bell kampani na ol narapela long stua na tu long ol manmeri long ol i save na i mas baim dispela ol tiket long helpim ol na sapotim ol spotsmanmeri bilong kantri.

"Ol laki pik tiket bai is tap yet i nap ol laspela tiket i pinis o wanpela man i winim K25 000 prais moni is tap insait.

"Dispela nupela tiket i gat planti ol liklik prais moni na bai yu i gat bikpela sans moa long winim wanpela samting, husat save nogut bai yu inap kamap laki man o meri," Sir John i tok.